

萬 有 文 庫

第二集七百種

王 雲 五 主 編

宋 詩 鈔

(六十)

呂 留 良 吳 之 振 吳 自 牧 選

李 宣 龔 校

商 務 印 書 館 發 行

宋 詩 鈔

(六十)

選自吳振之吳曾留詩

校訂宣李

國學基本叢書

# 劍南詩鈔

陸游字務觀。越州山陰人。十二能詩文。蔭補登仕郎。鎖廳薦送第一。秦檜孫埴居次。檜不說。明年試禮部。復置游前列。檜顯黜之。繇是爲所嫉。檜死始赴寧德簿。以薦除敕令所刪定官。孝宗初。遷樞密院編脩。編類聖政所檢討官。召見。賜進士出身。尋免去。五爲州別駕。西泝樊道。范成大帥蜀。爲參議官。以文字交不拘體法。人譏其放。因自號放翁。後累遷。與祠起知嚴州。再召見。曰。卿筆力回斡。非他人可及。同脩三朝國史實錄。陞寶章閣待制。致仕。封渭南伯。卒年八十五。詩稿最多。以居蜀久不能忘。統署其稿曰劍南。以見志。孝宗嘗問周必大曰。今詩人亦有如唐李白者乎。必大以游對。人因呼爲小太白。劉後村謂近歲詩人。雜博者堆。險仗空疎者窳。材料出奇者費。摻索縛律者少。變化惟放翁。記問足以貫通。力量足以驅使。才思足以發越。氣魄足以陵暴。南渡而下。故當爲一大宗。吾謂豈惟南渡。雖全宋不多得也。宋詩大半。從少陵分支。故山谷云。天下幾人學杜甫。誰得其皮。與其骨。若放翁者。不寧皮骨。蓋得其心矣。所謂愛君憂國之誠。見乎辭者。每飯不忘。故其詩浩瀚。翠嶽自有神合。嗚呼。此其所以爲大宗也與。

寄酬曾學士學宛陵先生體。比得書云。所寓廣教僧舍。有陸子泉。每對之輒奉懷。

庭中下午鵲。門外傳遠書。小印紅屈蟠。兩端黃蠟塗。開緘展矮紙。滑細疑卵膚。首言勞良苦。後問逮妻孥。中間勉以仕。語意極勤渠。字如老瘠竹。墨淡行疎疎。詩如古鼎篆。可愛不可摹。快讀醒人意。垢癢逢爬梳。細讀味益長。炙穀出膏腴。行吟坐臥看。廢食至日晡。想見落筆時。萬象聽指呼。亦知題詩處。綠井石髮麤。公開計有客。煎茶置風爐。倘公無客時。濯纓亦足娛。井名本季疵。思人理豈無。居然及賤子。媿謝恩意殊。幾時得從公。舊學鋤荒蕪。古文講聲形。誤字辨魯魚。時時酌井泉。露芽奉瓢盂。不知公許否。因風報何如。

新夏感事

百花過盡綠陰成。漠漠爐香睡晚晴。病起兼旬疎把酒。山深四月始聞鶯。近傳下詔通言路。已卜餘年見太平。聖主不忘初政美。小儒唯有涕縱橫。

寄陳魯山陳時調官都下

天下無虞國論深。書生端合老山林。平生力學所得處。政要如今不動心。舊友幾年猶短褐。謫官萬里少來音。願公思此寬羈旅。靜勝炎曦豈易侵。

出縣

愬恩簿領不堪論。出宿聊寬久客魂。稻壠牛行泥活活。堊塘橋壞雨昏昏。槿籬護藥纔通徑。竹筧分泉自遍村。歸計未成留亦好。愁腸不用遶吳門。



東陽道中

風欹烏帽送輕寒。雨點春衫作碎斑。小吏知人當著句。先安筆硯對溪山。

東陽觀醪醕

福州正月把離杯。已見醪醕壓架開。吳地春寒花漸晚。此歸一路摘香來。

送杜起莘殿院出守遂寧

羽檄聯翩晝夜馳。臣憂願不在邊陲。軍容地密寧當議。陛下恩深不忍欺。白簡萬言幾慟哭。青編一傳可前知。平生所學今無負。未歎還鄉兩鬢絲。

聞武均州報已復西京

白髮將軍亦壯哉。西京昨夜捷書來。胡兒敢作千年計。天意寧知一日回。列聖仁恩深雨露。中興赦令疾風雷。懸知寒食朝陵使。驛路梨花處處開。

喜小兒輩到行在

阿綱學書蚓滿幅。阿繪學語鸞嚙木。截竹作馬走不休。小車駕羊聲陸續。書窗滌壁誰忍噴。嘵嘵也復可憐人。卻思胡馬飲江水。敢道春風無戰塵。傳聞賊棄兩京走。列城爭爲朝廷守。從今父子見太平。花前飲水勿飲酒。

送七兄赴揚州帥幕

初報邊烽照石頭，旋聞胡馬集瓜州。諸公誰聽芻蕘策，吾輩空懷畎畝憂。急雪打窗心共碎，危樓望遠涕俱流。豈知今日淮南路，亂絮飛花送客舟。

村居

富貴功名不擬論，且浮舴艋寄煙村。生憎快馬隨鞭影，寧作癡人記劍痕。樵牧相諳欲爭席，比鄰漸熟約論婚。晨昏夜績吾家舊，正要遺風付子孫。

盆池

門外江濤湧雪堆，埋盆作沼亦何哉。兒曹不解渠翁意，新脫風波嶮處來。

次韻无咎別後見寄

平日盜行不解辭，長亭況是送君時。幾行零落僧窗字，何限流傳樂府詩。歸思恰如重醞酒，歡情略似欲殘基。龍蛇飛動無由見，坐媿文園屬思遲。詩來彌月，乃能和禽，故云。

望江道中

吾道非邪來曠野，江濤始此去何之。起隨烏鵲初翻後，宿及牛羊欲下時。風力漸添帆力健，艣聲常雜雁聲悲。晚來又入淮南路，紅樹青山合有詩。

去年余佐京口。遇王嘉叟從張魏公督師過焉。魏公道免相。嘉叟亦出守莆陽。近辱書報魏公。已葬衡山。感歎不已。因用所遺拄頰亭詩韻奉寄。

河亭挈手共徘徊。萬事寧非有數哉。黃閣相君三黜去。青雲萬事一麾來。中原故老知誰在。南嶽新丘共此哀。火冷夜窗聽急雪。相思時取近書開。

自詠示客

衰髮蕭蕭老郡丞。洪州又看上元燈。羞將枉直分尋尺。寧走東西就斗升。吏進飽諳箝紙尾。客來苦勸摸牀稜。歸裝漸理君知否。笑指廬山古澗藤。廬山僧近寄藤杖甚奇。

上巳臨川道中

二月六夜春水生。陸子初有臨川行。溪深橋斷不得渡。城近臥聞吹角聲。三月三日天氣新。臨川道中愁殺人。纖纖女手桑葉綠。漠漠客舍桐花春。平生怕路如怕虎。幽居不省遊城府。鶴軀苦瘦坐長饑。龜息無聲惟默數。如今自憐還自笑。斂版低心事年少。儒冠未恨終自誤。刀筆最驚非素料。五更欹枕一悽然。夢裏扁舟水接天。紅蕖綠芰梅山下。白塔朱樓禹廟邊。

初夏道中

桑間葢熟麥齊腰。鶯語惺惺野雉驕。日薄人家晒蠶子。雨餘山客買魚苗。豐年隨處俱堪樂。行路終然不

自聊獨喜此身強健在。又搖團扇著絺蕉。

上虞逆旅見舊題歲月感懷

舴艋爲家東復西。今朝破曉下前溪。青山缺處日初上。孤店開時鷺亂啼。倦枕不成千里夢。壞牆閒覓十年題。漆園傲吏猶非達。物我區區豈足齊。

夜聞松聲有感

清晨放船落星石。大風吹颿如箭激。回頭已失廬山雲。卻上吳城觀落日。夜深龍歸擘祠門。入木數寸留爪痕。明朝就視心尚慄。腥風卷地雷霆奔。歸船買酒特自慰。性命平生驚屢戲。固知神怒有定時。波紋蹙作魚鱗細。如今衰病臥林垆。霜覆茆簷月滿庭。松聲驚破三更夢。猶作當時風浪聽。丙戌七月。自京口移官豫章。冒風濤

自星子解舟。半日至吳城山小龍廟。

送芮國器司業

往歲淮邊虜未歸。諸生合疏論危機。人材衰靡方當慮。士氣崢嶸未可非。萬事不如公論久。諸賢莫與衆心違。還朝此段宜先及。豈獨遺經賴發揮。

晚泊

半世無歸似轉蓬。今年作夢到巴東。身遊萬死一生地。路人千峰百嶂中。鄰舫有時來乞火。叢祠無處不

祈風晚潮又泊淮南岸。落日啼鴉戍堞空。

雨中泊趙屯有感

歸燕羈鴻共斷魂。荻花楓葉泊孤村。風吹暗浪重添纜。雨送新寒半掩門。魚市人煙橫慘淡。龍祠簫鼓鬧黃昏。此身且健無餘恨。行路雖難莫更論。

黃州

局促常悲類楚囚。遷流還歎學齊優。江聲不盡英雄恨。天意無私草木秋。萬里羈愁添白髮。一帆寒日過黃州。君看赤壁終陳跡。生子何須似仲謀。

石首縣雨中繫舟戲作短歌

庚寅去吳西適楚。秋晚孤舟泊江渚。荒林月黑虎欲行。古道人稀鬼相語。鬼語亦如人語悲。楚國繁華非昔時。章華臺前小家住。茆屋雨漏秋風吹。悲哉秦人真虎狼。欺侮六國囚侯王。亦知廢興古來有。但恨不見秦先亡。開窗酌汝一盃酒。等爲亡國秦更醜。驪山冢破已千年。至今過者無傷憐。

初寒

船尾寒風不滿旗。江邊叢祠常揜扉。行人畏虎少晨起。舟子捕魚多夜歸。茆葉翻翻帶宿雨。葦花漠漠弄斜暉。傷心到處聞砧杵。九月今年未授衣。

水亭有懷

漁村把酒對丹楓。水驛憑軒送去鴻。道路半年行不到。江山萬里看無窮。故人草詔九天上。老子題詩三峽中。笑謂毛錐可無恨。書生處處與卿同。

將離江陵

暮暮過渡頭。旦旦走隄上。舟人與關吏。見熟識顏狀。癡頑久不去。常恐遭諂讓。昨日倒橋干。今日聯百丈。買薪備雨雪。儲米滿瓶盎。明當遂去此。障袂先側望。卽今孟冬月。波濤幸非壯。潦收出奇石。霧卷見疊嶂。地嶮多崎嶇。峽束少平曠。從來樂山水。臨老愈跌宕。皇天憐其狂。擇地令自放。山花白似雪。江水綠於釀。竹枝本楚些。妙句寄悽愴。何當出清詩。千古續遺唱。

滄灘

百夫正謹助鳴鶻。舟中對面不得語。須臾人散寂無譁。惟聞百丈轉兩車。嘔嘔啞啞車轉急。舟人已在沙際立。霧斂蘆村落。照紅雨餘漁舍炊煙溼。故鄉回首已千山。上峽初經第一灘。少年亦慕宦遊樂。投老方知行路難。

黃牛峽廟

三峽東江流。崖谷互吐納。黃牛不負重。雲表恣蹴蹋。吳船與蜀舸。有請神必答。誰憐馬遭刖。百歲創未合。

梅師浪蕩走烹彘陳酒榼紛然餒神餘羹鬻爭嘔嚙空庭多落葉日暮聲颯颯奇文粲可辨高古篆籀雜  
村女賣秋茶簪花髻鬢匝襁兒著背上帖妥若在榻山寒雪欲下虎出門早闔我行忽至此臨風久嗚咽

巴東令廡白雲亭

寇公壯歲落巴蠻得意孤亭縹緲間常倚曲闌貪看水不安四壁怕遮山遺民雖盡猶能說老令初來亦  
愛閒正使官清貧至骨未妨留客聽潺潺野水無人渡孤舟日橫荒公遠巴東令

瞿唐行

昔年二月廿四日舟泊白潭川第信手拈來不問浮沉

四月欲盡五月來峽中水漲何雄哉浪花高飛暑路雪灘石怒轉晴天雷千艘萬舸不敢過篙工梅師心  
膽破人人陰拱待勢衰誰敢輕行犯奇禍一朝時去不自由山腹空有沙痕留君不見陸子歲暮來夔州  
瞿唐峽水平如油信手拈來非偶然

山寺

籃輿送客過江村小寺無人半掩門古佛負牆塵漠漠孤燈照殿雨昏昏喜投禪榻聊尋夢嬾爲啼猿更  
斷魂要識人間盛衰理岸沙君看去年痕峽漲時水高數十丈至冬盡落

寒食

峽雲烘日欲成霞瀼水生紋淺見沙又向蠻方作寒食強持卮酒對梨花身如巢燕年年客心羨游僧處

處家。賴有春風能領略。一生相伴遍天涯。

風雨中望峽口諸山奇甚戲作短歌

白鹽赤甲天下雄。拔地突兀摩蒼穹。凜然猛士撫長劍。空有豪健無雍容。不令氣象少滄瀟。常恨天地無全功。今朝忽悟始歎息。妙處元在煙雨中。太陰殺氣橫慘淡。元化變態含空濛。正如奇材遇事見。平日乃與常人同。安得朱樓高百尺。看此疾雨吹橫風。

久病灼艾後獨臥有感

白帝城高暮柝傳。幽窗搔首意蕭然。江邊雲溼初橫雁。牆下桐疎不庇蟬。計出火攻傷老病。臥聞鶯墮歎蠻煙。諸賢好試平戎策。歛退無心競著鞭。

小市

小市門前沙作隄。杏花雖落不霑泥。客心尙壯身先老。江水方東我獨西。蹙息軒窗仍汛掃。遠遊書劍亦提攜。子規應笑飄零慣。故傍茆簷盡意啼。

蟠龍瀑布

遠望紛珠纓。近觀轉雷霆。人言水出奇。意使行人驚。人驚我何得。定非水之情。水亦有何情。因物以賦形。處高勢趨下。豈樂與石爭。退之亦隘人。強言不平鳴。古來賢達士。初亦願躬耕。意氣或感激。邂逅成功名。



馬上

殘年流轉似萍根。馬上傷春易斷魂。烘煥花無經日盡。漲深水過去年痕。迷行每問樵夫路。沒宿時敲竹寺門。不信太平元有象。牛羊點點散煙村。

鄰水延福寺早行

化蝶方酣枕。聞雞又著鞭。亂山徐吐日。積水遠生煙。流泊真衰矣。登臨獨惘然。桃花應笑客。無酒到愁邊。酒偶盡。市醕不可飲。

岳池農家

春深農家耕未足。原頭叱叱兩黃犢。泥融無塊水初渾。雨細有痕秧正綠。綠秧分時風日美。時平水有差科起。買花西舍喜成婚。持酒東鄰賀生子。誰言農家不入時。小姑畫得城中眉。一雙素手無人識。空村相喚看繅絲。農家農家樂復樂。不比市朝爭奪惡。宦游所得其幾何。我已三年廢東作。

果州驛

驛前官路埃纍纍。歎息何時送我歸。池館鶯花春漸老。窗扉燈火夜相依。孤鸞怯舞愁窺鏡。老馬貪行強受鞿。到處風塵常撲面。豈惟京洛化人衣。

聞杜鵑戲作

半世羈游厭路岐。憑鞍日日數歸期。勞君樹上叮嚀語。似勸饑人食肉糜。

老君洞有石刻。載唐明皇幸蜀。見老君於此。

丹鳳樓頭語未終。崎嶇蜀道復相逢。太清宮闕俱煨燼。豈亦南來避賊鋒。

簡章德茂

殊方邂逅豈無緣。世事多乖復悵然。造物無情吾輩老。古人不死此心傳。冷雲黯黯朝橫棧。紅葉蕭蕭夜滿船。箇裏約君同著句。不應輸與灞橋邊。

太息宿青山鋪作。

太息重太息。吾行無終極。冰霜迫殘歲。鳥獸號落日。秋砧滿孤村。枯葉擁破驛。白頭鄉萬里。墮此虎豹宅。道邊新食人。膏血染草棘。平生鐵石心。忘家思報國。卽今冒九死。家國兩無益。中原久喪亂。志士淚橫臆。切勿輕書生。上馬能擊賊。

淒淒復淒淒。山路窮攀躋。僕病臥草間。馬困聲酸嘶。脫兔截道犇。窮狖上樹啼。崩湍一何哀。下落萬仞谿。昏黑投孤戍。洗我衣上泥。下愚不可遷。大惑終身迷。仕宦十五年。曾不飽糠粃。客路少睡眠。月白聞號雞。欲行且復止。虎來荈葉低。

閩中作

挽住征衣爲濯塵。閬州齋釀絕芳醇。鶯花舊識非生客。山水曾遊是故人。遨樂無時冠巴蜀。語音漸正帶咸秦。平生賸有尋梅債。作意城南看小春。

赴成都泛舟自三泉至益昌謀以明年下三峽

詩酒清狂二十年。又摩病眼看西川。心如老驥常千里。身似春蠶已再眠。暮雪烏奴停醉帽。秋風白帝放歸船。飄零自是關天命。錯被人呼作地仙。

雪晴行益昌道中頗有春意

杜陵雁下歲將殘。疋馬西遊雪擁關。顛顛敢忘雙闕路。淹遲遍看兩川山。春回柳眼梅鬢裏。愁在鞭絲帽影間。安得黃金成大藥。爲人千載駐顏顏。

綿州魏成縣驛有羅江東詩云芳草有情皆礙馬好雲無處不遮樓戲用其韻

老夫槩興忽西遊。遠跨秦吳萬里秋。尊酒登臨遍山寺。歌辭散落滿江樓。孤城木葉蕭蕭下。古驛灘聲漲漲流。未許詩人誇此地。茂林脩竹憶吾州。

晚春書懷

老客天涯心尙孩。惜春直欲挽春回。長繩縱繫斜陽住。右手難移故國來。暑近蚊雷先隱鱗。雨前蠧埽正崔嵬。茹芝卻粒終無術。萬事惟須付一盃。

晚登望雲

一出修門又十年，輩流多已珥金蟬。衰如蠹葉秋先覺，愁似鰥魚夜不眠。輦路疎槐迎駕處，苑城殘日泛湖天。君恩未報身今老，徒倚危樓一泫然。

醉中感懷

早歲君王記姓名，只今顛顛客邊城。青衫猶是鷓鴣行，白髮新從劍外生。古戍旌旗秋慘淡，高城刁斗夜分明。壯心未許全消盡，醉聽檀槽出塞聲。

晚雨

蕭瑟度橫塘，霏微映繚牆。壓低塵不動，灑急土生香。聲入楸梧碎，清分枕簟涼。回頭忽陳迹，簷角挂斜陽。

社日

百穀登場酒滿卮，神林簫鼓晚清悲。蟬依疎柳長言處，燕委空巢大去時。幼學已忘那用忌，鄉俗小兒女社日忌微聾自樂不須醫。古謂社酒治聾傷心故里雞豚集，父老逢迎正見思。

寒夜遣懷

臨觴本不飲，憂多自成醉。四方行萬里，不見埋髮地。憶昔入京都，寶馬搖香鬢。酣飲青樓夜，歌聲在半空。去日不可挽，華髮忽垂領。娟娟峨眉月，相對作淒冷。月落照空床，不寐聽寒蠶。早知憂隨人，何用去故鄉。

登樓

從來好境遍人間，無奈勞生自欠閒。  
江近時時吹白雨，樓高面面看青山。  
歌聲哀怨傳三峽，行色淒涼帶百蠻。  
嘉陽近流落愛君心未已，夢魂猶綴紫宸班。

西園

半掩朱門蘚徑斜，翠屏繡谷忽谿斜。  
高高下下天成景，密密疎疎自在花。  
江近夕陽迎宿鷺，林昏殘角促歸鴉。  
吾舟已繫津南岸，喚客猶能一笑譁。

得韓无咎書寄使虜時宴東都驛中所作小闋

大梁二月杏花開，錦衣公子乘傳來。  
桐陰滿地掃不得，金轡玲瓏上源驛。  
上源驛中搥畫鼓，漢使作客胡作主。  
舞女不記宣和粧，廬兒盡能女直語。  
書來寄我宴時詩，歸鬢知添幾縷絲。  
有志未須深感慨，築城會據拂雲祠。  
唐中受降城·在拂雲祠。

曉坐

低枕孤衾夜氣存，披衣起坐默忘言。  
餅花力盡無風墮，爐火灰深到曉溫。  
空橐時時聞鼠齧，小窗一一送鴉翻。  
悠然忽記幽居日，下榻先開水際門。

十二月初一日得梅一枝絕奇戲作長句今年於是四賦此花矣

高標已壓萬花羣，尚恐嬌春習氣存。月兔擣霜供換骨，湘娥鼓瑟爲招魂。孤城小驛初飛雪，斷角殘鐘半掩門。盡意端相終有恨，夜寒皴玉倩誰溫。

快晴

地闊天門斗柄回，今朝紅日遍池臺。新陽蘇醒春前柳，輕暖醫治雪後梅。瓦屋螺青披霧出，錦江鴨綠抱山來。衰翁也逐兒童喜，旋撥文書近酒盃。

春愁曲客話成都戲作

慮義至今三十餘萬歲，春愁歲歲常相似。外大瀛海環九洲，無有一洲無此愁。我願無愁但歡樂，朱顏綠鬢常如昨。金丹九轉徒可聞，玉兔千年空擣藥。蜀姬雙鬟姹媠嬌，醉看恐是海棠妖。世間無處無愁到，底事難過萬里橋。

遊修覺寺

上盡蒼崖百級梯，詩囊香椀手親攜。山從飛鳥行邊出，天向平蕪盡處低。花落忽驚春事晚，樓高剗覺客魂迷。興闌掃榻禪房臥，清夢還應到剡溪。

雨後集湖上

野水交流自滿畦，芳池新漲恰平堤。花藏密葉多時在，鶻占高枝盡日啼。繡袂寶裙催結束，金樽翠杓共

提攜白頭自喜能狂在笑壁蠻牋落醉題

慈雲院東閣小憩

橫閣院東偏。儵然拂榻眠。香濃煙穗直。茶嫩乳花圓。巖倚團團桂。筒分細細泉。憑誰爲題版。勝作小壺天。

病後暑雨書懷

髮毛蕭颯疾初平。雲物輪囷氣未清。水漲小亭無路到。雨多幽草上牆生。窗昏頓減讎書課。屋老時聞墮瓦聲。止酒亡聊還自笑。少年豪飲似長鯨。

怡齋

東湖仲夏草樹荒。屋古無人亭午涼。萱房微呀不見日。笱籟自解時吹香。野藤蟠屈入窗罅。溼菌扶疎生屋梁。跨溝數椽最幽翳。漲水及檻雨敗牆。靜涵青蘋舞藻荇。閒立白鷺浮鴛鴦。芙蓉雖瘦亦瀾漫。照眼翠蓋遮紅粧。水紋珍簾欲卷卻。團團素扇嬾復將。天風忽送塔鈴語。喚覺清夢遊瀟湘。

寓驛舍予三至成都。皆館于是。

閒坊古驛掩朱扉。又憩空堂綻客衣。九萬里中鯤自化。一千年外鶴仍歸。逸庭數竹饒新筍。解帶量松長舊圍。惟有壁間詩句在。暗塵殘墨兩依依。

宴西樓

西樓遺迹尚豪雄。錦繡笙簫在半空。萬里因循成久客。一年容易又秋風。燭光低映珠簾麗。酒暈徐添玉頰紅。歸路迎涼更堪愛。摩訶池上月方中。

一年容易又秋風。燭光低映珠簾麗。酒暈徐添玉頰紅。

江濱池醉歸馬上作

久住西州似宿緣。笙歌叢裏著華顛。每嗟相見多生客。卻憶初來尙少年。迎馬綠楊爭拂帽。滿街丹荔不論錢。浮生何處非羈旅。休問東吳萬里船。

醉書

似閒有俸錢。似仕無簿書。似長免事仕。似屬非走趨。病能加餐飯。老與酒不疎。婆婆東湖上。幽曠足自娛。時時喚客醉。小閣臨紅蕖。釣魚斫銀絲。壁荔見玉膚。檀槽列四十。遺聲傳故都。豈惟豪兩川。自足誇東吳。但恨詩不進。榛荒失耘耔。何當掃纖艷。傑作追黃初。

東園晚步

久客天涯憶故園。強名官寺只衡門。秋桐蠹遍無全葉。古柳吹斜出半根。痛飲每思尊酒窄。微官空羨布衣尊。何時定下三巴去。思臥孤舟聽斷猿。

太平花。花出劍南。似桃四。出千百包。駢萃成朵。天聖中。獻至京師。仁宗賜名太平花。

扶牀踉蹌出京華。頭白車書未一家。宵旰至今勞聖主。淚痕空對太平花。



秋色

一段淒涼傍酒盃。中年剩作楚囚哀。迢迢似伴明河出。慘慘如隨落照來。客路半生常淚眼。鄉關萬里更危臺。蓼汀荻浦江南岸。自入秋來夢幾回。

秋聲

蕭瑟拂樹過中庭。何處人間有此聲。漲水雨餘晨放閘。騎兵戰罷夜還營。閒憑曲几聽雖久。彌撫哀弦寫不成。暑退涼生君勿喜。一年光景又崢嶸。

龍眠畫馬

國家一從失西陲。年年買馬西南夷。瘴鄉所產非權奇。邊頭歲入幾番一作數。皮。崔嵬瘦骨帶火印。離立欲不禁風吹。圉人太僕空列位。龍媒汗血來何時。李公太平官京師。立仗慣見渥洼姿。斷縑歲久墨色暗。逸氣尙若不可羈。賞奇好古自一癖。感事憂國空餘悲。嗚呼。安得毛骨若此三千疋。銜枚夜度桑乾磧。

秋夜池上作

短髮鸚鵡病骨輕。臨池閒看露荷傾。月明何與浮雲事。正向圓時故故生。

夜食炒栗有感。舍漏待朝。朝士往往食此。

齒根浮動歎吾衰。山栗炮燂療夜飢。喚起少年京輦夢。和寧門外早朝時。

晚登橫溪關

樓鼓聲中日又斜。憑高愈覺在天涯。空桑客土生秋草。野渡虛舟集晚鴉。瘴霧不開連六詔。俚歌相答帶三巴。故鄉可望應添淚。莫恨雲山萬疊遮。

榮嶠坡頭筇竹枝。西臨村路立多時。賣蔬近市還家早。煮井人忙下麥遲。榮多鹽井。秋冬收薪茅最急。怯酒山城老景盡。供詩晚來試問愁多少。只許高樓橫笛吹。病客情懷常

自唐安徙家來和義出城迎之馬上作

身如林下僧。處處常寄包。家如梁上燕。歲歲旋作巢。豈惟人所憐。顧影每自嘲。眼看佳山水。不得結把茅。造物困豪傑。如視餓虎哮。要令出精神。感激使叫喚。頗思投筆去。走馬盤雲旂。三更冒急雪。大戰梁楚郊。

花時遍遊諸家園

看花南陌復東阡。曉露初乾日正妍。走馬碧雞坊裏去。市人喚作海棠顛。爲愛名花抵死狂。只愁風日損紅芳。綠章夜奏通明殿。乞借春陰護海棠。翩翩馬上帽簷斜。盡日尋春不到家。偏愛張園好風景。半天高柳臥溪花。花陰掃地置清尊。爛醉歸時夜已分。欲睡未成欹倦枕。輪囷帳底見紅雲。宣華無樹著啼鶯。惟有摩訶春水生。故老能言當日事。直將宮錦裏宮城。

絲絲紅萼弄春柔，不似疎梅只慣愁。常恐夜寒花索窹，錦茵銀燭按涼州。

春寒連日不出

海棠花入燕泥乾，梅子枝頭已帶酸。老去嬾尋年少夢，春分不減社前寒。著書敢望垂千載，嗜酒猶須隱一官。正是閒時無客過，小庭斜日倚闌干。

馬上偶成

城南城北紫遊韁，盡日閒行看似忙。刺水離離葛葉短，連村漠漠豆花香。夕陽有信催殘角，春草無情上繚牆。我亦人間倦遊者，長吟聊復愴興亡。

夜宴

酒浪搖春不受寒，燭花垂燼忽堆盤。山川路邈人將老，絲管聲逾夜向闌。四海交朋更聚散，百年光景雜悲歡。自憐病眼猶明在，更把名花半醉春。是夕得范希元家·晚海棠數枝·繁麗一城所無。

錦亭

天公爲我齒頰計，遣餼黃甘與舟荔。又憐狂眼老更狂，令看廣陵芍藥蜀海棠。周行萬里逐所樂，天公於我元不薄。貴人不出長安城，寶帶華纓眞汝縛。樂哉今從石湖公，大度不計鬻丞蠶。夜宴新亭海棠底，紅雲倒吸玻璃鍾。琵琶弦繁腰鼓急，盤鳳舞衫香霧溼。春醪凸盞燭光搖，素月中天花影立。遊人如雲環玉

帳詩未落紙先傳唱。此邦句律方一新。鳳閣舍人今有樣。

雨

映空初作繭絲微。掠地俄成箭鏃飛。紙帳光遲饒曉夢。銅鑪香潤覆春衣。池魚鱗鱗隨溝出。梁燕翩翩接翅歸。惟有落花吹不去。數枝紅溼自相依。

春殘

石鏡山前送落暉。春殘回首倍依依。時平壯士無功老。鄉遠征人有夢歸。苜蓿苗侵官道合。蕪菁花入麥畦稀。倦游自笑摧頹甚。誰記飛鷹醉打圍。

小飲房園

宦遊到處卽忘家。況得閒身管物華。疎索故人緣病酒。折除厚祿爲看花。泥新高棟初巢燕。萍匝荒池已集蛙。斟酌人生要行樂。燈前起舞落烏紗。

卜居

歷盡人間行路難。老來要覓數年間。供家米少內添鶴。買宅錢多爲見山。池面紋生風細細。花根土潤雨斑斑。借春乞火依鄰里。剩釀村醪約往還。

小疾謝客

小疾深居不喚醫。消搖更覺勝平時。癡人未害看周易。名士真須讀楚辭。綠徑風斜花片片。畫廊人靜雨絲絲。晚來頓覺清羸甚。自置篝爐煮養糜。

### 過野人家有感

縱轡江臯送夕暉。誰家井臼映荆扉。隔離犬吠窺人過。滿箔蠶飢待葉歸。吳人直謂桑曰葉。世態十年看爛熟。家山萬里夢依稀。躬耕本是英雄事。老死南陽未必非。

### 閒中偶題

楚澤巴山歲歲忙。今年睡足向禪房。只知閒味如茶永。不放羈愁似草長。架上漢書那復看。牀頭周易亦相忘。客來拈起清談麈。且破西窗半篆香。久矣雲衢斂羽翰。退飛更覺一枝安。七千里外新聞客。十五年前舊史官。花底清歌春載酒。江邊明月夜投竿。癡頑直爲多更事。莫怪胸懷抵死寬。

### 晚過五門

五門路。四月乳鴉啼綠樹。閒遊但喜日初長。薄暑始知春已去。樓頭風高舞雙旗。畫角聲中日還暮。馬蹄特特無斷時。老盡行人路如故。

### 月下醉題

黃鶻飛鳴未免飢。此身自笑欲何之。閉門種菜英雄老。彈鋏思魚富貴遲。生擬入山隨李廣。死當穿冢近要離。一樽彊醉南樓月。感慨長吟恐過悲。

和范待制秋興

策策桐飄已半空。啼螿漸覺近房櫳。一生不作牛衣泣。萬事從渠馬耳風。名姓已甘黃紙外。光陰全付綠尊中。門前剝啄誰相覓。賀我今年號放翁。睡臉餘痕印枕紋。秋衾微潤覆爐薰。井桐搖落先霜盡。衣杵淒涼帶月聞。佛屋沙燈明小像。經奩魚蠹蝕眞文。身如病驥惟思臥。誰許能空萬馬羣。

春愁

春愁茫茫塞天地。我行未到愁先至。滿眼如雲忽復生。尋人似瘧何由避。客來勸我飛觥籌。我笑謂客君罷休。醉自醉倒愁自愁。愁與酒如風馬牛。

關山月

和我詔下十五年。將軍不戰空臨邊。朱門沉沉按歌舞。廐馬肥死弓斷弦。戍樓刁斗催落月。三十從軍今白髮。笛裏誰知壯士心。沙頭空照征人骨。中原干戈古亦聞。豈有逆胡傳子孫。遺民忍死望恢復。幾處今宵垂淚痕。

和范舍人書懷

歲月如犇不可遮。卽今楊柳已藏鴉。客中常欠尊中酒。馬上時看檐上花。末路淒涼老巴蜀。少年豪舉動京華。天魔久矣先成佛。多病維摩尙在家。

幽居

殊方飄泊向誰論。小住僧廬亦所欣。得飽罷揮求米帖。愛眠新著毀茶文。摘蔬籃小露清露。斲藥鉏輕帶溼雲。從此生涯足幽事。宦遊虛用半生勤。

浣溪女一作浣花女

江頭女兒雙鬢丫。常隨阿母供桑麻。當戶夜織聲啞啞。地爐豆豉煎土茶。長成嫁與東西家。柴門相對不上車。青裙竹笥何所嗟。插髻燂燂牽牛花。城中妖姝臉如霞。爭嫁官人慕高華。青驪一出天之涯。年年傷春抱琵琶。

悲秋

一拋箴笠雪溪舟。八載涼州復益州。纔破繁華海棠夢。又驚搖落井梧秋。曉班無復趨行殿。晚境惟思老寢丘。病肺經旬疎酒盞。愁來惟是上南樓。

雨中山行至松風亭忽澄霽

煙雨千峯擁髻鬟。忽看青嶂白雲間。卷藏破墨營丘筆。卻展將軍著色山。

秋興

成都城中秋夜長。燈籠蠟紙明空堂。高梧月白繞飛鵲。衰草露溼啼寒螿。堂上書生讀書罷。欲眠未眠偏斷腸。起行百匝幾歎息。一夕綠髮成秋霜。中原日月用胡曆。幽州老酋著柘黃。滎河溫洛底處所。可使長作旃裘鄉。百金戰袍鷓鴣盤。三尺劍鋒霜雪寒。一朝出塞君試看。且發寶雞莫長安。

暇日行城上同行追不及

疾步登城殊未衰。欣然一笑擲筇枝。正當閒似白鷗處。不減健如黃犢時。秋野煙雲橫慘淡。莫天樓閣倚參差。高吟醉舞忘歸去。乞與丹青畫怪奇。

江樓醉中作

淋漓百榼宴江樓。秉燭揮毫氣尚遒。天上但聞星主酒。人間寧有地埋憂。生希李廣名飛將。死慕劉伶贈醉侯。戲語佳人頻一笑。錦城已是六年留。退之詩云。越女一笑三年留。

曳策遊房園作

慈竹蕭森拱廢臺。醉歸曳策一徘徊。紛紛落日牛羊下。黯黯長空襍雪來。三峽猿催清淚落。兩京梅傍戰塵開。客懷已是淒涼甚。更聽城頭畫角哀。



謁漢昭烈惠陵及諸葛公祠宇

雨止風益豪。雪作雲不動。淒涼漢陵廟。衰草臥翁仲。畫妓空笙竽。土馬闕羈鞚。壤沃黃犢耕。柏密幽鳥哢。  
尚想忠武公。身任社稷重。整整渭上營。氣已無岐雍。少須天意定。破賊寧患衆。興亡信有數。星隕事可痛。  
陵邊四五家。茆竹居接棟。手鞞紙上箔。居民皆以造紙爲業。醅熟酒鳴甕。雖嗟生理微。亦足道飢凍。劉葛固雄傑。  
閱世均一夢。論高常近迂。才大本難用。九原不可作。再拜臨風慟。

遠遊

遠遊行復歲華新。嬾學劉郎問大鈞。一點不蒙稽古力。十分合作臥雲身。苦寒與酒頓增價。小雨爲梅先  
辟塵。擬佩一壺江路去。花邊醉墮白綸巾。

簡譚德稱

幼輿骨相稱山巖。自要閒遊不避讒。錦里先生爲老伴。玉霄散吏是頭銜。探春苑路花簪帽。看月江樓酒  
滿衫。惟恨題詩無逸氣。媿君陣馬與風颿。

閒意

柴門雖設不曾開。爲怕人行損綠苔。妍日漸催春意動。好風時捲市聲來。學經妻問生疎字。管酒兒斟澁  
盞盃。安得小園寬半畝。黃梅綠李一時栽。

南定樓遇急雨

行遍梁州到益州。今年又作度瀟遊。江山重複爭供眼。風雨縱橫亂入樓。人語朱離逢峒獠。棹歌欸乃下吳舟。天涯住穩歸心嬾。登覽茫然卻欲愁。

漁翁

江頭漁家結茆廬。青山當門畫不如。江煙淡淡雨疎疎。老翁破浪行捕魚。恨渠生來不讀書。江山如此一句無。我亦衰遲慙筆力。共對江山三歎息。

龍興寺吊少陵先生寓居

中原艸艸失承平。戍火胡塵到兩京。扈蹕老臣身萬里。天寒來此聽江聲。以少陵詩考之。蓋以秋冬間。寓此州也。寺門闌江壯甚。

楚城

江上荒城猿鳥悲。隔江便是屈原祠。一千五百年間事。只有灘聲似舊時。

出遊

萬里崎嶇蜀道歸。荊州非復壯遊時。行吟自怪詩情減。坐睡人驚酒量衰。卷地風號雲夢澤。黏天艸映伏波祠。一枝藤杖平生事。擊鼓開帆未恨遲。

初發荊州

淋漓牛酒起檣竿，健艣飛如插羽翰。  
破浪乘風千里快，開頭擊鼓萬人看。  
鵲聲不斷朝陽出，旗腳微舒宿雨乾。  
堪笑塵埃洛陽客，素衣如墨據征鞍。

泊公安縣

秦關蜀道何遼哉，公安渡頭今始回。  
無窮江水與天接，不斷海風吹月來。  
船窗簾捲螢火鬧，沙渚露下蘋花開。  
少年許國忽衰老，心折柁樓長一作笛哀。

舟中偶書

老子西遊萬里回，江行長夏亦佳哉。  
晝眠初起報茶熟，宿酒半醒聞雨來。  
漢口船開催疊鼓，淮南帆落亞高桅。  
四方本是丈夫事，白首自憐心未灰。

舟行蘄黃間雨霽得便風有感

天青雲白十分晴，帆飽舟輕盡日行。  
江底魚龍貪晝睡，淮南艸木借秋聲。  
好山縹緲何由住，華髮蕭條只自驚。  
莫怪時人笑疎懶，宦情元不似詩清。

六月十四日宿東林寺

看盡江湖千萬峯，不嫌雲夢芥吾胸。  
戲招西塞山前月，來聽東林寺裏鐘。  
遠客豈知今再到，老僧能記昔

相逢虛窗熟睡誰驚覺。野碓無人夜自舂。

登賞心亭

蜀棧秦關歲月逾。今年乘興卻東遊。全家穩下黃牛峽。半醉來尋白鷺洲。黯黯江雲瓜步雨。蕭蕭木葉石城秋。孤臣老抱憂時意。欲請遷都涕已流。

將至京口

臥聽金山古寺鐘。三巴昨夢已成空。船頭坎坎回帆鼓。旗尾舒舒下水風。城角危樓晴靄碧。林間雙塔夕陽紅。銅瓶愁汲中瀟水。不見茶山九十翁。頃在京口。嘗取中瀟水。寄曾文清公。

沂谿

射的峯前禹廟東。短篷三扇臥衰翁。閒攜清聖濁賢酒。重試朝南暮北風。水落痕留紅蓼節。雨來聲滿綠蒲叢。衝煙莫作匆匆去。擬看溪丁下釣筒。

歸雲門

萬里歸來值歲豐。解裝鄉墅樂無窮。飯炊飽雨湖菱紫。篋絡迎霜野柿紅。壞壁塵埃尋醉墨。孤燈餅餌對鄰翁。微官行矣闕山去。又寄千巖夢想中。

題齋壁

嘗得湖邊屋數椽，  
茆齋低小竹窗妍。  
墟煙寂歷歸村路，  
山色蒼寒釀雪天。  
性懶杯盤常偶爾，  
地偏雞犬亦翛然。  
早知栗里多幽事，  
虛走人間四十年。

吾廬

吾廬雖小亦佳哉，  
新作柴門斷綠苔。  
拄杖每闌歸鶴入，  
釣船時帶夕陽來。  
墟煙隔水霏霏合，  
籬菊凌霜續續開。  
千里安期那可得，  
笑呼鄰父共傳杯。

自雲門之陶山，  
肩輿者失道行亂山中。  
有茅舍小塘極幽邃，  
求見主人不可意其隱者也。

陂池幽處有茅堂，  
井臼蕭條草樹荒。  
小鴨怯波時聚散，  
病蔬傷蠹半青黃。  
兒童衝雨收魚網，  
婢子聞鐘上佛香。  
我亦暮年思屏跡，  
數椽何計得連牆。

冬夜聽雨戲作

少年交友盡豪英，  
妙理時時得細評。  
老去同參惟夜雨，  
焚香臥聽盡簷聲。  
遠簷點滴如琴筑，  
支枕幽齋聽始奇。  
憶在錦城歌吹海，  
七年夜雨不曾知。

梅花絕句

濯錦江邊憶舊遊，  
纏頭百萬醉青樓。  
如今莫索梅花笑，  
古驛燈前各自愁。

蜀王小苑舊池臺，  
江北江南萬樹梅。  
只怪朝來歌吹鬧，  
園官已報五分開。

成都合江園。蓋故蜀別苑。梅盛。自初開監官日報府。

·報至開五分·則府主  
來晏·遊人亦競集·

探春歲歲在天涯，醉裏題詩字半斜。  
今日谿頭還小飲，冷官不禁看梅花。  
池館登臨雪半消，梅花與我兩無聊。  
青羊宮裏應如舊，腸斷春風萬里橋。

客思

裘馬平生喜遠遊，莫年顛顛向南州。  
文書與睡中分日，衰病和愁總怕秋。  
無復雪郊看射虎，但思煙浦聽呼牛。  
還家誰道無餘俸，倒橐猶堪買釣舟。

初秋夢故山覺而有作

昔我東歸時，父老迎船頭。  
開篷相勞苦，怪我領雪稠。  
故山何負君，且作數月留。  
豈知席未煖，疋馬來南州。  
蠻花四時紅，瘴霧日夜浮。  
歸哉不可遲，勿與婦子謀。

杜宇真吾交，勸去恨不速。  
忠告輸肝肺，厚意均骨肉。  
陋哉鷓鴣語，揣我貧念祿。  
竹雞更鄙淺，泥淖憂車軸。  
秋風嚴灑清，春雨戴溪綠。  
行矣勿復疑，照影巾一幅。

追感梁益舊遊有作

西遊萬里倚朱顏，肯放尊前一笑慳。  
蜀苑妓圍欺夜雪，梁州獵火滿秋山。  
晚途忽墮塵埃裏，樂事渾疑夢寐間。  
浮世變遷君勿歎，劇談猶足詫鄉關。

聞雁

過盡梅花把酒稀。薰籠香冷換春衣。秦關漢苑無消息。又在江南送雁歸。

登擬峴臺

層臺縹緲壓城闌。倚杖來觀浩蕩春。放盡尊前千里目。洗空衣上十年塵。縈迴水抱中和氣。平遠山如醜籍人。更喜機心無復在。沙邊鷗鷺亦相親。

雨中遣懷

病中草草度年華。睡起惺惺日易斜。抵死愁禁千斛酒。薄情雨送一城花。鏡湖煙水搖朱舫。錦里香塵走鈿車。此夢卽今都打破。不妨寂寞住天涯。

三月二十一日作

馬年三月廿五日天寒作之刊表

蹴踘牆東一市譁。鞦韆樓外兩旗斜。及時小雨放桐葉。無賴餘寒開楝花。明月吹笙思蜀苑。軟塵騎馬夢京華。懽情減盡朱顏改。節物催人只自嗟。

五月十一日夜且半。夢從大駕親征。盡復漢唐故地。見城邑人物繁麗。云西涼府也。喜甚。馬上作長句。未終篇而覺。乃足成之。

天寶胡兵陷兩京。北庭安西無漢營。五百年間置不問。聖主下詔初親征。熊羆百萬從鸞駕。故地不勞傳

檄下築城絕塞進新圖。排仗行宮宣大赦。岡巒極目漢山川。文書初用淳熙年。駕前六軍錯錦繡。秋風鼓角聲滿天。首藉峯前盡亭障。平安火在交河上。涼州女兒滿高樓。梳頭已學京都樣。

長歌行

燕燕尾涎涎。橫穿乞巧樓。低入吹笙院。鴨鴨背喙喙。朝浮杜若洲。暮宿蘆花夾。嗟爾自適天地間。將儔命侶意甚閒。我今獨何爲。一笑乃爾慳。世上悲歡亦偶然。何時爛醉錦江邊。人歸華表三千歲。春入箜篌十四絃。

送客城西

倦客憑鞍半醉醒。秋光滿眼歎頽齡。月斜野渡放船小。風急漁村攤網腥。客思不堪聞斷雁。詩情彊半在郵亭。歸來更恨城笳咽。烟火昏昏獨掩屏。

休日

賜休暫許養衰殘。靜院翛然晝掩關。釀酒移花調護悶。弄琴洗硯破除閒。與人多忤讒消骨。報國無功愧滿顏。一寸歸心向誰說。小屏依約剡中山。

新釀熟小酌索笑亭

新酒黃如脫殼鵝。小園持盞暫婆娑。文章不進技止此。仕宦忘歸人謂何。宿業簿書昏病眼。夢遊煙雨溼



漁簑醉中笑向兒童說。白髮今年添幾多。

豐城高安之間憩民家景趣幽邃爲之慨然懷歸

數家聚雲根。細路入叢薄。濺濺石渠水。來往一略約。有無鄰里通。笑語婦子樂。濁醪時相就。青蔬缺鹽酪。日暮歸閉門。續火星煜燠。先期畢租稅。老不入城郭。嗟予獨何事。早插紅塵脚。故山未成歸。悵望有餘恻。

北窗

九陌黃塵早暮忙。幽人自愛北窗涼。清吟微變舊詩律。細字閒鈔新酒方。艸木扶疎春已去。琴書蕭散日初長。破羌臨罷楮頤久。又破銅匱半篆香。

西村醉歸

俠氣嶢嶢蓋九州。一生常恥爲身謀。酒寧剩欠尋常債。劍不虛施細碎讎。見孟東野詩。岐路凋零白羽箭。風霜破弊黑貂裘。陽狂自是英豪事。村市歸來醉跨牛。

醉中登避俗臺

半醉行歌上古臺。脫巾散髮謝氛埃。但知禮豈爲我設。莫管客從何處來。剡曲煙波菱蔓滑。耶溪風露藕花開。老來世事渾成嬾。一櫂幽尋未擬回。

病中夜興

病瘧秋來久未平。艸堂遙夜不勝清。疾風遞響驚林葉。列宿收芒避月明。百計不能逃白髮。一生堪笑役虛名。釣車且作桐江夢。莫念安西萬里行。

霜天晚興

薄霜門巷不勝清。小立湖邊夕照明。紅顆帶芒收晚稻。綠苞和葉摘新橙。閒評琴價留僧話。靜聽松聲領鶴行。壯志消磨渾欲盡。西風莫動玉關情。

杜門

寂寞山深處。崢嶸歲暮時。燒灰除菜蝗。讀如橫字去聲。送芋謝牛醫。算水晨澆藥。燈窗夜覆棋。杜門君勿怪。遲

春少新知。

忽忽

忽忽復悠悠。頻驚歲月遒。若無船貯酒。將奈斛量愁。列炬燕宮夜。成都故蜀時燕王宮。今屬張氏。海棠爲一城之冠。呼鷹漢廟

秋。南鄉漢高帝廟。予從戎時。多獵其下。凋年莫多感。夢境付滄洲。

冬夜不寐至四鼓起作此詩

秦吳萬里車轍遍。重到故鄉如隔生。歲晚酒邊身老大。夜闌枕畔書縱橫。殘燈無焰穴鼠出。槁葉有聲村犬行。八十將軍能滅虜。白頭吾欲事功名。高麗有識云。當有八十老將平之。李英公實勝是識。

蔬圃

山翁老學圃，自笑一何愚。磽瘠財三畝，勤劬賴兩奴。正方畦畫局，微潤土融酥。剪闢荆榛盡，鉏犂磊塊無。過溝橫略約，聚甃起浮屠。拾園中瓦礫作小塔。隙地成瓜援，餘功及芋區。如絲細生菜，似鴨爛蒸壺。此事今真辦，東歸不爲鱸。

累日無酒亦不肉食戲作此詩

小築精廬剝曲傍，枵然蟬腹與龜腸。酒錢覓處無司業，齋日多來似太常。雲確旋舂菰米滑，風爐親候藥苗香。明年更入南山去，要試囊中服玉方。

陶山遇雪覺林遷菴主見招不果往

山中大雪二尺彊，道邊虎迹如椀大。衰翁畏虎復畏寒，招喚不來公勿怪。梨花開時好風日，走馬尋公作寒食。不須沽酒飲陶潛，箭筈蕨芽如蜜甜。

夏夜舟中聞水鳥聲甚哀若曰姑惡感而作詩

女生藏深閨，未省窺牆藩。上車移所天，父母爲它門。妾身雖甚愚，亦知君姑尊。下牀頭雞鳴，梳髻著襦裙。堂上奉灑掃，廚中具盤飧。青青摘葵萹，恨不美熊蹯。姑色少不怡，衣袂溼淚痕。所冀妾生男，庶幾姑弄孫。此志竟蹉跎，薄命來讒言。放棄不敢怨，所悲孤大恩。古路傍陂澤，微雨鬼火昏。君聽姑惡聲，無乃遣婦魂。

雨夜

急雨如河瀉瓦溝。空堂臥對一燈幽。老雞多事彊知曉。落葉無情先報秋。身未蓋棺誰可料。尊常有酒莫閒愁。功名老大從來事。且復長歌起飯牛。

鄰曲小飲

早稻喜登場。相呼集野堂。迎霜新兔美。近社濁醪香。菲屋滴殘雨。竹籬圍夕陽。新豐不須作。真箇是吾鄉。

題酒家壁

不才作主喜多病。故人殊情疾之甚。怪於解

明主何曾棄不才。書生飄泊自堪哀。煙波東盡江湖遠。雲棧西從隴蜀回。宿雨送寒秋欲晚。積衰成病老初來。酒香菰脆丹楓岸。強遣樽前笑口開。

春林病此付正翻云去

幽居書事

莫嘆人間苦不諧。清時有味是歸來。已因積毀成高臥。更借陽狂護散才。正欲清言聞客至。偶思小飲報花開。紛紛爭奪成何事。白骨生苔但可哀。

事向何處少。清夜何處動。春初二至

紹興中與陳魯山王季夷從兄仲高以重九日同遊禹廟後三十餘年自三橋泛舟歸山居秋

高雨霽望禹廟樓殿重複光景宛如當時而三人者皆下世予亦衰病無聊慨然作此詩

重樓傑閣倚虛空。紅日蒼煙正鬱葱。鄉國歸來渾似鶴。交朋零落不成龍。人生真與夢何校。我輩故應情

所鍾。淚漬清詩卻回棹。不眠一夜聽鳴蛩。

過村店有感

細篔絡丹柿。枯籬懸碧花。炊煙生旅竈。野水漱寒沙。棲鳥爭投樹。歸牛自識家。恍然遊蜀路。搔首憶天涯。

骨相

骨相元知薄。功名敢自期。病侵彊健日。閒過聖明時。形勝輪臺地。飛騰瀚海師。江湖雖萬里。猶擬掇聲詩。

薏苡蜀人謂其實爲薏米。唐安所出尤奇。

初遊唐安飯薏米。炊成不減雕胡美。大如芡實白如玉。滑欲流匙香滿屋。腹腴項鬪不入盤。況復殮酪誇甘酸。東歸思之未易得。每以問人人不識。嗚呼奇材從古棄。艸菅君試求之離落間。

鄉人或病予詩多道蜀中遊樂之盛。適春日遊鏡湖。共請賦山陰風物。遂卽杯酒間作絕句。當持以誇西州故人也。

病中  
嬾日輕雲淡。拖天撲燈過。後賣花前。便從水閣杭湖去。捲起朱簾上畫船。  
舫子窗扉面面開。金壺桃杏間尊罍。東風忽送笙歌近。一片樓臺泛水來。

風雨暗江天。幽窗起復眠。忍窮安晚境。留病壓災年。客助脩琴料。僧分買藥錢。餘生均逆旅。未死且陶然。

初夏游凌氏小園

水滿池塘葉滿枝。曲廊危榭愜幽期。風和海燕分泥處。日永吳蠶上簇時。閒理阮咸尋舊譜。細傾白墮賦新詩。從來夏淺勝春日。兒女紛紛豈得知。度信詩云·夏淺卻勝春·鏡湖遊人·至立夏而止·

賽神曲

叢祠千載臨江渚。拜祝今年那可數。須晴得晴雨得雨。人意所向神輒許。嘉禾九穗持上府。廟前女巫巫遞歌舞。嗚嗚歌謳坎坎鼓。香煙成雲神降語。大餅如粢牲腍肥。再拜獻神神不違。晚來人醉相扶歸。蟬聲滿廟鎖斜暉。

秋夜

老病龍鍾不入城。濁醪麤飯餞餘生。未霜村舍秋先冷。無月江邊夜自明。出塞雖慙平賊手。下帷聊喜讀書聲。山童睡熟青燈暗。自撥殘爐候藥鑪。

得所親廣州書

音信連年恨不聞。書來細讀卻消魂。人稀野店山魃語。路僻蠻村荔子繁。毒草自搖春寂寂。瘴雲不動晝昏昏。此生相見應無日。且置清愁近一樽。

西路日山店

日薄霜清十月天。馬蹄聲裏送流年。店當古路三叉處。山似孤雲兩角邊。孤雲兩角在漢中。淹泊自悲窮不醒。衰殘更覺病相纏。榆關瀚海知何在。目送飛鴻入暮煙。

冬夜與溥菴主說川食戲作

唐安薏米白如玉。漢嘉楫脯美勝肉。大巢初生蚕正浴。小巢漸老麥米熟。龍鶴作羹香出釜。木魚淪菹子盈腹。未論索餅與饋飯。最愛紅糟并煑粥。東來坐閱七寒暑。未嘗舉箸忘吾蜀。何時一飽與子同。更煎土茗浮甘菊。

野飲

青山千載老英雄。濁酒三盃失阨窮。訪古頽垣荒塹裏。覓交屠狗賣漿中。平堤漸放春蕪綠。細浪遙翻夕照紅。已把殘年付天地。騎牛吹笛伴村童。

春晚至山中因訪陳道人

一春衰病集殘骸。太息流塵覆酒杯。僧鉢始知葺菜老。佛瓶初見杏花開。蘋溪小雨成幽討。松院斜陽又獨來。不爲愛閒從野叟。年來萬事學低摧。

病起

山村病起帽圍寬。春盡江南尚薄寒。志士淒涼閒處老。名花零落雨中看。斷香漠漠便支枕。芳草離離悔

倚闌收拾吟牋停酒椀。年來觸事動憂端。

芒種後經旬無日不雨偶得長句

芒種初過雨及時。紗廚睡起角巾欹。癡雲不散常遮塔。野水無聲自入池。綠樹晚涼鳩語鬧。畫梁晝寂燕歸遲。閒身自喜渾無事。衣覆熏籠獨誦詩。

秋夜泊舟亭山下

逢水逢山到處留。可憐身世寄孤舟。一汀蘋露漁村晚。十里荷花野店秋。羽檄未聞傳塞外。金椎先報擊衙頭。聞虜酋行帳。爲壯士所攻。幾不爲衙頭。煌煌太白高千丈。那得功名取次休。

初秋山中作

萬里西風吹幅巾。卽今真箇是閒人。堆盤菱熟燕脂角。藉藻鱸新淡墨鱗。姥嶺蹇驢尋雪徑。娥江孤艇繫煙津。飄然樂事真當勉。遠付十年無此身。

臨安春雨初霽

世味年來薄似紗。誰令騎馬客京華。小樓一夜聽春雨。深巷明朝賣杏花。矮紙斜行閒作草。晴窗細乳戲分茶。素衣莫起風塵歎。猶及清明可到家。

飲張功父園戲題扇上



寒食清明數日。中西園春事又匆匆。梅花自避新桃李。不爲高樓一笛風。

聞傅氏莊紫笑花開急棹小舟觀之

日長無奈清愁處。醉裏來尋紫笑香。漫道閒人無一事。逢春也似蜜蜂忙。

鹹螿十韻

九月十月屋瓦霜。家人共畏畦蔬黃。小甕大甕盛滌濯。青菘綠韭謹蓄藏。天氣初寒手訣妙。吳鹽正白山泉香。挾書旁觀穉子喜。洗刀竭作廚人忙。闌丁無事臥曝日。棄葉狼籍堆空廊。泥爲緘封糠作火。守護不敢非時嘗。人生各自有貴賤。百花開時促高宴。劉伶病醒相如渴。長魚大肉何由薦。凍齋此際價千金。不數狐泉槐葉麪。摩挲便腹一欣然。作歌聊續冰壺傳。

遣興

莫羨朝回帶萬釘。吾曹要可草堂靈。風來弱柳搖官綠。雲破奇峰湧帝青。聽盡啼鶯春欲去。驚回夢蝶醉初醒。從教俗眼憎疎放。行矣桐江酌客星。

小憩村舍

藤梢維艇子。煙際覓人家。小婦簪新麥。羣童摘晚茶。溪雲易成雨。崖樹少開花。聊寄平生快。青鞵到若耶。

雨後

礎潤還成雨。雲收旋作晴。巖花分日發。林筍逐番生。筆硯行常具。軒窗晚更明。塵埃幸不到。那得廢詩情。

自上竈過陶山

宿雨初收見夕陽。縱橫流水入陂塘。蚕家忌客門門閉。茶戶供官處處忙。綠樹村邊停醉帽。紫藤架底倚胡牀。不因蕭散遺塵事。那覺人間白日長。

排悶

老去知心少。流塵鎖斷絃。尊空問字酒。囊罄作碑錢。掃葉供朝爨。和泥補漏船。胸中元浩浩。白眼望青天。

題齋壁

二十餘年此結茆。園公谿父日論交。風翻半浦亂荷背。雨放一林新笋梢。隔葉晚鶯啼谷口。啜花雛鴨聚塘坳。出門行罷還無事。借得丹經手自抄。

拜旦表

一封馳奏效嵩呼。清蹕何時返故都。只道建炎巡狩禮。誰知故事自祥符。

安流亭俟客不至獨坐成詠

憶昔西征鬢未霜。拾遺陳迹吊微茫。蜀江春水千帆落。禹廟空山百草香。馬影斜陽經劍閣。鶻聲清曉下瞿唐。酒徒雲散無消息。水榭憑欄淚數行。

歲晚書懷

早見龍翔上太清。

紹興末游官玉牒所。

卽今孤宦老山城。靈丹不解換凡骨。薄命枉教生太平。積雪樓臺增壯觀。

近春鳥雀有和聲。如山吏牘何時了。惆悵西窗晚照明。

雪中忽起從戎之興戲作

狐裘臥載錦駝車。酒醒冰髭結亂珠。三尺馬鞭裝白玉。雪中畫字草軍書。

鷺堂春夜

南樓統統下疎更。一點紗籠滿院明。映月疎梅入簾影。讀書穉子隔窗聲。呻吟藥裹身寧久。汛掃胡塵意未平。草檄北征今二紀。山城仍是老書生。游嘗爲丞相陳魯公。史樞相張魏公。草中原及西夏書檄於都堂。

東齋偶書

華髮蕭蕭不滿簪。強扶衰病著朝衫。寒廳靜似阿蘭若。佳客少于優鉢曇。詩酒放懷窮亦樂。文移肆罵老難堪。棄官若遂飄然計。不死揚州死劍南。顧況詩云。人生只合揚州死。而余嘗有歸蜀之意。

倚欄

閒岸紗巾小倚欄。吳中三月尚春寒。蜂脾蜜滿花初過。燕觜泥新雨未乾。老厭簿書思屏迹。病逢節物強追歡。一樽又動流年感。城上斜陽畫角殘。

晚春園中作

小逢春歸未解悲。千篇曾賦傷春詩。可堪霜點鬢髮後。更值綠暗園林時。楊花輕墮簷外影。杏子重壓闌邊枝。毬塲立馬漏聲靜。綺窗語燕簷陰移。向來春事渺何許。長空鳥跡何由追。鞦韆未拆已寂寞。日暮東風吹綵旗。

九月初郊行

九月吳中尚袂衣。江郊策馬踏斜暉。蕎花漫漫連山路。豆箠離離映版扉。蒼兔避鷹投磔去。黃鸝脫網傍人飛。農家光景關心事。不爲無才也合歸。

寄題朱元晦武夷精舍

先生結屋綠巖邊。讀易懸知屢絕編。不用采芝驚世俗。恐人謗道是神仙。蟬蛻巖間果是無。世人妄想可憐渠。有方爲子換凡骨。來讀晦菴新著書。身閒剩覺溪山好。心靜尤知日月長。天下蒼生未蘇息。憂公遂與世相忘。齊民本自樂衡門。水旱那知不自存。聖主憂勤常旰食。煩公一一報曾孫。山如嵩少三十六。水似邛邛九折途。我老正須閒處著。白雲一半肯分無。

秋郊有懷

檐頭買雙兔。市店取斗酒。還家婦北窗。歡言酌親友。家貧氣未餒。禮薄情更厚。高唵金石裂。健筆龍蛇走。酒闌起出門。孤月挂衰柳。大笑各散歸。吾輩可不朽。官身縛簡書。此樂寧復有。悵望秦稽雲。憑高一搔首。楚人固多孱。妄謂秋可悲。寧知河嶽間。氣俗樂此時。壯士鳴雕弓。健馬嚼枯萁。日馳三百里。榆關赴戰期。陣雲壓龍庭。殺氣搖參旗。熾火燎狐兔。倒瀉黃金卮。勒銘燕然石。千載鎮胡兒。安能空山裏。凍研哦清詩。秋山瘦益奇。秋水淺可涉。出城西風勁。拂帽吹脫葉。新霜拆栗罅。宿雨飽豆莢。枯柳無鳴蜩。寒花有穿蝶。郊行得幽曠。頗覺耳目愜。斷雲北山來。欣然與之接。挂冠易事爾。看鏡歎勛業。永懷桑乾河。夜渡擁馬鬣。

地僻

地僻天教養散材。流年況著鬢毛催。青山自繞孤城去。畫角常隨晚照來。几淨雙鈎摹古帖。甕香小啜試新醅。棗棧不是星躔遠。無奈先生興盡回。

冬夜聞角聲

孀孀清笳入雪雲。白頭老守臥中軍。自憐到老懷遺恨。不向居延塞外聞。憶在梁州夜雪深。落梅聲裏玉關心。山城老去功名忤。臥對寒燈淚滿襟。

荊州歌

楚江鱗鱗綠如釀。銜尾江邊繫朱舫。東征打鼓挂高帆。西上湯豬聯百丈。伏波古廟占好風。武昌白帝在

眼中倚樓女兒笑迎客。清歌未盡千觴空。沙頭巷陌三千家。煙雨冥冥開橘花。峽人住多楚人少。土鑄爭響茱萸茶。

芳草

蜀山遠處逢孤驛。斃頽垣芳草碧。家在江南妻子病。離鄉半歲無消息。長安城門西路去。細靄斜陽芳草暮。尊前一曲渭城歌。馬蹄萬里交河戍。人生誤計覓封侯。芳草愁人春復秋。只願東行至滄海。路窮草斷始無愁。

夢回

病骨便衾暖。羈懷怯夢回。鐘殘燈燼落。香冷雨聲來。老抱憂時志。狂非濟世材。明朝入冬假。燒兔薦新醅。到巖十五晦朔。郡釀不佳。求於都下。既不時至。欲借書讀之。而寓公多祕不肯出。無以度日。殊惘惘也。

桐君放隱兩經秋。小院孤燈夜夜愁。名酒過於求趙璧。異書渾似借荊州。溪山勝處真難到。風月佳時事不休。安得連車載郾釀。金鞭重作浣花遊。

郭釀二社郭有

春殘

老墮空山裏。春殘白日長。庸醫司性命。俗子議文章。燭映一池墨。風飄半篆香。箇中有佳處。袖手看人忙。

三月二十日晚酌

暫因賜沐作閒身。太息纔餘一日春。委地落花新著雨。穿簾歸燕不生人。衛青此日怪長揖。王翰當年謀卜鄰。商略晚窗須小醉。朱櫻青杏正嘗新。

北窗閒詠

陰陰綠樹雨餘香。半捲疎簾置一牀。得祿僅償賒酒券。思歸新草乞祠章。古琴百衲彈清散。名帖雙鉤擗硬黃。夜出灞亭雖跌宕。也勝歸作老馮唐。

夜出偏門還三山

月行南斗邊。人歸西郊路。水風吹葛衣。草露溼芒屨。漁歌起遠汀。鬼火出破墓。淒清醒醉魂。荒怪入詩句。到家夜已半。佇立叩蓬戶。穉子猶讀書。一笑慰遲暮。

四鼓酒醒起步庭下

酒解夜過半。出門步中庭。天高河漢白。月淡煙霧青。重滴竹杪露。疎見樹罅星。壞甃啼寒蛩。深竹明孤螢。秋晚雖未霜。蠹葉時自零。四序逝不留。慨然感頽齡。平生菲一把。不博帶萬釘。鷗溝謝拍拍。鴻路追冥冥。

雲門感舊

總角來遊老未忘。背人歲月去堂堂。穉松看到偃霜蓋。廢寺憶曾開寶坊。佛几古燈寒焰短。齋廚新粟午

炊香興闌未忍登車去。更倚溪橋立夕陽。

行在春晚有懷古隱

老辱明時乞一官。逢春惆悵獨無歡。舊人零落北音少。市肆蕭疎民力殫。歸計已栽千箇竹。殘年合挂兩梁冠。石帆山路頻回首。箭茁蓴絲正滿槃。

次韻和楊伯子主簿見贈

齋戒叩頭賤天公。幸矣使我爲枯蓬。枯蓬於世百無用。始得曠快癸秋風。此生安往失貧賤。白髮蕭蕭對黃卷。今人雖鄰有不覲。古人卻向書中見。猿啼月落青山空。舊隱夢寂思東蒙。不願峨冠赤墀下。且可短劍紅塵中。終年無人問良苦。眼望青天惟自許。可憐對酒不敢豪。它日空澆墳上土。文章最忌百家衣。火龍黼黻世不知。誰能養氣塞天地。吐出自足成虹霓。渡江諸賢骨已朽。老夫亦將正丘首。杜郎苦瘦帽攲耳。程子久貧衣露肘。君復作意尋齊盟。豈知衰懦畏後生。大篇一讀我起立。喜君得法從家庭。鯤鵬自有天池著。誰謂太狂須束縛。大機大用君已傳。那遣老夫安注腳。杜興伯高。程有微文若。皆近以詩文得名于諸公。而尤與子善。

醉中作行草數紙

還家痛飲洗塵土。醉帖淋漓寄豪舉。石池墨瀋如海寬。玄雲下垂黑蛟舞。太陰鬼神挾風雨。夜半馬陵飛萬弩。堂堂筆陣從天下。氣壓唐人折釵股。丈夫本意陋千古。殘虜何足督礎斧。驛書馳報兒單于。直用毛



錐驚殺汝

記夢

夢裏都忘兩鬢殘。恍然白紵入長安。碰教紙熟脩溫卷。儻得驢騎候熱官。紅葉滿街秋著句。青樓燒燭  
追歡。如今萬事消除盡。老眼摩挲靜處看。  
是待夢乎

野興

紅飯青蔬美莫加。鄰翁能共一甌茶。舍西日緊花房斂。港北風生柳腳斜。筇杖不妨閒有伴。茆簷終勝老  
無家。自驚七十猶強健。采藥歸來見暮鴉。

重午

葉底榴花蹙絳繒。街頭初賣苑池冰。會稽不藏冰。賣者皆自行在來。世間各自有時節。蕭艾著冠稱道陵。

梅雨

沐罷斜簪二十冠。斷雲殘靄暗江干。絲絲梅子熟時雨。漠漠楝花開後寒。剡采芸香辟書蠹。旋春麥炒續  
家餐。日長倦睫惟思閉。茗椀真須抵死寬。

醉歌

讀書三萬卷。仕宦皆束閣。學劍四十年。木血未染鏢。不得爲長虹。萬丈掃寥廓。又不爲疾風。六月送飛雹。

戰馬死槽櫪。公卿守和約。窮邊指淮淝。異域視京雒。於乎此何心。有酒吾忍酌。平生爲衣食。斂版靴兩腳。心雖了是非。口不給唯諾。如今老且病。鬢禿牙齒落。仰天少吐氣。餓死實差樂。壯心理不朽。千載猶可作。

蝸廬

小葺蝸廬便著家。槿籬莎徑任欹斜。爲生草草僧行腳。到處悠悠客泛槎。孤蝶惜衣晴曝粉。穉蜂貪蜜晚爭花。有書懶讀吾堪愧。睡起何妨自磬茶。

故山

功名莫苦怨天慳。一櫂歸來到死閒。傍水無家無好竹。卷簾是處是青山。滿籃箭茁瑤簪白。壓擔稜梅鶴頂殷。野興盡時尤可樂。小江煙雨趁潮還。鏡湖。

禹祠行樂盛年年。繡轂爭先罷畫船。十里煙波明月夜。萬人歌吹早鸞天。花如上苑常成市。酒似新豐不直錢。老子未須悲白髮。黃公壚下且閒眠。禹廟。

老尉鴻飛隱市門。千年猶有舊巢痕。陸生於此寓棋局。予二十年前嘗寓居。曾丈時來開酒樽。曾丈謂文清公。渺渺帆檣遙見海。冥冥蒲葦不知村。數僧也復投詩社。零落今無一二存。梅山。

落碕泉奔舞玉虹。護丹松老臥蒼龍。霜柑籬角寒初熟。野碓雲邊夜自舂。挈榼人沽村市酒。打包僧趁寺樓鐘。幽尋自是年來嬾。枉道山靈不見容。雲門。

冬晚山房書事

山澤何妨老太平。巉巖骨相本來清。月明滿地看梅影。露下隔溪聞鶴聲。未辨藥苗逢客問。欲訓琴價約僧評。胡奴仁祖今俱絕。且學湘纍拾菊英。

屏迹山村病日增。烏皮几穩得閒凭。凍雲傍水封梅萼。嫩日烘窗釋硯冰。歲盡光陰饒袞袞。身閒醉夢且騰騰。蠻童采藥歸來晚。客至從噴喚不應。

春雨絕句

恰喜西窗晚照明。虛簷又報雨來聲。端憂不用占龜兆。壞盡花時自解晴。

千點猩紅蜀海棠。誰憐雨裏作啼粧。殺風景處君知否。正伴鄰翁救麥忙。

天公似欲敗蚕麤。雨冒南山暮不收。駮女癡兒那念此。貪看科斗滿清溝。

今年春半不知春。飛雹轟雷嚇殺人。縫得春衫元未著。免教惆悵洛陽塵。

梅中最晚是緗梅。一日來看欲百回。俗紫凡紅終避舍。不妨自向雨中開。

蕭條冬令侵春晚。浙瀝寒聲滴夜長。更事老翁頑到底。每言宜睡好燒香。

山園

買得新園近釣磯。旋營茆棟設柴扉。山經宿雨脩容出。花倚和風作態飛。世事只成驚老眼。酒徒頻約典

春衣狂吟爛醉君無笑。十丈愁城要解圍。

東關

路入東關物象奇。角巾老子曳筇枝。蠶如黑蟻桑生後。秧似青鍼水滿時。穿市不嫌微雨溼。過谿翻喜壤橋危。當年野店題詩處。又典春衣具午炊。雲蹙魚鱗襯夕陽。放翁繫纜水雲鄉。一筇疾步人驚健。斗酒高歌自笑狂。風暝市樓吹絮雪。蚕生村舍采桑黃。東阡南陌無窮樂。底事隨人作許忙。

宿野人家

避雨來投白版扉。野人憐客不相違。林喧鳥雀棲初定。村近牛羊暮自歸。土釜暖湯先濯足。豆籩吹火旋烘衣。老來世路渾諳盡。露宿風餐未覺非。

北窗

北窗本意傲羲皇。老返園廬味更長。犢健戴星耕白水。蚕飢衝雨采青桑。但儒朱墨開冬學。廟史牲牢祝歲穰。從此鬢毛雖似雪。未妨擊壤頌虞唐。

晚春感事

風惡房櫳燕子歸。雨多山路蕨芽肥。青瓷旋擣作寒食。白葛預裁充暑衣。穉子日長供課早。故人官達寄

書稀幽居自喜渾無事。又向湖陰坐釣磯。  
徙倚闌干送落暉。年華冉冉恨依依。護雛燕子常更出。著雨楊花又嬾飛。已爲讀書悲眼力。還因攪帶歎腰圍。親朋半作荒郊冢。欲話初心淚滿衣。

示兒

舍東已種百本桑。舍西仍築百步塘。早茶采盡晚茶出。小麥方秀大麥黃。老夫一飽手捫腹。不復舉手號蒼蒼。讀書習氣掃未盡。燈前簡牘紛朱黃。吾兒從旁論治亂。每使老子喜欲狂。不須飲酒徑自醉。取書相和聲琅琅。人生百病有已時。獨有書癖不可醫。願兒力耕足衣食。讀書萬卷真何益。

村居初夏

暮境難禁日月催。臘醅初見拆泥開。壓車麥穗黃雲卷。食葉蠶聲白雨來。薄飯蕨薇端可飽。短衫紵葛亦新裁。宦途自古多憂畏。白首爲農信樂哉。  
養酒開時日正長。山家隨分答年光。梅青巧配吳鹽白。筍美偏宜蜀豉香。風暝緊催蠶上簇。雨餘閒看稻移秧。老夫見事真成晚。浪走人間兩鬢霜。  
天遣爲農老故鄉。山園三畝鏡湖傍。嫩莎經雨如秧綠。小蝶穿花似繭黃。斗酒隻雞人笑樂。十風五雨歲豐穰。相逢但喜桑麻長。欲話窮通已兩忘。

故鄉風物勝荆吳。流水青山無處無。列植園林多美菓。飽鉏畦壟富嘉蔬。橋邊來淬剝桑斧。池畔行芟縛  
糶菰。我有素紈如月扇。會憑名手作新圖。

新秋感事

江上清秋昨夜回。漁扉正對荻洲開。志存天下食不足。節慕古人讒愈來。風際紙鳶那解久。祭餘芻狗會  
堪哀。蕭然散髮聽秋雨。剡領新涼入酒盃。

秋思

一生書劍徧天涯。兩歲秋風喜在家。爛醉日傾無算酒。高眠時聽屬私蛙。園林夕照明丹柿。籬落初寒蔓  
碧花。便擬挂冠君會否。耳根不復耐喧譁。  
半年閉戶廢登臨。直自春殘病至今。帳外昏燈伴孤夢。簷前寒雨滴愁心。中原形勝關河在。列聖憂勤德  
澤深。遙想遺民垂泣處。大梁城闕又秋砧。

秋晚思梁益舊遊

幅巾筇杖立籬門。秋意蕭然欲斷魂。恰似嘉陵江上路。冷雲微雨溼黃昏。  
憶昔西行萬里餘。長亭夜夜夢歸吳。如今歷盡風波惡。飛棧連雲是坦途。  
滄波極目江鄉恨。衰草連天塞路愁。三十年間行萬里。不論南北怯登樓。

蔬圃

蔬圃依山腳。漁扉竝水涯。臥枝開野菊。殘枿出秋茶。病骨知天色。羈懷感物華。餘年有幾許。且灌邵平瓜。

農家

南畝勤蓄穫。西城謹蓋藏。種蕎粢霽日。斫荻待微霜。糶確新春白。山廚野蕨香。何須北窗臥。始得傲羲皇。

城南上原陳翁以賣花爲業得錢悉供酒資又不能獨飲逢人輒強與共醉辛亥九月十二日

偶過其門訪之敗屋一間妻子飢寒而此翁已大醉矣殆隱者也爲賦一詩

君不見會稽城南賣花翁以花爲糧如蜜蠶朝賣一株紫暮賣一枝紅屋破見青天盎中米常空賣花得錢送酒家取酒盡時還賣花春春花開豈有極日日我醉終無涯亦不知天子殿前宣白麻亦不知相公門前築堤沙客來與語不能答但見醉髮覆面垂髣髴

晚飯罷小立門外有作

此心何敢慕輕肥尙媿無功飽蕨薇浦面鳥衝殘靄去柳陰人荷一鋤歸病嗟短髮紛紛白老覺初心種種非百步空庭著明月黃昏手自掩荆扉

觀梅至花溼高端叔解元見尋

春暎山中雲作堆放翁艇子出尋梅不須問信道傍叟但覓梅花多處來

山家暮春

邊屋清陰合。綠堤綠草織。起蠶初放食。新麥已磨鎌。苦筴先調醬。青梅小醃鹽。佳時幸無事。酒盡更須添。行飯獨相羊。扶藜過野塘。晴光生蝶粉。暝律變鶯吭。妙美羣兒競。蠶飢小婦忙。深知遊宦惡。窮死勿離鄉。

入雲門小憩五雲橋

穀雨初過換夾衣。園林零落到薔薇。鳴鳩日暝遙相應。雖燕風柔漸獨飛。臺省多才吾輩拙。江湖久客算年歸。雲門蹋月方清絕。且倚溪橋看夕霏。

春晚村居雜賦絕句

作堤蜿蜿六百尺。西崦東村成一家。春雨乍晴桑吐葉。秋風初冷稻吹花。鵝兒草綠侵行路。燕子花明照屋除。處處乞漿俱得酒。杖頭何恨一錢無。一篙湖水鴨頭綠。千樹桃花人面紅。茆舍青帘起余意。聊將醉舞答春風。朝書牛券拈枯筆。祭暮蠶神酌凍醪。閒放無憂窮有意。旁人錯羨此翁高。澆書滿把浮蛆瓮。攤飯橫眠夢蝶牀。莫笑山翁見機晚。也勝朝市一生忙。

東坡先生謂晨飲爲澆書。李黃門謂午睡爲攤飯。

午枕閉門無客攪。夜燈開卷有兒同。若爲賤與天公道。盡乞餘生向此中。



閒曳枯筇自在行。曲廊小閣賞新晴。幽禽葉底吟風久。殘雨枝間照日明。茶映盞毫新乳上。琴橫薦石細泉鳴。亦知老健終難恃。且復蕭然得此生。

六月十四日微雨極涼

湖上清秋近。齋中白日長。雲來樹收影。雨過土生香。蓮小紅衣溼。瓜甘碧玉涼。晚來幽興極。移榻近方塘。

水亭晚眺

暮雨初晴浦面寬。水亭景物卷簾看。聯舟作陣圍漁隊。屈竹成籬護芡盤。四海諸公半丘壟。百年幾夕倚闌干。日沈未用忽忽去。待挽銀河濯肺肝。

蓬萊館午憩

驛門繫馬聽蟬吟。翻動平生萬里心。橋畔笛聲催日落。城邊草色帶煙深。關河歷歷功名晚。歲月悠悠老病侵。憶戍梁州如昨日。憑闌西望一霑襟。

夢遊散關渭水之間

平生望眼怯天涯。客裏何堪度歲華。但恨征輪無四角。不愁歸路有三叉。驛窗燈闇傳秋杵。關樹煙深宿暮鴉。叱犢老翁頭似雪。羨渠生死不離家。

秋夜將曉出籬門迎涼有感

迢迢天漢西南落，喔喔鄰雞一再鳴。壯志病來消欲盡，出門搔首愴平生。  
三萬里河東入海，五千仞嶽上摩天。遺民淚盡胡塵裏，南望王師又一年。

秋日郊居

秋日留連野老家，朱槃鮮饍粲如花。已炊藟散眞珠米，更點丁坑白雪茶。藟散米名。丁坑茶名。  
今年斟酌是豐年，社近兒童喜欲顛。半醉半醒村老子，家家門口掠神錢。

兒童冬學鬧比鄰，據案愚儒卻自珍。授罷村書閉門睡，終年不著面看人。農家十月乃遣子入學。謂類。謂之村書。

新晴

積雨已淒冷，新晴還少和。稼收平野闊，木落遠山多。土潤朝畦菜，機鳴夜擲梭。時清年歲好，吾敢歎蹉跎。

晚眺

秋晚閒愁抵酒濃，試尋高處倚枯筇。雲歸時帶雨數點，木落又添山一峯。鳴雁沙邊驚客艣，行僧煙際認樓鐘。箇中詩思來無盡，十手傳抄畏不供。

九月一日夜讀詩藁有感走筆作歌

我昔學詩未有得，殘餘未免從人乞。力孱氣餒心自知，妄取虛名有慙色。四十從戎駐南鄭，酣宴軍中夜

連日打毬築場一千步。閱馬列廐三萬疋。華燈縱博聲滿樓。寶釵豔舞光照席。琵琶絃急冰雹亂。羯鼓手勻風雨疾。詩家三昧忽見前。屈賈在眼元歷歷。天機雲錦用在我。剪裁妙處非刀尺。世間才傑固不乏。秋毫未合天地隔。放翁老死何足論。廣陵散絕還堪惜。

### 小園

窄窄柴門短短籬。山家隨分有園池。客因問字來攜酒。僧趁分題就賦詩。晨露每看花蕊拆。夕陽頻見樹陰移。此二事非閒寂不知也。拂衣司諫猶忙在。此趣淵明卻少知。

### 九月二十三夜小兒方讀書而油盡口占此詩示之

徹骨貧來累始輕。孤村月上正三更。汝緣油盡眠差早。我亦尊空醉不成。南陌金羈良自苦。北邙麟冢半無名。書生事業期千載。得喪從來未易評。

### 今年立冬後菊方盛開小飲

胡牀移就菊花畦。飲具酸寒手自攜。野實似丹仍似漆。村醪如蜜復如齏。傳方解烹羊腳。破戒猶慙蟹臍。一醉又驅黃犢出。冬晴正要飽耕犁。

### 步至近村

藥物扶持病漸平。布裘絮帽出柴荆。荒堤經雨多牛跡。村舍無人有碓聲。數蝶弄香寒菊晚。萬鴉回陣夕

楓明老翁隨意閒成句。不似劉侯要取名。

夜讀范至能攬轡錄言中原父老見使者多揮涕感其事作絕句

公卿有黨排宗澤。帷幄無人用岳飛。遺老不應知此恨。亦逢漢節解沾衣。

書適

老翁垂七十。其實似童兒。山果啼呼覓。鄉儻喜笑隨。羣嬉累瓦答。獨立照盆池。更挾殘書讀。渾如上學時。

十一月四日風雨大作

僵臥孤村不自哀。尙思爲國戍輪臺。夜闌臥聽風吹雨。鐵馬冰河入夢來。

病起

少年射虎南山下。惡馬強弓看似無。老病卽今都可說。出門十步要人扶。

書巢冬夜待旦

掃葉擁塔寒犬行。編茆護柵老雞鳴。風霜漸逼歲時晚。形影相依燈火明。史策千年媿豪傑。關河萬里愴功名。固應死抱無窮恨。老病何由更請纓。

冬晴閒步東村由故塘還舍作

紅藤拄杖獨相羊。路遶東村小嶺傍。水落枯萍黏蟹椀。鄉人植竹以取蟹謂之蟹椀。雲開寒日上漁梁。洛陽二頃言

良是光範三書討本狂。歷盡危機識天意。要令閒健反耕桑。

### 寄宇文成州

成州太守比何如。夢裏依然把臂初。復起卿常用卿法。長閒吾實愛吾廬。五湖風雨孤舟夜。萬里關山一紙書。正使兩翁長隔闊。子孫宅日莫相疎。

### 春雨

午夜聽春雨。發生端及期。世憂殊未艾。天意固難知。士節承平日。人材南渡時。後生聞見狹。撫枕歎吾衰。

### 僧廬

僧廬土木塗金碧。四出徵求如羽檄。富商豪吏多厚積。宜其棄金如瓦礫。貧民妻子半菽食。一飢轉作溝中瘠。賦斂鞭笞縣庭赤。持以與僧亦不惜。古者養民如養兒。勸相農事憂其飢。露臺百金止不爲。尙媿七月周公詩。流俗紛紛豈知此。熟視創殘謂常爾。傑屋大像無時止。安得疲民免飢死。

### 贈劉改之秀才

君居古荊州。醉膽天宇小。尙不拜龐公。況肯依劉表。胸中九淵蛟龍蟠。筆底六月冰雹寒。有時大叫脫烏幘。不怕酒盃如海寬。放翁七十病欲死。相逢尙能刮眼看。李廣不生楚漢間。封侯萬戶宜其難。

### 春社

太平處處是優場。社日兒童喜欲狂。且看參軍喚蒼鶻。京都新禁舞齋郎。

村夜

寂寂山村夜。悠然醉倚門。月昏天有暈。風軟水無痕。迹爲遭讒遠。身由不仕尊。敢嗟車馬絕。同社自雞豚。

困甚戲書

官如枝頭乾。不受雨露恩。身如水上浮。泛泛寧有根。刈茆以苦屋。縛柴以爲門。故人分祿米。隣父餉魚殮。前門吏徵租。後門質襦裙。不敢謀歲月。且復支朝昏。雨餘幽花拆。亦可侑清尊。吾生信已乎。終老此山村。

戲詠山陰風物

萬里秦吳稅駕遲。還鄉已嘆髻成絲。城邊綠樹山陰道。水際朱扉夏禹祠。項里楊梅鹽可徹。太白梁國吟梅爲君設。吳鹽如花皎白雪。不知楊梅酸者。乃薦以鹽。作品未嘗用也。湘湖蓴菜鼓偏宜。蓴菜最宜鹽鼓。所謂未下鹽鼓者。言爾。圖經草草尙堪恨。好事它年采此詩。

癸丑七月二十七日夜夢遊華嶽廟

驛樹秋風急。關城暮角悲。平生忠憤意。來拜華山祠。

牲碑僞正朔。祠祝虜衣冠。神亦豈堪此。出門山雨寒。

僕頃在征西大幕登高望關輔樂之每冀王師拓定得卜居焉暇日記此意以示子孫

八月殘暑退，秋聲滿庭樹。豈無四方志，衰病迫霜露。遼東黃頭奴，稔惡天震怒。南北會當一，老吾悲不遇。子孫勉西遷，俗厚吾所慕。約已收孤嫠，教子立門戶。黍稌暗阡陌，鶉雉足七箸。永爲河渭民，勿憚關山路。

秋夜感舊十二韻

冷螢綴蓬根，忽復照高樹。年光逝不留，百感集遲暮。往者秦蜀間，慷慨事征戍。猿啼鬼迷店，馬噤飛石鋪。鬼迷店在大散關下，飛石鋪在小益道中，常有崩石。危嶺高入雲，朽棧劣容步。天近星宿大，江惡蛟蠶怒。意氣頗自奇，性命那復顧。最懷清渭上，衝雪夜掠度。封侯細事爾，所冀垂竹素。兜鍪竟何成，豈獨儒冠誤。當時安校尉，旗纛今照路。浩歌遂成章，聊慰老不遇。

秋晚閒步隣曲以予近嘗臥病皆欣然迎勞

放翁病起出門行，續女窺籬牧豎迎。酒似粥釀知社到，麩如盤大喜秋成。歸來早覺人情好，對此彌將世事輕。紅樹青山只如昨，長安拜免幾公卿。

雨夜

歲晚茆茨劣自容，齒搖將脫髮將童。心遊萬里關河外，身臥一窗風雨中。醫不可招惟忍病，書猶能讀足忘窮。夜闌睡覺蛩聲裏，時見燈花落碎紅。

夢至洛中觀牡丹繁麗溢日覺而有賦

兩京初駕小羊車。顛領江湖歲月賒。老去已忘天下事。夢中猶看洛陽花。妖魂豔骨千年在。朱彈金鞭一笑譁。寄語氍毹莫癡絕。祈連還汝舊風沙。

秋夜獨酌

壯志隨年減。羈愁與夜長。月高寒暈淡。花坼露叢香。仕畏讒銷骨。歸判酒腐腸。青燈寫孤影。相勸盡餘觴。

自嘲

歲月推遷萬事非。放翁可是白頭癡。此生竟出古人下。有志尙如年少時。僻學固應知者少。長歌莫問和予誰。自嘲自解君毋怪。老大從人百不宜。

數日秋氣已深清坐無酒戲題長句

漸近重陽天氣嘉。數椽茆竹淡生涯。山童擁篲掃黃葉。鄰女傍籬收碧花。避俗要生輪四角。出門何啻路三叉。晚窗酒盡無多歎。試問前村好事家。

東村散步有懷張漢州

扶杖村東路。秋來始此回。寒鴉盤陣起。野菊臥枝開。憂國丹心折。懷人雪鬢催。房湖八千里。那得尺書來。

排悶

四十從軍渭水邊。功名無命氣猶全。白頭爛醉東吳市。自拔長劍割礙肩。



西塞山前吹笛聲。曲終已過雒陽城。君能洗盡世間念。何處樓臺無月明。

### 放歌行

君不見汾陽富貴近古無。二十四考書中書。又不見慈明起自布衣中。九十五日至三公。人生窮達各有命。拂衣徑去猶差勝。介推焚死終不悔。梁鴻寄食吾何病。安用隨牒東復西。獻諛耐辱希階梯。初無公論判涇渭。徒使新貴矜雲泥。稽山一老貧無食。衣破履穿面黧黑。誰知快意舉世無。南山之南北山北。

### 山頭石

秋風萬木實。春雨百草生。造物初何心。時至自枯榮。惟有山頭石。歲月浩莫測。不知四時運。常帶太古色。老翁一生居此山。腳力欲盡猶躋攀。時時撫石三歎息。安得此身如爾頑。

### 野興

老去癡頑百不能。非醒非醉日騰騰。敲門惟有徵租吏。好事元無送米僧。舊俗不還誰復念。古書雖在漸難憑。平生意氣今如此。惆悵西窗半夜燈。

### 古築城曲

築城聲酸嘶。漢月傍城低。白骨若不掩。高與長城齊。嶧山訪秦碑。斷裂無完筆。惟有築城詞。哀怨如當日。

山園

山泉引派漲清池。野蔓移根種短籬。藝果極知非老事。接花聊復効兒嬉。提壺言語開顏聽。斲木衣襦緩步窺。莫笑題詩還滿紙。小園幽事要君知。

古別離

孤城窮巷秋寂寂。美人停梭夜歎息。空園露溼荆棘枝。荒蹊月照狐狸迹。憶君去時兒在腹。走如黃犢爺未識。紫姑吉語元無據。況憑瓦兆占歸日。嫁來不省出門前。魂夢何因識酒泉。粉綿磨鏡不忍照。女子盛時無十年。

病起山居日有幽事戲作

鶴骨龜腸欲不禁。扶衰初喜罷呻吟。盆山冰釋書窗暎。藥竈香濃道院深。筆健乍臨新獲帖。手生重理舊傳琴。閉門局促還堪恨。雲海何時豁此心。

水村曲

山村今年晚禾旱。奏下民租蠲太半。水村雨足米狼戾。也放三分慰民意。看榜歸來迭歌舞。共喜清平好官府。老翁猶記軍興時。汝輩少年那得知。

寒神曲

擊鼓坎坎。吹笙嗚嗚。綠袍槐簡立老巫。紅衫繡裙舞小姑。烏白燭明蠟不如。鯉魚糝美出神廚。老巫前致詞。小姑抱酒壺。願神來享常懽娛。使我嘉穀收連車。牛羊暮歸塞門閭。雞鶩一母生百雛。歲歲賜粟。年年蠲租。蒲鞭不施。園土空虛。束草作官。但形模。刻木爲吏。無文書。淳風復還。羲皇初。繩亦不結。況其餘。神歸人散。醉相扶。夜深歌舞官道隅。

### 涼州行

涼州四面皆沙磧。風吹沙平馬無迹。東門供張接中使。萬里朱宣布襖勅。勅中墨色如未乾。君王心念兒郎寒。當街謝恩拜舞罷。萬歲聲上黃雲端。安西北庭皆郡縣。四夷朝貢無征戰。舊時胡虜陷關中。五丈原頭作邊面。

### 七十

七十殘年百念枯。桑榆元不補東隅。但存隱具金鴉觜。卽夢朝衣玉鹿盧。身世蠶眠將作繭。形容牛老已垂胡。客來莫問先生處。不釣娥江卽鏡湖。

### 正月二十日晨起弄筆

深院窗扉曉色遲。新愁宿醉兩參差。雨聲欲與夢相入。春意不隨人共衰。零落殘梅臨小釣。縱橫野水赴清池。物華撩我緣何事。似恐新年漸廢詩。

新闢小園

西戍歸來鬢已霜。生兒又過乃翁長。眼明身健殘年足。飯軟茶甘萬事忘。學廢僅能書姓字。客來懶復倒衣裳。山園寂寂春將晚。酷愛幽花似蜜香。

新展山園半畝強。笑人車馬出籠坊。山禽乍暖慙勤語。野蕘無風自在香。點點水紋迎細雨。疎疎籬影界斜陽。出門遙向隣翁說。釋耒相從共一觴。

久不得張漢州書

儘道三巴遠。卽無一紙書。衰遲自難記。不是故人疎。

春晚村居

一事元無可得忙。悠然半醉倚胡牀。牡丹枝上青春老。燕子聲中白日長。身世已如風六鷁。文章仍似閔黃楊。太平有象無人識。南陌東阡擣麩香。

五  
六  
歲  
新

遊雲山諸蘭若

花過木陰合。溪雲生暮涼。牛行響白水。鷺下點青秧。古寺宛如昔。穉松森已行。道傍松及三十年。則僧輒伐去。復種小者。予自

幼歲至今見三種矣。已。蒼年不下榻。童子爲燒香。

園中小飲

此老胸中萬頃寬。小園幽徑日追歡。寧教酒欠尋常債。就耻人求本分官。高柳陰濃煙欲暝。叢花紅溼露初溥。時月桂方盛開。要知澤國年光晚。已過清明尙淺寒。

鳥啼

野人無曆日。鳥啼知四時。二月聞子規。春畊不可遲。三月聞黃鸝。幼婦閔蠶飢。四月鳴布穀。家家蠶上簇。五月鳴鴉舅。苗稚憂草茂。人言農家苦。望晴復望雨。樂處誰得知。生不識官府。葛衫麥飯有卽休。湖橋小市酒如油。夜夜扶歸常爛醉。不怕行逢灞陵尉。

題陽關圖

誰畫陽關贈別詩。斷腸如在渭橋時。荒城孤驛夢千里。遠水斜陽天四垂。青史功名常蹭蹬。白頭襟抱足乖離。山河未復胡塵暗。一寸孤愁只自知。

夜分不寐起坐園中至旦

涼氣蘇衰疾。幽情入杖藜。月驚孤鶴起。天帶衆星西。松菊今彭澤。山川古會稽。清吟殊未愜。喔喔已晨雞。

醉睡初覺偶作

小圃醒還醉。幽窗起復眠。虛明炷香地。清潤斲花天。老去才雖盡。窮來志益堅。阿瞞那可語。平日笑橋玄。

聞中

閒中高趣傲羲皇。身臥維摩示病牀。活眼硯凹宜墨色。長毫甌小聚茶香。門無客至惟風月。案有書存但老莊。問我東歸今幾日。坐看庭樹六番黃。

悶極有作

貴己不如賤。狂應又勝癡。新寒壓酒夜。微雨種花時。堂下藤成架。門邊枳作籬。老人無日課。有興卽題詩。

三峽歌

乾道庚寅予始入蜀。上下三峽屢矣。後二十五年歸。畊山陰。偶讀梁簡文巴東三峽歌。感之。擬作九首。

實紹熙甲寅十月二日也。

神女廟前秋月明。黃牛峽裏暮猿聲。危途性命不容恤。百丈牽船侵夜行。不怕灘如竹節稠。新灘已過可無憂。古粧峨峨一尺髻。木盞銀盃邀客舟。十二巫山見九峯。船頭彩翠滿秋空。朝雲暮雨渾虛語。一夜猿啼明月中。錦繡樓前看賣花。麝香山下摘新茶。長安卿相多憂畏。老向夔州不用嗟。險詐沾沾不媿天。交情回首薄如煙。東遊萬里雖堪樂。澹瀕瞿塘要放船。蠻江水碧瘴花紅。白舫黃旗無便風。涪萬四時常避水。棚居高出亂雲中。亂插花簫子紅。蠻歌相和灑西東。忽然四散不知處。踏月捫蘿歸洞中。

萬州溪西花柳多，四鄰相應竹枝歌。問君今夕不痛飲，奈此滿川明月何。  
我游南賓春莫時，蜀船曾繫挂猿枝。雲迷江岸屈原塔，花落空山夏禹祠。

書室明煖終日婆娑其間倦則扶杖至小園戲作長句

美睡宜人勝按摩，江南十月氣猶和。重簾不捲留香久，古硯微凹聚墨多。  
月上忽看梅影出，風高時送鴈聲過。一杯太淡君休笑，牛背吾方扣角歌。

初冬

老客人間百事慵，樂哉閉戶過今冬。朝爐獸炭騰紅焰，夜榻蠻氈擁紫茸。  
蠟刺坼蓬新粟熟，鵝雛弄色凍醅濃。題詩正自消閒日，本不爭先萬戶封。

幽居

雨霽雞棲早，風高雁陣斜。園丁刈霜稻，村女賣秋茶。缺井磨樵斧，枯桑繫釣槎。  
客來那用問，此是放翁家。

冬夜獨酌

寒水茫茫浸月明，疎鐘杳杳帶霜清。一樽濁酒有妙理，十里荒鷄非惡聲。  
物外雖增新跌宕，胸中未洗舊嶒嶸。頽然坐睡蒲團穩，殘火昏燈伴五更。

雜詠園中菓子

不酸金橘種初成。無核枇杷接亦生。珍產已從幽圃得。濁醪仍就小槽傾。  
漿石榴隨餠作節。蠟櫻桃與酪同時。兩株偶向池邊種。可喜今年墜折枝。  
架垂馬乳收論斛。港種雞頭采滿船。龍鼎若爲占食指。麴車未用墮饑涎。  
山杏谿桃本看花。纍纍成實亦堪誇。鹽收蜜漬饒風味。送與山僧下夜茶。

歲莫感懷

家世本無年。甲子近一周。小子獨何幸。七十今平頭。往者收朝迹。亟欲求歸休。  
厚恩許奉祠。得祿歲愈憂。三釜不及親。顧爲妻子留。何由洗此媿。欲挽天河流。

高皇昔中興。風雨躬沐浴。一士未嘗遺。萬里皆馳日。廉聽闕言路。虛懷詢得失。  
孤臣實艸芥。亦獲對宣室。龍顏宛在目。德不報萬一。橋出松栢寒。淚盡史臣筆。

王師宿梁益。行臺護諸將。腐儒添辟書。萬里至渭上。旌旗照關路。風雪暗戎帳。  
堂堂鐵馬陣。蹙蹙木牛餉。誰知骨相薄。空負心膽壯。回首二十年。撫事增悲愴。

在昔祖宗時。風俗極粹美。人材兼南北。議論忘彼此。誰令各植黨。更仆而迭起。  
中更夷狄禍。此風猶未已。臣不難負君。生者固賣死。儻築太平基。請自厚俗始。

井地以養民。整整若棋畫。初無甚貧富。家有五畝宅。哀哉古益遠。禍始開阡陌。  
富豪役千奴。貧老無寸帛。



困窮禮義廢，盜賊起促迫。誰能講古制，壽我太平脈。

贈應秀才

過宋不見元城公，渡淮不見陳了翁。當時人人皆太息，至今海內傾高風。老夫七十居鄉縣，龔龔龍鍾何足見。辱君雪裏來叩門，自說辛勤求識面。我得茶山一轉語，文章切忌參死句。知君此外無他求，有求寧踏三山路。

山園雜詠

祠祿留人未挂冠，山園三畝著身寬。百年竟向愁邊老，萬事元輸靜處看。花徑糝紅供晚醉，月天生暈作春寒。汗青事業都忘盡，時賴吾兒舉話端。

殘春終日在林亭，散髮披衣醉復醒。科斗已成量閣閣，櫻桃初結子青青。魚遊滄海寧濡沫，禽慕雕籠即翦翎。薄晚東風吹小雨，笑攜長鏡伴畦丁。

春晚懷山南

梨花堆雪柳吹綿，常記梁州古驛前。二十四年成昨夢，每逢春晚卽悽然。壯歲從戎不憶家，梁州裘馬鬪豪華。至今夜夜尋春夢，猶在吳園藉落花。身寄江湖兩鬢霜，金鞭朱彈夢猶狂。遙知南鄭城西路，月與梨花共斷腸。

春晚雜興

澤國固多雨。莫春猶薄寒。兒童葺茶舍。婦女賽蚕官。閱世年雖往。爲農興未闌。窮途得一飽。亦足慰艱難。  
池面萍初紫。牆頭杏已青。攜兒撐小艇。留客坐孤亭。相法無侯骨。生平直酒星。正須遺萬事。莫遣片時醒。  
小市湖橋北。幽居石埭西。蒲深姑惡哭。樹密姊歸啼。山茗封青箬。村醪坼赤泥。平生汗簡手。投老慣扶犁。  
病瘍無意緒。閉戶作生涯。草草半盂飯。悠悠一盃茶。笑穿居士屨。閒看女郎花。唐人謂辛夷爲女郎花。閩中有此花。一叢二百

朵。莫問明朝事。忘家卽出家。

齋中雜題

列屋蛾眉不足誇。可齋別自是生涯。閒將西蜀團窠錦。自背南唐落墨花。  
葉兒硯涵鸚鵡眼。古奩香斲鷓鴣斑。絕知造物慙慙意。成就衰翁到死閒。

上巳書事

單衣初著下湖天。飛蓋相隨出郭船。得雨人人喜秧信。祈蠶戶戶斂神錢。黃雞煮臠無停筯。青韭淹菹欲  
墮涎。丞相傳聞又三押。衡茅未改日高眠。

春夏之交風日清美欣然有賦

芳潤園林不似貧。年光無盡逐番新。來禽顏色不禁雨。博黍語言如惜春。身外豈關吾輩事。鏡中已換昔

時人神僊定未超塵俗。猶插金貂侍帝晨。

初夏行平水道中

老去人間樂事稀。一年容易又春歸。市橋壓擔蓴絲滑。村店堆盤豆莢肥。傍水風林鸚語語。滿園煙草蝶飛飛。郊行已覺侵微暑。小立桐陰換夾衣。

幽棲

閒人了無事。地僻稱幽棲。眇米留雞食。移琴避燕泥。桐生窗欲暗。筍長徑還迷。不作容車計。門閤儘放低。誰謂幽棲陋。茅茨足庇牀。雨便梧葉大。風度練花香。浴佛兒童喜。繅絲婦女忙。竭來三十載。吾鬢固宜霜。

乾道丙戌始卜居鏡湖之  
三山。今甫三十年矣。

十月十七日子生日也。孤村風雨蕭然。偶得二絕句。子生淮上。是日平旦。大風雨駭人。及子墮

地雨乃止。

少傅奉詔朝京師。橫船生我淮之湄。宣和七年冬十月。猶是中原無事時。我生急雨暗淮天。出沒蛟鼉浪入船。白首功名無尺寸。茅簷還聽雨聲眠。

枕上偶成

放臣不復望修門。身寄江頭黃葉村。酒渴喜聞疎雨滴。夢回愁對一燈昏。河潼形勝寧終棄。周漢規模要

細論自恨不如雲際雁。南來猶得過中原。

舍北閒望作六字絕句

潘岳一篇秋興。李成八幅寒林。舍北偶然倚杖。盡見古人用心。

題庵壁

身似蝸牛蠹有廬。卻緣無用得安居。地爐封火欺寒雨。紙閣油窗見細書。麪熟山僧分餽。船來溪友餉薪。樽閉門莫笑衰頰甚。讀易論詩亦未疎。

貧甚作短歌排悶

閒何濶。逢諸葛。畏人常憂不得活。事不諧。問文開。不踢權門更可哀。卽今白髮如霜草。一飽茫然身已老。惟有躬耕差可爲。賣劍買牛悔不早。年豐米賤身獨餓。今朝得米無薪炊。地上去天八萬里。空自呼天豈知。

雨夜有懷張季長少卿

放翁雖老未忘情。獨臥山村每自驚。鼎鼎百年如電速。寥寥一笑抵河清。梅初破。藟行江路。燈欲成。花聽雨聲。正用此時思劇飲。故交零落愴餘生。

春思

七十老翁身退耕。可憐未減舊風情。典衣取酒那論價。秉燭看花每到明。江浦時時逢畫檝。寺樓處處聽新鶯。此生無復陽關夢。不怕樽前唱渭城。

丙辰上元前一日

弊裘破帽髮鬢髻。宛似山房罷講僧。身病不禁連夜雨。家貧只挂去年燈。修椽柳外掀樓角。危檻雲間露塔層。自笑閒遊本無定。與爾隨處倚枯藤。

懷舊

狼煙不舉羽書稀。幙府相從日打圍。最憶定軍山下路。亂飄紅葉滿戎衣。翠崖紅棧鬱參差。小益初程景最奇。誰向豪端收拾得。李將軍畫少陵詩。

幽居初夏

湖山勝處放翁家。槐柳陰中野徑斜。水滿有時觀下鷺。草深無處不鳴蛙。籬龍已過頭番筍。木筆猶開第一花。歎息老來交舊盡。睡餘誰共午甌茶。

六月二十四日夜分。夢范至能李知幾尤延之同集江亭。諸公請予賦詩。記江湖之樂。詩成而覺。忘數字而已。

露簷霜筠織短篷。飄然來往淡煙中。偶經菱市尋谿友。卻揀蘋汀下釣筒。白菡萏香初過雨。紅蜻蜓弱不

禁風吳中近事君知否。團扇家家畫放翁。

閒居自述

自許山翁嬾是真。紛紛外物豈關身。花如解笑還多事。石不能言最可人。淨掃明窗憑素几。閒穿密竹岸烏巾。殘年自有青天管。便是無錐也未貧。

秋雨初霽試筆

墨入紅絲點漆濃。閒將倦筆寫秋容。雨聲已斷時聞滴。雲氣將歸別起峯。斜日半穿臨水竹。好風遙送隔城鐘。遠遊更動輕舟興。太息何人解見從。

舍北搖落景物殊佳偶作

路擁新霜葉。溪餘舊漲沙。栖鳥初滿樹。歸鴨各知家。世事元堪笑。吾生固有涯。南村聞酒熟。試遣小童賒。屋角成金字。溪流作縠紋。斜通小橋路。半掩夕陽門。孤艇衝煙過。疎鐘隔塢聞。杜門非獨病。實自厭紛紛。草徑人稀到。柴扉手自開。林疎鴉小泊。溪淺鷺頻來。簷角除瓜蔓。牆隅斲芋魁。東鄰臠肉至。一笑舉新醅。

醉中信筆作四絕句既成懼觀者不知野人本心也復作一絕

麥野桑村有酒徒。過門相覓醉相扶。朱門日日教歌舞。也有儂家此樂無。過得一日過一日。人間萬事不須謀。鄰家幸可賒芳醞。紅葉何曾笑白頭。

今朝賣穀得青錢。自出街頭買蕪肩。艸火燎來香滿屋。未容下筓已流涎。  
老病人間足畏途。怕人渾似怕於菟。清明頗動青鞵興。先探門前有客無。  
治道巍巍本易成。狂言安得略施行。太平事業人皆見。不計封倫死與生。

睡起至園中

春風忽已遍天涯。老子猶能領物華。淺碧細傾家釀酒。小紅初試手栽花。  
野人易與輸肝肺。俗語誰能挂齒牙。更欲世間同省事。勾回蟻戰放蜂衙。

雨中作

三日雨頻作。昏昏饒睡眠。泥深散酒市。風惡惱燈天。茆屋松明照。茶鐺雪水煎。  
山家自成趣。撫枕寄悠然。短髮白如絲。梅花似舊時。掩屏愁入夢。隱几雨催詩。病爲陰天劇。  
春緣閨歲遲。非關畏車馬。衰甚實難支。花壓烏巾洒滿卮。舊逢春日恨春遲。  
如今病臥孤村裏。過了新春也不知。

立春日

春行

九日春陰一日晴。強扶衰病此閒行。猩紅帶露海棠溼。鴨綠平堤湖水明。  
杜子美曉看紅溼處。花重。官城。李太白蜀江紅且明。用溼字明字。可謂奪造化之功。世未有拈出者。酒賤柳陰逢醉臥。土肥稻壟看深耕。山翁莫道渾無用。解與明時說太平。

賞花至湖上

吾國名花天下稀。園林盡日敞朱扉。蝶穿密葉常相失。蜂戀繁香不記歸。欲過用愁風蕩漾。半開卻要雨霏微。良辰樂事真當勉。莫遣忽忽一片飛。

莫春

數間茆屋鏡湖濱。萬卷藏書不救貧。燕去燕來還過日。花開花落卽經春。開編喜見生平友。照水驚非曩歲人。自笑滅胡心尚在。憑高慷慨欲忘身。

七十三吟

七十三年事事新。涵濡幸作六朝民。髮無可白方爲老。酒不能賒始覺貧。末路已悲身是客。此心猶與物爲春。柴門勿謂常岑寂。時有鄉鄰請藥人。

舍北行飯書觸目

晚殮初潑一甌茶。曳杖閒行興未涯。煙樹參差墨濃淡。風鶻零亂字橫斜。夕陽偏傍平橋路。寒蝶猶依晚菊花。堪笑衰翁耐荒寂。短衣霑露未還家。

春近山中卽事

節物貧家有故常。春盤蠟粥逐時忙。悠悠歲月催雙鬢。草草雞豚薦一觴。人意自殊平日樂。梅花寧減故



時香。小園新展西南角。挂樹青蘿百尺長。

### 雪夜感舊

江月亭前樺燭香。龍門閣上馱聲長。亂山古驛經三折。小市孤城宿兩當。晚歲猶思事鞍馬。當時那信老耕桑。綠沉金鎖俱塵委。雪洒寒燈淚數行。

### 將進酒

我欲挽住北斗杓。常指蒼龍無動搖。春風日夜吹草木。只有榮盛無時凋。我欲剗斷日行道。陽鳥當空月杲杲。非惟四海常不夜。亦使人生失衰老。如山積麴高崔嵬。大江釀作蒲萄醅。頽然一醉三千盃。借問白髮何從來。

### 雜感

志士山棲恨不深。人知已是負初心。不須先說嚴光輩。直自巢由錯到今。百年鼎鼎成何事。寒暑相催卽白頭。縱得金丹真不死。摩挲銅狄更添愁。山人那信宦途艱。強著朝衣趁曉班。豪氣不除狂態作。始知只合死空山。故舊書來訪死生。時聞剗啄叩柴荆。自嗟不及東家老。至死無人識姓名。

### 幽居

小舫藤爲纜。幽居竹織門。短籬圍藕蕩。細路入桑村。魚膾槎頭美。醅傾粥面渾。殘年謝軒冕。猶足號黎元。

夏日

過眼春光久已空。曬絲擣麥又匆匆。新泥滿路梅黃雨。古木號山月暈風。角黍菱新間罇俎。靈符墨溼照房櫳。歲華不爲衰翁駐。且付餘生一笑中。

雨斷雲歸旋作晴。尙餘紅溼在簾旌。燕雛掠地飛無力。梅子臨池墜有聲。米糲解包供午餉。萍螿傍枕析朝醒。此翁不負頑軀處。捫腹時時遶舍行。

感舊

要識梁州遠。南山在眼邊。霜郊熊撲樹。雪路馬蒙氈。慘淡遺壇側。

拜韓信壇。至今猶存。蕭條古廟墻。沔陽有蜀後

廟。百詩猶可想。歎息遂無傳。

予山南雜詩百餘篇。舟行過雲灘。墜水中。至今以爲恨。

夜涉南沮水。朝過小益城。梯山天一握。度棧土微平。雨近秦雲暗。霜高隴月明。至今孤夢裏。喝馬有遺聲。

喝馬皆七字韻語。聞之悲愴動人。

早發金堆市。更衣石櫃亭。灘聲秋後壯。山色雨餘青。道澗愁車轍。橋危避駝鈴。功名竟何在。撫事感頽齡。

塵土暗貂裘。森然白髮稠。年光眞袞袞。吾事竟悠悠。馬宿平沙夜。

軍中馬及廐卒。夏夜皆露宿沙上。烽傳絕塞秋。平安

南山夾至山。故人零落盡。追寫只添愁。

秋夕露坐作

銀河半落露華清。南斗闌干北斗明。冉冉方悲老將至。纖纖又歎月初生。酒牀細滴香浮瓮。衣杵相聞聲滿城。萬卷讀書無用處。卻將耕稼報昇平。

秋思

身似龐翁不出家。一窗自了淡生涯。山薑零落初成子。石竹淒涼半吐花。寒澗挹泉供試墨。墮巢篝火喚煎茶。掩關本意君知否。兩耳衰年不耐譁。

豐歲

豐歲驩聲動四鄰。深秋景氣粲如春。羊腔酒擔爭迎婦。鼗鼓龍船共賽神。處處喜晴過甲子。家家築屋趁庚申。老翁欲伴鄉閭醉。先辦長衫紫領巾。

秋賽

柳姑廟前煙出浦。冉冉縈空青一縷。須臾散作四山雲。明日來爲社公雨。小巫屢舞大巫歌。士女拜祝肩相摩。芳茶綠酒進雜選。長魚大載高嵯峨。常年徵科煩箠楚。縣家血溼庭前土。妻啼兒號不敢怨。期會常憂累官府。今年家家有餘粟。縣符未下輸先足。木刻吏蒲作鞭。自然粟帛如流泉。儲積不愁無九年。

小舟過吉澤效王右丞

澤園霜露晚。孤村煙火微。本去官道遠。自然人迹稀。木落山盡出。鐘鳴僧獨歸。漁家閒似我。未夕閉柴扉。

太息

自古才高每恨浮。偉人要是出中州。卽今未必無房魏。埋沒胡沙死卽休。關輔堂堂墮虜塵。渭城杜曲又逢春。安知今日新豐市。不有悠然獨酌人。

歲首書事

東風入律寒猶劇。多稼占祥雪欲成。雲陰作雪。獨句。至開歲。雪意愈濃。鬱壘自書誇腕力。屠蘇不至歎人情。今歲無餽。居蘇者。呼盧院落譁新歲。鄉俗歲夕聚博。賣困兒童起五更。立春未明。相呼賣。能且健。剩隨鄰曲樂昇平。

菴中獨居感懷

無錢溪女亦留魚。有雨東家每借驢。藜粥數匙晨壓藥。松肪一碗夜觀書。黃紬被暖閒無厭。白布衫長樂有餘。南陌東阡春事動。放翁作計未全疎。

春日園中作

杏花開過尙輕寒。盡日無人獨倚闌。久別名山憑夢到。每思舊友取書看。塵埃幸已賒腰折。富貴深知欠面團。老去逢春都有幾。一杯行復送春殘。

春日小園雜賦

市塵不到放翁家。繞麥穿桑野徑斜。夜雨長深三尺水。曉寒留得一分花。悶從鄰舍分春瓮。閒就僧窗試露芽。自此年光應更好。日驅秧馬聽縑車。

春思

兀兀治鬢酒未醒。霏霏潑火雨初晴。愁看入戶桃花片。閒聽爭巢燕子聲。百疾侵陵成老大。一春轉盼又清明。蘭亭禹廟渾如昨。回首兒時似隔生。

白樂天詩云。倦倚繡牀愁不動。緩垂綠帶髮鬢低。遼陽春盡無消息。夜合花前日又西。好事者畫之爲倦繡圖。此花以五六月開山中。多于茨棘。人殊不貴之。爲賦小詩以寄感歎。

王室東遷歲月賒。兩京漠漠暗胡沙。繡牀倦倚人何在。風雨漫山夜合花。

蜉蝣行

蜉蝣至細能知時。春風禮雨占無遺。蜻蜓滿空乃不知。庭除一出無歸期。樂哉蜻蜓高下飛。蜉蝣未盡何憂飢。簷間蜘蛛亦伺汝。吐絲織網腹如鼓。

村舍雜書

中春農在野。蚕事亦隨作。手種臨安青。桑名可飼蠶百箔。累累繭滿簇。繹繹絲上簷。老子雖安眠。衣帛可無作。

舍南種胡麻。三日幸不雨。晨起親按行。已見青覆土。窮人如意少。喜色漏眉宇。兒童勿惰偷。造物不負汝。五月新麵成。六月甘瓜熟。作麪及良時。火見金始伏。懸知桑落後。醅面濃如粥。再拜謝天公。無功叨美祿。  
予家釀·用宛  
丘瓜麪法。

折蓮釀作醪。采豆治作醬。開曆揆日時。汲井滌瓮盎。上奉時祭須。下給春耕餉。咨爾後之人。歲事不可曠。東山石上茶。鷹瓜初脫鞵。雪落紅絲磴。香動銀毫甌。爽如聞至言。餘味終日留。不知葉家白。亦復有此不。逢人乞藥棧。鬱鬱遂滿園。玉芝來天姥。黃精出雲門。丹苗雨後吐。綠葉風中翻。活人吾豈能。要有此意存。軍興尙戎衣。冠帶謝褒博。秃巾與小襲。顧影每懷作。及今反士服。始覺榮天爵。出入阡陌間。終身有餘樂。讀書乃一癖。我亦不自知。坐書窮至老。更欲傳吾兒。吾兒復當傳。百世以爲期。君看北山公。太行尙可移。爵祿九鼎重。名義一羽輕。人見共如此。吾道何由行。湖山有一士。無人知姓名。時時風月夕。遙聞清嘯聲。陳阜卿先生爲兩浙轉運司考試官。時秦丞相孫以右文殿修撰來就試。直欲首送。阜卿得予文卷。擢置第一。秦氏大怒。予明年旣顯黜。先生亦幾陷危機。偶秦公薨。遂已。予晚歲料理。故書得先生手帖。追感平昔。作長句以識其事。不知衰涕之集也。

冀北當年浩莫分。斯人一顧每空羣。國家科第與風漢。天下英雄惟使君。後進何人知大老。橫流無地寄斯文。自憐衰鈍辜眞賞。猶竊虛名海內聞。

東堂睡起

置身事外息吾黥。獨臥空堂一榻橫。簷影漸移知日轉。樹梢微動覺風生。每從山寺開經帙。間就園公辨藥名。若論胸中淡無事。八珍何得望藜羹。

五鼓起坐待旦

睡覺初聞雞一鳴。披衣危坐待窗明。殘軀已向閑中老。癡夢猶尋熟處行。南北迢迢悲往事。古今莽莽歎浮生。伯倫一鍤君休笑。冢象祁連亦已平。

遣興

湖海元爲汗漫游。誤恩四領幔亭秋。掃空薄祿始無媿。閉上衡門那得愁。湯嫩雪濤翻茗椀。火溫香縷上衣篝。牀頭亦有閑書卷。信手拈來倦卽休。

書齋壁

平生憂患苦縈纏。菱刺磨成芡實圓。俗謂困折多者。謂菱角磨作鷓頭。天下不知誰竟是。古來惟有醉差賢。過堂未悟鐘將響。睨柱寧知壁偶全。自笑爲農行沒世。尙知驚雁落空弦。

無酒歎

不用塞黃河。不用出周鼎。但願酒滿家。日夜醉不醒。不用冠如箕。不用印如斗。但願身強健。朝莫常飲酒。

造物不少恕。虐戲逐段新。坐令古銅槥。經月常生塵。平生得酒狂。無敵百幅淋。瀉風雨疾。造物欲以醒困之。此老醒狂君未知。

舟中作

沙路時晴雨。漁舟日往來。村村皆畫本。處處有詩材。炊黍孤煙晚。呼牛一笛哀。終身看不厭。岸幘興悠哉。

秋晚

木落寺樓出。江平沙渚生。牛羊下殘照。鼓角動高城。寒至衣猶質。憂多夢自驚。羣胡方鬪穴。河渭幾時清。

西窗獨酌

卻掃衡門歲月深。殘骸況復病交侵。平生所學爲何事。後世有人知此心。水落枯萍黏破塊。霜高丹葉照橫林。一樽濁酒西窗下。安得無功與共斟。

種蔬

老翁老去尙何言。除卻翻書卽灌園。處處移蔬桑小雨。時時拾礫繞頽垣。江鄉地暖根常茂。旱歲蟲生葉未繁。四壁愈空冬祭近。更催穉子牧雞豚。

新治暖室

小堂穩暖紙窗明。低幌圍爐亦已成。日閱藏經忘歲月。時臨閣帖雜眞行。詩才退後愁酣戰。酒量衰來喜



細傾從此過冬那復事。夜深時聽雪來聲。

歲晚

無窮世事浩難量。歲晚沉綿臥草堂。短褐坼圖移曲折。故書經蠹失偏傍。賣刀擬買春耕犢。挾筴曾忘舊牧羊。點檢生涯還自笑。菜畦殘葉帶新霜。

吳中冬蔬常茂。

齋中弄筆偶書示子聿

左右琴樽靜不譁。放翁新作老生涯。焚香細讀斜川集。候火新烹顧渚茶。書爲半酣差近古。詩雖苦思未名家。一窗殘日呼愁起。裊裊江城咽莫笳。

新籬

新籬三面北通門。藤架陰中細路分。天雨淡青成卵色。水波微皺作靴紋。參差村舍穿林出。縹渺漁歌隔浦聞。忽覺楚鄉來眼底。欲題幽句弔湘君。

村興

身老交情見。孫生口數添。園丁上半米。村婢博蚤鹽。柜妝堆盤白。饅餠出釜甜。閉門君勿諠。衰病正相兼。

小圃獨酌

少時裘馬競豪華。豈料今爲老圃家。數點霏微社公雨。兩叢閒淡女郎花。詩成枕上常難記。酒滿街頭卻

易賒自笑邇來能用短。只將獨醉作生涯。

春日

方池激激碧波平。曲徑纖纖細草生。席地幙天君但醉。苦無多日是清明。  
雪山萬疊看不厭。雪盡山青又一奇。今代江南無畫手。矮牋移入放翁詩。  
怕見公卿嬾入城。野橋孤店跨驢行。天公遣足看山願。白盡髭鬚卻眼明。

新晴野步

吹盡浮雲旋作晴。郊原高下水縱橫。煙蕪漫漫如添色。谷鳥關關已變聲。  
迨酒賤時須痛飲。得人扶處儘閒行。隔湖遙指蘭亭路。鄰叟追隨羨眼明。

夜行過一大姓家值其樂飲戲作

村豪聚飲自相歡。燈火歌呼鬧夜闌。醉飽要勝飢欲死。看渠也復面團團。

貧甚賣常用酒杯作詩自戲

桃李成塵渾不數。海棠也作胭脂雨。清明未到春已空。枝上流鶯替人語。  
逢春日日合醉歸。莫笑典衣窮杜甫。生時不肯澆舌本。死後空持酹墳土。  
門前三百里湖光。天與先生作醉鄉。銀杯羽化不須歎。多錢使  
人生窟郎。

東園小飲

乞得殘骸老故山。草亭終日對孱顏。孤雲百尺起江際。幽鳥數聲鳴竹間。衆死一身今獨健。人忙萬物本常閒。此心欲語知誰聽。賴有漁樵日往還。

龜堂晚興

九日春陰一日晴。回塘閒院愜幽情。小魚出水圓紋見。輕燕穿簾折勢成。今日揜關真佚老。向來涉世亦遺民。巡簷更有欣然處。新筍初抽四五莖。

齋中雜興十首以丈夫貴壯健。慘戚非朱顏爲韻

成童入鄉校。諸老席函丈。堂堂韓有功。英傑今可想。從父有彥遠。早以直自養。始終臨川學。力守非有黨。紛紛名它師。有泚在其類。二公生氣存。千載可畏仰。

士生學六經。是爲聖人徒。處當師顏原。出當致唐虞。斯文陣堂堂。臨敵獨援枹。異端滿天下。一掃可使無。乃知立事功。先要定規模。彼雖力移山。安能奪匹夫。

公議在天下。如人有元氣。平居失護養。一旦可勝諱。神丹卒難求。百疾起如蝟。奄奄息僅屬。熟視吁可畏。大義在春秋。遺跡悲漢魏。君看徐孺子。底物視富貴。

昔我自蜀歸。耆舊已凋喪。後來二三公。尙慰天下望。千里一紙書。殷懃問亡恙。嗚呼亦已矣。遺語寄悲愴。

我亦迫桑榆。便恐無輩行。夜窗對青燈。力憊心尙壯。  
餘齡垂八十。雖憊猶強飯。正如老病馬。風沙時一噴。玉關眇何許。道里何啻萬。目中喉歷歷。欲進不能寸。  
矯首望秋空。徒羨霜鶴健。瘦骨亦何悲。吾非麒麟楛。

琅琅誦詩書。尙記兩髦髻。誰料七十年。沉滯終坎窞。炊突映茅廬。日莫煙慘慘。忍窮端已熟。撫事空自感。  
狂言悔噓臍。衆訾驚破膽。尙有愛書心。還如嗜菖歎。

去國已酉冬。忽見十頽曆。衰殘口兩齒。困阨家四壁。時看溪雲生。飽聽簷雨滴。悠然度寒暑。何處著欣戚。  
幽人豈知我。月夕聞吹笛。何當五百歲。相與摩銅狄。湖中風月佳時。每聞笛聲。凄甚。莫知何人。意其隱君子也。

扁舟東下峽。日月去若飛。當時筆硯舊。久已晨星稀。俊逸如伯渾。簡詣如知幾。夫高鬼神惡。回首萬事非。  
我欲泝黃牛。買屋居青衣。九原不可作。哀哉誰與歸。

荷鉏草堂東。藝花二百株。春風一朝來。白白兼朱朱。南列紅薇屏。北界綠芋區。偃蹇雙松老。森聳萬竹隴。  
餘地不忍蕪。插援引瓠壺。何當拂東絹。畫作山園圖。  
閒居寂無客。柴門晝常關。孤舟小於葉。放浪煙水間。樹暗楊梅村。露下白蓮灣。釣魚樵風溼。買酒石帆山。  
向來支許輩。恐亦無此閒。道逢若耶叟。握手開蒼顏。

古北安西志未酬。人間隨處送悠悠。騎驢白帝城邊雨。挂席黃陵廟外秋。大網截江魚可膾。高樓臨路酒如油。老來無復當年快。聊對丹青作臥遊。

讀蘇叔黨汝州北山雜詩次其韻

暑耘日炙背。寒耕泥沒腳。衆人占膏腴。我獨治磽确。力盡功未見。厥土但如昨。豈惟窘糠粃。直恐轉溝壑。今年雨暘時。天如相耕穫。屋傾未暇扶。且復補滌落。

祠官粟一囊。不贍驅七尺。前年蒙寬恩。例許乞骸骨。聯翩三兒子。俱作鶴雀碧。賦祿雖尙遠。亦足慰衰白。幅巾茆簷下。稱病謝來客。從今門前路。永掃車馬跡。

德孫秀眉宇。慨然修初服。枯腸貯詩書。十飯九不肉。成童將覓舉。想見袍立鵠。先澤儻未衰。豈無五秉粟。汝能記吾言。併以告阿福。閉門勿雜交。一經萬事足。

枕上作

蕭蕭白髮臥扁舟。死盡中朝舊輩流。萬里關河孤枕夢。五更風雨四山秋。鄭虔日笑窮耽酒。李廣何妨老不侯。猶有少年風味在。吳牋著句寫清愁。

示友

道向虛中得。文從實處工。凌空一鷲上。赴海百川東。氣骨眞當勉。規模不必同。人生易衰老。君等勿忽忽。

開東關路北至山脚因治路傍隙地雜植花草

清溝東畔翦秦菅。雖設柴門盡日關。遠引寒泉成碧沼。稍通密竹露青山。幽花泣露開仍落。好鳥穿林去復還。更上橫岡吾所愛。小兒試覓屋三間。

父子追隨一笑傾。東園東畔路初成。夾栽芳草如繩直。前出籬門似砥平。春近野梅香欲動。雨餘溝水細無聲。今朝有喜誰能識。不用人扶亦自行。

病眼逢人每嬾開。正須此地洗氛埃。數枝梅向林梢出。一脈泉從嶺背來。藤杖有時緣石磴。風爐隨處置茶杯。殘軀自笑如春草。又喜天邊斗柄回。

連日治圃至山亭又作五字

好竹千竿翠。新泉一勺冰。殘蕪襯落日。老木上寒藤。細磴欲難過。危欄曲可憑。歸時忽已暮。點點數漁燈。

歲莫書懷

世事從來不可常。把茆猶幸得深藏。牀頭酒瓮寒難熟。瓶裏梅花夜更香。薄命元知等蟬翼。畏途何處不羊腸。詩成讀罷仍無用。聊滿山家骨董囊。

初春感事

馬跡連聲是處忙。經旬無客到龜堂。水初泛溢黏天綠。梅欲飄零特地香。世事紛紛人自老。歲華冉冉日

初長百錢不辦旗亭醉。空愛鵝兒似酒黃。

先少師宣和初有贈晁公以道詩云。奴愛才如蕭穎士。婢知詩似鄭康成。晁公大愛賞。今逸全篇。偶讀晁公文集。泣而足之。

士不逢時勇退耕。閉門自號景迂生。遠聞佳士輒心許。老見異書猶眼明。奴愛才如蕭穎士。婢知詩似鄭康成。早孤遇事偏多感。欲續殘章涕已傾。

### 追感往事

諸公可歎善謀身。誤國當時豈一秦。不望夷吾出江左。新亭對泣亦無人。

紹興辛酉。予年十七矣。距今已六十年。追感舊事作絕句。

常憶初年十七時。朝朝烏帽出從師。與計子威輩。同從鮑季和先生。晨興必具帽帶而出。忽逢寒食停供課。正寫祭書作贖碑。

### 雨晴風日絕佳。徒倚門外。

茶醞無端廢午眠。杖藜信步到門前。青裙溪女結蠶卦。白髮廟巫催社錢。

章老三年病方死。吳翁一夕呼不醒。獨有此身頑似鐵。倚門常看莫山青。章吳皆鄰人。以去冬死。

### 春遊

春風隄上草萋萋。草軟沙平護馬蹄。似蓋微雲纔障日。如絲小雨不成泥。千秋觀裏逢新燕。九里山前聽

午雞道憶舊遊愁滿眼。綠船曾繫畫橋西。

春雨

狼藉殘花滿地紅。擁衾孤夢雨聲中。人生十事九堪歎。春色三分二已空。但有老盆傾濁酒。不辭衰鬢對青銅。長貧博得身強健。久矣無心咎化工。

藥爐茶竈淡生涯。聽雨猶能惜物華。蘸岸頓添三尺水。沾泥不貸一城花。問摩病眼開書卷。時傍危欄弄釣車。稚子孤行八千里。喜聞炊熟可還家。家。僮自行在來報。子布寒食前可到。家。唐人以寒食前一日爲炊熟。

自笑平生嬾自真。閉門高枕動兼旬。海棠千斤已隨水。杜宇一聲無復春。綠酒盈樽足忘老。朱櫻上市正嘗新。今朝雨止通溪路。又向沙頭岸幅巾。

三月十六日至柯橋迎子布東還

江國常年秋鴈飛。吾兒遠客寄書稀。道途一見相持泣。鄰曲聚觀同載歸。草草杯盤更起舞。匆匆刀尺旋裁衣。從今父子茆簷下。回首人間萬事非。

我似傷禽帶箭飛。更憐汝作鴈行稀。異時恐抱終身恨。此日寧甘徒步歸。萬里外應勞遠夢。三年前已挂朝衣。斷編蠹簡相從老。絕念功名亦未非。

初夏野興



扇墮巾欹午夢回。鳴鳩又喚雨絲來。數行褚帖臨窗學。一卷陶詩傍枕開。糠火就林煨苦筍。蜜甕沉井漬青梅。艾人行復巍然出。老大難堪節物催。

衡門

曲徑衡門短短籬。槐楸陰裏倚筇枝。老來百事不入眼。惟愛青山如舊時。

朝飢示子聿

水雲深處小茆茨。雷動空腸慣忍飢。外物不移方是學。俗人猶愛未爲詩。生逢昭代雖虛過。死見先親幸有辭。八十到頭終強項。欲將衣鉢付吾兒。

晨興

小雨過郊墟。晨興一事無。殘榴重結葉。新燕續生雛。書細猶能讀。行遲漸要扶。蔬畦恐蕪沒。且復課僮奴。

西村

亂山深處小桃源。往歲求漿憶叩門。高柳簇橋初轉馬。數家臨水自成村。茂林風送幽禽語。壞壁苔侵醉墨痕。一首清詩記今夕。細雲新月耿黃昏。

放歌行

少年不知老境惡。意謂長如少年樂。朝歌夜舞狂不休。逢人欲覓長生藥。三二十年底難過。屈指朋儕餘

幾箇就令未死身日衰。朱顏已去誰能那。人間萬事如奕碁。我亦曾經少壯時。兒曹紛紛不須校。歲月推遷渠自知。

閉戶

收身歸死鏡湖傍。閉戶悠悠白日長。巷僻斷非容駟路。腸枯那有蹴蔬羊。書生正可蹈東海。世事漫思移太行。睡起不知天早暮。坐看螢度篆盤香。

長飢

病臥窮閭負聖時。本來吾道合長飢。朝不及夕未妨樂。死何如生行自知。早年休學仗下馬。末路幸似泥中龜。煙波一葉會當逝。吹笛高人有素期。

山齋書事

山榴子結又重開。巢燕雛飛卻續回。燕有三生雛乃去者。雨足人畦千頃稻。日長風舞一庭槐。浩歌縱酒愁仍在。作意觀書睡已來。常恨流年不相貸。若爲更著莫蟬催。

晚至新塘

青鞵隨意出柴荆。聊向南唐曳杖行。歸鳥已從煙際沒。斷虹猶在柳梢明。城頭層塔凌空立。浦口孤舟並岸橫。向道有詩渾不信。爲君擁鼻作吳聲。

早秋南堂夜興

水注橫塘藻荇香。候蟲唧唧滿空廊。風前落葉紛可掃。天際疎星森有芒。夜漏漸長愁少睡。秋衣未製怯新涼。明朝知有欣然處。寫得黃庭又幾行。

新涼書懷

藥物扶持病少蘇。殘年不恨老菰蘆。潦收溪澗魚爭售。歲樂村場酒易沽。無日楳林無墜葉。楳木自夏至秋。日有落

葉。不可勝掃。有時燕戶有新雛。今年燕屢生雛。七月望猶未止。秋風礫起扁舟興。安得州家復鏡湖。

鄰曲今年又有年。垂髻戴白各欣然。先輸官庾無逋賦。共賽神祠有社錢。退傅寄聲情縝密。連得周丞相書。細字滿幅。

燒香

晦翁入夢語蟬聯。昨夕夢朱元晦甚款。燈前細與兒曹說。蠹簡猶堪數世傳。

枕上

寶熏清夜起氤氳。寂寂中庭伴月痕。小斲海沉非弄水。旋開山麝取當門。蜜房割處春方半。花露收時日未暾。安得故人同晤語。一燈相對看雲屯。

山園書觸目

山近雲生易。人稀鳥下頻。瘦篁穿石竅。古蔓絡松身。熟摘巖邊果。乾收澗底薪。經過不相識。喚作避秦人。

村舍

篠屋楓林下。山中人以篠覆舍。厚密過于茅。柴門艾浦旁。先鳴雞膈膊。徐上日蒼涼。服藥貧寧輟。觀書老有常。仍須教

童穉。世世力耕桑。

生理嗟彌薄。吾居久未完。蝶飛窗紙碎。龜坼壁泥乾。小雨牛欄溼。微霜碓舍寒。晚禾蟲獨少。鄰里共相寬。

今年晚禾苦蟲蛇。予鄉獨免。

對食戲詠

一飽欣逢歲小穰。時憑野餉誑枯腸。橙黃出白金蠶美。菰脆供盤玉片香。客送輪囷霜後蟹。僧分磊落社前薑。秋來幸是身強健。聊爲佳時舉一觴。

懷昔

偶住人間日月長。細思方覺少年狂。衆中論事歸多悔。醉後題詩醒已忘。蠶作鯨吞吁莫測。谷壩山塹浩難量。老來境界全非昨。臥看綈簾一縷香。

寶神

歲熟鄉鄰樂，辰良祭賽多。荒園拋鬼飯，高杙置神鵝。村人謂祭神之牲曰神豬神鵝。人散叢祠寂，巫歸醉臉酡。飢鴉更堪笑，鳴噪下庭柯。

小立

紅樹園廬晚，碧花籬落秋。荒陂船護鴨，斷岸笛呼牛。酒賤村村醉，山寒寺寺幽。聊須岸烏帽，小立埭西頭。

秋晚湖上

已過西成賽廟期，家家下麥不容遲。夕陽遍野人歸後，秋水生灘鷺集時。靈藥不治懷抱惡，好詩空益髩毛衰。從來未識蘇司業，愁絕西風滿酒旗。

明日又至山園天微陰再賦

河岸風檣遠，村陂牧笛長。短籬圍鹿眼，幽徑繚羊腸。照水鬚眉見，搓橙指爪香。衣裘又關念，礎杵滿斜陽。  
不寐

麗譙聽盡短長更，幽夢無端故不成。寒雨似從心上滴，孤燈偏向枕邊明。讀書有味身忘老，報國無期涕每傾。敢爲衰殘便虛死，誓先鄰曲事春耕。

弊廬

弊廬雖陋甚，鄙性頗所宜。欹傾十許間，草覆實半之。碓聲隔柴門，續火出枳籬。縛木爲齋牢，附垣作雞埒。

黃犢放林莽。蒼鵝戲陂池。備耕食于我。客主同爨炊。瓦盎設大杓。菹葢羹園葵。一飽荷鋤出。作勞非所辭。上以奉租賦。下以及我私。有錢卽沽酒。阡陌恣遊嬉。亦有扶持者。婢跣奴髻椎。欲盡恨無人。後世考此詩。

園中作

誰采桃榔寄一枝。北來萬里爲扶衰。風光最愛初寒候。懷抱殊勝未老時。閒引微泉成曲澗。盡除枯蔓補疎籬。花前自笑童心在。更伴羣兒竹馬嬉。

夜四鼓睡覺起行簷間觀新作南籬

星斗闌干天宇清。起披短褐繞廊行。葉聲颯颯飛霜重。籬影疎疎落月明。沙冷斷鴻投別浦。風高殘漏下孤城。衰遲自笑情猶在。一首新詩取次成。

客去追記坐間所言

征西幙罷幾經春。歎息兒音尙帶秦。每爲後生談舊事。始知老子是陳人。建隆乾德開王業。溫洛滎河厭虜塵。倘得此生重少壯。臨危敢愛不貲身。

追憶征西幙中舊事

大散關頭北望秦。自期談笑掃胡塵。收身死向農桑社。何止明明兩世人。小獵南山雪未消。繡旗斜卷玉驄驕。不如意事常千萬。空想先鋒宿渭橋。

憶昨王師戍隴回，遺民日夜望行臺。不論夾道帶漿滿，洛筍河魴次第來。在南鄭時。關中將吏有獻此二物者。

### 冬夜

關輔遺民意可傷，蠟封三寸絹書黃。亦知虞法如秦酷，列聖恩深不忍忘。關中將校密報事宜。皆以蠟書至宣司。

### 冬日

室中恰受一蒲團，也抵三千世界寬。上策莫如扃戶坐，苦閒猶復取書看。蔬青飯輒枝梧老，窗白爐新準備寒。堪笑此翁幽獨慣，卻嫌兒女話團圓。

### 寒夕

夜扣銅壺徹旦吟，了無人會此時心。燈殘焰作孤螢小，火冷灰如積雪深。風急江天無過雁，月明庭戶有疎碁。此身畢竟歸何許，但憶藏舟黃葦林。

### 辛酉冬至

今日日南至，吾門方寂然。家貧輕過節，身老怯增年。鄉俗謂喫冬至飯。卽添一歲。畢祭皆扶拜，分盤獨早眠。惟應探春夢，已繞鏡湖邊。

客至

何處軒車客。能來桑麥村。一奴先入市。此老自磨門。野果嘗皆澀。村醪壓尙渾。殘年亦何恨。治世作黎元。

冬夜讀史有感

短檠膏澗夜將殘。感事懷人興未闌。酌酒淺深須自度。圍棋成敗有旁觀。斷軀作飯終年飽。大布裁袍稱意寬。世上閒愁千萬斛。不教一點上眉端。

小飲梅花下作

脫巾莫歎髮成絲。六十年間萬首詩。予自年十七八學作詩。今六十年得萬篇。排日醉過梅落後。通宵吟到雪殘時。偶容後死寧非幸。自乞歸耕已恨遲。青史滿前閒卽讀。幾人爲我作著龜。

箕卜

孟春百草靈。古俗迎紫姑。廚中取竹箕。冒以婦裙襦。豎子夾扶持。插筆祝其書。俄若有物憑。對禽不須臾。豈必考中否。一笑聊相娛。詩章亦間作。酒食隨所須。興闌忽辭去。誰能執其祛。持箕畀竈婢。棄筆臥牆隅。几席亦已徹。狼籍果與蔬。紛紛竟何益。人鬼均一愚。

梅花絕句

幾年不到合江園。說著當時已斷魂。只有梅花知此恨。相逢月底卻無言。



當年走馬錦城西。曾爲梅花醉似泥。二十里中香不斷。青羊宮到浣花溪。  
聞道梅花坼曉風。雪堆遍滿四山中。何方可化身千億。一樹梅前一一作一放翁。  
小亭終日倚闌干。樹樹梅花看到殘。只怪此翁常謝客。元來不是怕春寒。  
亂髮桐帽花如雪。斜挂驢鞍酒滿壺。若得丹青如顧陸。憑渠畫我夜歸圖。  
紅梅過後到緜梅。一種春風不並開。造物無心還有意。引教日日放翁來。

送子龍赴吉州掾

我老汝遠行。知汝非得已。駕言當送汝。揮涕不能止。人誰樂離別。坐貧至于此。汝行犯宵濤。次第過彭蠡。波橫吞舟魚。林嘯獨腳鬼。野飯何店炊。孤權何岸橫。判司比唐時。猶幸免笞箠。庭參亦何辱。負職乃可恥。汝爲吉州吏。但飲吉州水。一錢亦分明。誰能肆譏毀。聚俸嫁阿惜。擇士教元禮。我食可自營。勿用念甘旨。衣穿聽露肘。履破從見指。出門雖被嘲。歸舍卻睡美。益公名位重。凜若喬嶽峙。汝以通家故。或許望燕几。得見已足榮。切勿有所啓。又若楊誠齋。清介世莫比。一聞俗人言。三日歸洗耳。汝但聞起居。餘事勿挂齒。希周有世好。敬叔乃鄉里。豈惟能文辭。實亦堅操履。相從勉講學。事業在積累。仁義本何常。蹈之則君子。汝去三年歸。我儻未卽死。江中有鯉魚。頻寄書一紙。

六日雲重有雪意獨酌

遍遊藪澤一漁舸。盡歷風霜只縵袍。天爲念貧偏與健。人因見嬾誤稱高。地連海澨濤聲近。雲冒山椒雪意豪。偶得名罇當痛飲。涼州那得直蒲萄。

舟中作

娥江西路石帆東。身寄鷗波浩蕩中。疊疊沙痕留浦岸。疎疎日影透漁篷。詩人無復同盟在。酒債何時一洗空。已迫耄年宜易感。人生五十卽稱翁。  
晤語無人與遣愁。出門聊復弄輕舟。山穿煙雨參差出。水赴陂塘散漫流。隔葉雄雌鳴谷鳥。傍林子母過吳牛。數家清絕如圖畫。炊黍何妨得小留。

湖村春興

桑柘相望雨露新。桃源自隱不緣秦。稻陂正滿初投種。蠶子方生未忌人。酒借鵝兒成淺色。魚憑雲母作脩鱗。賽神歸晚比鄰醉。一笑猶關老子身。

村居書事

藥物枝梧病漸蘇。門前野老笑相呼。春深水暖多魚婢。雨足年豐少麥奴。小飲盃盤隨事具。閒行巷陌倩人扶。題詩非復羌村句。誰與丹青作畫圖。李伯時有癸月圖傳於世。

題廬陵蕭彥毓秀才詩卷後

詩句雄豪易取名。爾來閒淡獨蕭卿。蘇州死後風流絕。幾許工夫學得成。  
法不孤生自古同。癡人乃欲鏤虛空。君詩妙處吾能識。正在山程水驛中。

### 示客

一點昏燈兩部蛙。客來相對半甌茶。典衣未贖身饒蝨。治米無工飯有沙。每爲采菱浮野艇。時因賣藥宿山家。青鞋到處堪乘興。不獨雲門與若耶。

### 喜晴

葛衣初著喜新晴。寂寂虛堂一榻橫。乍坼孤花藏葉罅。晚歸雙燕拂簾旌。舞空不斷游絲直。掠地還飛落絮輕。剩欲倚闌尋好句。清笳已復動高城。

### 閒詠園中草木

翦刀葉畔戲魚回。幘子花頭舞蝶來。領略年光屬閒客。一樽自勸不須推。  
一樹山櫻鳥啄殘。懸鉤半舍亦甘酸。兒童采得爭來餉。應念衰翁舌本乾。  
綠侵小徑葦衣艸。青絡疎籬鬼帶藤。未暇開編尋本草。且將名品問山僧。

### 過鄰家

老病在臂蹠。終日不喜動。溪雲忽過前。袖手以目送。今晨光景佳。霽色入鳥哢。駕言出柴荆。暫作湖山夢。

東村望鶴巢。西阜過獾峒。父老意欣然。爲我撥春瓮。豈惟澆舌燥。亦用輓腳痛。形骸去繩檢。談笑得少縱。吳蠶初上簇。陂稻亦已種。端午數日間。更約同解纜。

九月初作

九月都門凜欲霜。羸軀恩免立鴈行。細書付吏贍初橐。和樂呼兒對古方。陋巷閉門常謝客。高齋掃地獨焚香。此生自計終何取。似有山林一日長。實錄有初橐二囊。

無客

今日了無客。翛然塵柄閒。硯涵鷓鴣眼。香斲鷓鴣斑。木落風初勁。雲低雨尙慳。西湖未暇到。臥看曲屏山。

懷故山

老怯京塵化素衣。無端拋擲釣魚磯。碧雲又見日將暮。芳草不知人念歸。萬事莫論羈枕夢。一身方墮亂書闌。岷山學士無消息。空想燈前語入微。張季長祕閣久不得書。

晚歸

無事經秋別鏡湖。詩囊隨處累奚奴。樓頭寒日低將盡。陌上殘泥踏欲無。軒冕豈容關喜慍。簞瓢亦未費枝梧。畫橋綠浦歸來晚。一釭昏燈得自娛。

題史院壁

白髮無餘鬢。蒼顏失故丹。旅遊多敗意。大屋每饒寒。出畏霜侵褐。歸乘日暖鞍。若非時得句。何以慰衰殘。苔瓮平分路。銅環半掩扉。殘蕪寒不死。敗葉落還飛。責重何由塞。愁生但念歸。非無茅一把。世事苦相違。

寄題儒榮堂

朝散大夫徐夢莘著北盟錄上之。除直祕閣。訓辭有儒榮之語。因以名堂來求賦詩。

軍容基禍廟謀疎。尚記文登遣使初。只道大功隨指顧。至今遺種費誅鋤。還朝不遣參麟筆。寓直空聞上石渠。剩辦殺青君記取。龍庭焚盡始成書。

雜興十首以貧堅志士節病長高人情爲韻

仕宦徧四方。每出歸愈貧。寒暑更質衣。笑到鄰里人。今年作史官。坐糜太倉陳。無如思歸何。日夜望絕麟。區區牛馬走。齷齪蟻蝨臣。恩深老不報。肝膽空輪囷。孟子闢楊墨。吾道方粲然。韓愈排佛老。不失聖所傳。伐木當伐根。攻敵當攻堅。坐視日月食。孰探天地全。一木信難恃。要憂大廈顛。安得孟韓輩。出爲吾黨先。聖人固多能。藝乃不以試。嗟予少貧賤。日月成坐棄。矧今耄已及。甘食而美睡。道衰朋友散。斯文凜將墜。閉戶輒竟日。孰與講仁智。厭厭生意盡。何暇議李志。少年喜結交。患難謂可倚。寧知事大謬。親友化虎兕。出仕五十年。危不以讒死。始畏囊中錐。寧取道傍李。老來多新知。英彥終可喜。豈以二三君。遂疑天下士。

昔我遊廬山。夜雨東林雪。灰深火正熟。膏滅燈半滅。童驚林虎過。僧惜澗松折。至今每追想。可解肺肝熱。那知蓬山夢。忽繼此清絕。殊勝蘇子卿。餐氈持漢節。觀人如觀玉。拙眼喜譏評。得失顧在人。玉固非所病。慶曆嘉祐間。人才於斯盛。王回僅一招。石介棄不聘。乃知天下士。成敗各有命。願君姑安之。天定豈不勝。兩山如峨眉。一水若車輞。吾昔慮其間。百里臨蒼莽。少年手藝木。條榦日夜長。咿啞駕獨轅。迢遞搖兩漿。平生會心地。今乃寄夢想。何時喚鄰翁。煙水行布網。貨財不可居。祿位不可饜。我爾本一家。何至臯闌塵。小夫謀人國。紛紛日煎熬。或謂性本惡。或謂經無褒。誤人方自此。孰如飲醇醪。清言亦自佳。遺事非徒高。魯山粹而博。韶美曠且真。石渠東觀中。久矣無若人。飛仙驂鳳鸞。豈久混世塵。空餘文章在。常與日月新。我雖不足數。疇昔忝交親。尙想秋燈下。對影敬幅巾。陳山魯山劉  
鐵鳳韶美君子尙大節。又甚惡不情。魯連故可人。用意終近名。千載高夷齊。采薇忘其生。周公述易象。所以貴幽貞。去聖雖已遠。江左見淵明。我讀飲酒詩。朱絃有遺聲。

謝韓實之直閣送燈

玉作華星綴絳繩。樓臺交映莫天澄。東都父老今誰在。腸斷當時諫浙燈。

舊友年來不作疎。華燈乃肯寄蝸廬。寧知此老蕭條甚。二尺檠前正讀書。

歎老

鏡裏蕭蕭白髮新。默思舊事似前身。齒殘對客豁可恥。臂弱學書肥失真。漸覺文辭乖律呂。豈惟議論少精神。平生師友凋零盡。鼻壘揮斤未有人。

冬曉

恩免宵興趁曉班。養慵終覺媿吾顏。浮名半世虛催老。高臥何時復得閒。兩岸夕陽漁浦市。數峯寒鷲沃洲山。扁舟來往無窮樂。此事天公豈所慳。

有懷梁益舊遊

土堠纍纍雙復隻。悠然殘夢對寒缸。亂山落日葭萌驛。古渡悲風桔柏江。虎印雪泥餘過跡。樹經野火有空腔。四方行役男兒事。常笑韓公賦下滄。

孤坐無聊每思江湖之適

世上元無第一籌。此身只合臥滄洲。觴搖漁浦蒼茫月。帆帶松江浩蕩秋。有酒人家皆可醉。無僧山寺亦閑遊。老來閱盡榮枯事。萬變惟應一笑酬。

子聿欲暫歸山陰見乃翁作惡遂不行贈以此詩

鐘鳴豈復夜行時。文字相娛賴此兒。欲去復留知汝孝。未言先泣歎吾衰。兩篇易象能忘老。百畝山畬可免飢。但報家僮多釀酒。一欄紅藥是歸期。明年春晚。史院奏書必得歸矣。

暇日弄筆戲書

草書學張顛。行書學楊風。平生江湖心。聊寄筆硯中。龍蛇入我腕。正素忽已窮。餘勢尙隱鱗。此興嗟誰同。

謝王子林判院惠詩編

王從楊廷秀甚久。

文章有定價。議論有至公。我不如誠齋。此評天下同。王子江西秀。詩有誠齋風。今年入修門。軒軒若飛鴻。人言誠齋詩。浩然與俱東。字字若長城。梯衝何由攻。我望已畏之。謹避不欲逢。一日來叩門。錦囊出幾空。我欲與馳逐。未交力已窮。太息謂王子。諸人無此功。騎驢上灞橋。買酒醉新豐。知子定有人。豈必老鈍翁。

對酒作

羨門安期何在哉。河流上拆崑崙開。白雲不與隱居老。孤鶴自下遼天來。春江風物正開美。綠浦潮平柂初起。莫吹長笛發巴陵。曉挂高帆渡湘水。世間萬變更故新。會當太息摩銅人。脫裘取酒籍芳草。與子共醉壺中春。

西湖春遊

靈隱前。天竺後。鬼削神剜作巖岫。冷泉亭中一樽酒。一日可敵千年壽。清明後。上巳前。千紅百紫爭妖妍。



琴琴鼓聲鞠場邊。鞦韆一蹴如登仙。人生得意須年少。白髮龍鐘空自笑。君不見。灞亭耐事故將軍。醉尉怒訶如不聞。

### 局中春興

天知病眼困風沙。借與蓬山閱物華。微暎已迎新到燕。輕陰猶獲欲殘花。幽窗寂寂書圍座。倦枕時時夢過家。立馬庭前還小駐。不妨閒試半甌茶。

### 春日絕句

吏來屢敗哦詩興。雨作常妨載酒行。忽見家家插楊柳。始知今日是清明。故園蛺蝶最多種。百草長時花亂開。窮巷春風元不到。一雙誰遣過牆來。桃李吹成九陌塵。客中又過一年春。餘寒漠漠城南路。只見鞦韆不見人。便恐東皇促駕回。小軒無事且啣盃。不知何處桃花落。一片飛從屋角來。楊家園裏醉殘春。醉倩傍人拾墮巾。紅紫飄零不須歎。東君渠自是行人。

### 東軒花時將過感懷

小軒風月得婆娑。盡付流年與嘯歌。細數一春今過半。正令百歲亦無多。還家常恐難全璧。閱世深疑已爛柯。只欲閉門搯倦枕。晚風無奈落花何。

社雨晴時燕子飛。園林何許覓芳菲。江山良是人誰在。天地無私春又歸。殘史有期成汗簡。修門即日挂朝衣。人生念念皆堪悔。敢效淵明歎昨非。

與兒輩泛舟遊西湖一日間晴陰屢易

逢著園林卽款扉。酌泉鬻筍欲忘歸。楊花正與人爭路。鳩語還催雨點衣。古寺題名那復在。後生識面自應稀。傷心六十餘年事。雙塔依然在翠微。

得子聿到家山後書

日日春陰愁出戶。汝今恰遇十分晴。桑林紫椹纍纍熟。稻壟青秧漫漫平。夢好定知行路健。書來深慰倚門情。柯橋道上山如畫。早晚歸舟聽鷓聲。

春晚

新綠成陰小雨時。幅巾蕭散與閒宜。燕歸赴訴經年別。鶯晚分疏出谷遲。曉枕呼兒投宿酒。暮窗留客算殘棋。翛然此意風塵表。正恐羲皇未必知。

上章納祿恩畀外祠遂以五月初東歸

身似霜松老不枯。乞骸猶得侍清都。百錢濁酒渾家醉。六月飛蟲徹曉無。美睡不愁聞客攪。出遊自有小兒扶。買山尙恐巢山笑。敢問君王覓鏡湖。

羣玉峯頭孤夢斷。五雲溪上野舟回。旁人鷗鳥自然熟。到處藕花無數開。麥飯不饜常面槁。柴門閒掩自心灰。雨來正作盆山地。不怕冥冥半月梅。此身惟有一躬耕。乞得餘年樂太平。東觀並遊收昨夢。西湖重到付來生。一堤草露明晨照。半浦荷風颭晚晴。歷歷歸途皆勝事。江亭先聽櫂歌聲。

初歸雜詠

雪滿漁簑雨墊巾。超然無處不清真。胸中那可有一事。天下故應無兩人。騎馬每行秋棧路。喚船還渡莫江津。酒樓僧壁留詩徧。八十年來自在身。小園五畝翦蓬蒿。便覺人間迹可逃。盡疏珍禽添爾雅。更書香草續離騷。藥苗可斲攜長鏡。黍酒新成壓小槽。老入鷓行方徹悟。一官何處不徒勞。乞得身歸且浩歌。蕭然生世寄漁簑。茶甘半日如新啜。墨妙移時不再磨。山寺蹋雲頻獨往。隣家穿竹自相過。棊枰勝負能多少。堪笑傍人說爛柯。

遊山

古寺不來久。入門空歎嗟。僧亡猶見塔。樹老已無花。世事雖難料。吾生固有涯。慙慙一梳月。十里伴還家。

美睡

老來胸次掃崢嶸。投枕神安氣亦平。漫道布衾如鐵冷。未妨鼻息自雷鳴。天高斗柄闌干繞。露下雞埒隔  
膊聲。俗念絕知無起處。夢爲孤鶴過青城。

連陰欲雪排悶

先生經句甌生塵。藜藿不污白氎巾。魯連敢謂天下士。摩詰要是山中人。王維·自稱溪從灘瘦愈刻厲。  
山自木落增嶙峋。雲重惟愁雪欲作。梅花忽報一枝春。

晚歲幽興

殘年欲遂迫期頤。追數朋儔死已遲。卜塚治棺輸我快。染鬚種齒笑人癡。近聞有以補種  
墮齒爲業者。野梅墮地草生  
後。街柳拂鞍冰泮時。滿眼雲山不須買。剩傾新釀賦新詩。

對食戲作

霜餘蔬甲淡中甜。春近靈苗嫩不斂。采掇歸來便堪煮。半銖鹽酪不須添。  
春前臘後物華催。時伴兒曹把酒盃。蒸餅猶能十字裂。餛飩那得五般來。

甲子立春前二日作

頭風初愈喜身輕。書卷時開覺眼明。養熟犬雞隨坐起。性靈烏鵲報陰晴。韭菘釘餛飩春盤好。芝朮蕪和臘  
藥成。自笑衰殘殺風景。燈時不擬入重城。

鄰曲

濁酒聚鄰曲。偶來非宿期。拭盤堆連展。淮人以名洗甌煮黎祁。蜀人以名烏犢將新犢。青桑長嫩枝。豐年多樂事。相勸且伸眉。

初春書懷

數掩蘆藩竝水居。一家全似業樵漁。春寒例謝常來客。老病猶貪未見書。馴雀正緣拋食慣。芳蘭肯爲礙門鉏。藥苗滿鉢無人共。賴有溪僧爲破除。

甫及春初日已長。偶同鄰曲集山房。囊盛古墨靴紋皺。箬護新茶帶膀方。老境不嫌來冉冉。流年直恐去堂堂。清泉冷浸疎梅蕊。共領人間第一香。

愚公不解幾安危。行盡人間惡路岐。難似車登蛇退嶺。險如舟過馬當祠。平生憂患常難測。送老安閒敢自期。一事不成應有命。惟將知止報明時。

送子虛吳門之行

相送何由插羽翰。淡煙微雨暗江干。孤懷最怯新春別。病骨難禁昨夜寒。尊酒汝寧嫌魯薄。釜羹翁自絮吳酸。此詩字字俱愁絕。忍淚成篇卻怕看。

幽居春晚

雲歸禹穴賞新晴。酒買蘭亭散宿醒。竹帶鞭移俄盛出。鶴全窠買已長鳴。故山雖媿收身晚。外物元如脫髮輕。只恐村鄰成間闊。杖藜隨處叩柴荆。  
老廢讐書病廢詩。晝閒惟與睡相宜。未尋內史流觴地。又近龐公上塚時。花發遊蜂喧院落。筍長馴鹿入藩籬。石蛇山下春如許。野老來招不用辭。

山行贈野叟

垂白衰翁住道邊。突間猶喜續炊煙。壁如龜筮難占卜。瓦似魚鱗不接連。幼學及時兒識字。官租先衆吏無權。與君俱長宣和日。握手相看一悵然。  
莫笑孤村生理微。茆茨煙火自相依。客來旋掃青苔榻。日在先關白版扉。婦女髮蚤租葉去。兒童耘麥荷鋤歸。散人世襲江湖號。剩欲溪頭借釣磯。

六言雜興

失馬詎知非福。亡羊不妨補牢。病裏正須周易。醉中卻要離騷。  
舉足加劉公腹。引手掇孫郎鬚。士氣日趨委靡。賴有二君掃除。  
廣平作梅花賦。少陵無海棠詩。正自一時偶爾。俗人平地生疑。

地廣風號木。天高日脫雲。村名步頭換。縣界驛前分。蒿艾春侵路。雞豚莫識羣。敲門就炊爨。一飯敢忘君。

春晚雨中作

冉冉流年不貸人。東園青杏又嘗新。方書無藥醫治老。風雨何心斷送春。樂事久歸孤枕夢。酒痕空伴素衣塵。畏途回首濤瀾惡。賴有雲山著此身。

枕上

病叟少安枕。驚禽無穩棲。慵占賈誼鵬。空感祖生雞。野勢風號北。窗痕月過西。元非破賊手。只合架牛犁。

山中惟梟鳴終夜雞三鳴後聞架犁則旦矣。

夏日

入戶桐陰漸覆牀。乍敷篔簹北窗涼。筠枝倚壁知身健。衣焙殘香覺日長。雨霽斷雲時聚散。風來纖草久低昂。蝶衣粉溼猶飛嬾。小駐闌干就夕陽。

久雨

梅天一日幾陰晴。對酒無聊醉不成。巧曆莫能知雨點。孤桐那解寫溪聲。林深鳥爵來無數。草茂鉏耰去即生。明日雲開天萬里。御風吾欲過青城。

復雨

催喚兒童掃綠苔。長歌清嘯興悠哉。林間子墮知梅熟。水面痕生驗雨來。往事已成孤枕夢。故人誰共一尊開。自憐未負年華在。素扇團團月樣裁。

門屋納涼

機裂齊紈如素月。牀敷蕈簟起微瀾。行人遠不分眉目。過鳥高猶響羽翰。新長庭槐夾門綠。無窮陂稻際天寬。今年項里楊梅熟。火齊驪珠已滿盤。

午睡

梅黃雨足喜初晴。投枕華胥夢已成。帳底香雲凝未散。手中書卷墮無聲。簾紋似水飛蠅避。鼻息如雷稚子驚。癡腹便便竟何有。已將嘲弄付諸生。

游昭牛圖

游昭木石師李唐。畫牛乃自其所長。出欄切聽一聲笛。意氣已無千頃荒。客居京口老益困。衣不揜脛鬚眉蒼。時時弄筆眼力健。蹠角毛骨分毫芒。我無沙堤金絡馬。拂拭此幅喜欲狂。乞骸幸蒙優詔許。置身忽在煙林傍。日落飲牛水滿塘。夜半飯牛天雨霜。但醫灌藥美水草。老巫訶禁祓不祥。願我孫子勤農桑。願汝生犢筋脈強。確聲驚破五更夢。歲負玉粒輸官倉。

出近村歸偶作



朝騎小蹇出煙村。擁路爭看八十身。似我猶爲一好漢。問君曾見幾閒人。楊梅線紫開園晚。蓴菜絲長入市新。莫笑堅頑推不倒。天教日日享常珍。

### 書事

聞道輿圖次第還。黃河依舊抱潼關。會當小駐平戎帳。饒益南亭看華山。饒益寺南亭。盡得秦華之勝。  
關中父老望王師。想見壺漿滿路時。寂寞西溪衰草裏。斷碑猶有少陵詩。華州西溪郡老杜所謂鄰縣亭子者。  
鴨綠桑乾盡漢天。傳烽自合過祁連。功名在子何殊我。惟恨無人快著鞭。  
九天清蹕響春雷。百萬貔貅扈駕回。不獨雨師先灑道。汗流滾滾入淮來。

### 新涼示子適時子適將有臨安之行

竹簾紗廚事已非。秋清初換熟縑衣。鵲驚山月栖還起。螢避溪風墮又飛。老眼漸昏書嬾讀。壯心雖在事多違。夜窗剩欲挑燈語。日倚柴門望汝歸。

### 八月四日夜夢中作

太華巉巖敷水長。白驢依舊繫斜陽。山深乳洞藥爐冷。花發雲房醅瓮香。隣叟一樽迎谷口。蠻童三髻拜溪傍。中原俯仰成今古。物外自閒人自忙。

### 明日復理夢中作意

白盡鬢髯兩頰紅。頽然自以放名翁。客從謝事歸時散。詩到無人愛處工。高挂蒲帆上黃鶴。獨吹銅笛過垂虹。閒人浪跡由來事。那計猿驚蕙帳空。

又明日復作長句自規

大學淵源不易窮。古人立志自童蒙。醉猶溫克方成德。夢亦齋莊始見功。痛哭孰能悲陷溺。力行猶足變雕蟲。太空雲翳終當散。吾道常如日正中。

村居遣興

追數交朋略散亡。臂孱足蹇固其常。一年又見秋風至。孤夢潛隨夜漏長。不辦誦經如倚相。頗能噉飯勝張蒼。回看薄宦成何味。只借朝衫作戲場。

萬里征途興已闌。三間破屋住猶寬。山蕘著雨房重斂。南燭先霜實半丹。野市秋陰更蕭瑟。書生老瘦轉酸寒。掩關也有消愁處。一卷騷經醉後看。

甲子秋八月。偶思出遊。往往累日不能歸。或遠至旁縣。凡得絕句十有二首。雜錄入彙中。亦不

復詮次也。錄三首。

早攜書劍三隨計。晚屣弓旌四造朝。心媿石帆山下叟。一生不識浙江潮。善囊藥笈每隨身。問病求占日日新。向道不能渠豈信。隨宜醉答免違人。

藥竊野老偏稱效。詩淺山僧妄謂工。懷甌鬻茶來問訊。不妨一笑寂寥中。

遣舟迎子遙因寄古風十四韻

今日坼汝書。一讀眼爲明。知汝即日歸。明當遣舟迎。想汝片帆東。翩若飛鴻征。薄莫過梅市。咿謳雙櫓聲。到家亦尙早。城樓初發更。草草一尊酒。爲汝手自傾。夜分不能寐。頓忘衰病嬰。豈惟病良已。白頭黑絲生。暫別亦不惡。益重父子情。自今日相守。北窗同短檠。六經燭久伏。百氏方縱橫。世俗擯孤學。未易口舌爭。此責在學者。草萊勿自輕。汝壯父未死。相勉在力行。

飯後偶題

環堵蕭然百慮忘。天教得飯飮枯腸。長橋鮮美桃花嫩。北苑茶新帶勝方。漠漠寒花欹晚照。翩翩孤蝶弄秋光。解衣捫腹西窗下。賴有新詩破日長。

感昔

行年三十憶南遊。穩駕滄溟萬斛舟。常記早秋雷雨霽。柁師指點說琉球。馬瘦行遲自一奇。溪山佳處看無遺。酒壚強挽人同醉。散去何曾識是誰。負琴腰劍成三友。出蜀歸吳歷百城。最是客途愁絕處。巫山下廟聽猿聲。岳陽三伏正炎蒸。爽氣淒風見未曾。白浪蹴天樓欲動。當時恨不到黃陵。

送子坦赴鹽官縣市征

父子團圓笑語譁，豈知雲散各天涯。  
長亭結束秋將晚，別酒淒涼日易斜。  
我坐老年艱就養，汝非仰祿肯離家。  
游山尚有平生意，試爲閒尋一鹿車。  
腹中欲作一小肩輿輕駛結實兩夫可舉者以備山行。

寄子坦

目斷西陵細靄中，津亭想汝繫孤篷。  
頗憂昨莫雲吞日，俗以黑雲接落日爲風雨之候。猶幸今朝雨壓風。  
就食亦知難戀戀，挂帆終恨太匆匆。  
塞沙不是無來雁，頻寄書歸問老翁。

書感

老荷寬恩許退耕，絲毫無報亦何情。  
民貧樂歲尙艱食，道喪異端方肆行。  
黨禍本從名輩出，弊端常向盛時生。  
古人骨冷青松下，誰起英魂與細評。

道興

兔徑游觀足，蝸廬臥起寬。  
垂名千古易，無媿寸心難。  
燈火娛清夜，風霜變早寒。  
一經家世事，吾興未應闌。

農舍

三農雖隙亦匆忙，稼事何曾一夕忘。  
欲曬胡麻愁屢雨，未收蕎麥怯新霜。  
神農之學未爲非，日夜勤勞備歲飢。  
雨畏禾頭蒸耳出，潤憂麥粒化蛾飛。

萬錢近縣買黃犢。襜褕行當東作時。堪笑江東王謝輩。唾壺麈尾事兒嬉。  
杜門雖與世相遠。未許人嘲作計非。長綆雲邊牽犢過。小舟月下載犁歸。

### 出遊

一樽隨處可開顏。此事深疑造物憊。地可登臨多恨遠。身常強健又須閒。山圍小市煙初斂。霜著橫林葉  
半殷。徙倚闌干君勿厭。日斜猶及棹舟還。

漁村酒市本無期。小蹇扁舟信所之。丹葉滿林霜落後。紫萍黏塊水枯時。山林閒寂歸雖早。齒髮衰殘病  
已遲。努力及時謀自適。錦囊多貯莫秋詩。

山有籃輿步有舟。放翁身健得閒遊。牛羊點點日將夕。蒲柳蕭蕭天正秋。細徑僧歸雲外寺。疎燈人語酒  
家樓。歸途更愛湖橋月。獨倚闌干爲小留。

### 風雨夜坐

寒風淒緊雨空濛。舍北新丹數葉楓。欹枕舊遊來眼底。掩書餘味在胸中。松明對影談玄客。篠火圍爐采  
藥翁。君看龜堂新境界。固應難與俗人同。

### 舟中曉賦

木落霜清水鳥呼。扁舟夜泊古城隅。吹殘畫角鐘初動。低盡寒空斗欲無。浪迹已同鷗境界。遠遊方羨雁

程途。高橋健席從今始。遍歷三湘與五湖。

漁家

江上漁家水蘸扉。閒雲片片傍苔磯。釣收鷺下虛舟立。橋斷僧尋別徑歸。海近岡巒多迤邐。天寒霧雨正霏微。羊裘老作桐江叟。點檢初心幸未違。

感昔

神女祠前猿夜鳴。相公溪上草初生。重遊惟有西窗夢。一點燈青夢不成。白帝城邊鶯亂啼。憶騎瘦馬踏春泥。老來感舊多悽愴。孤夢時時到灤西。小益晨裝雨作泥。南沮涉水馬長嘶。山腰細棧移新路。驛壁流塵閣舊題。曾從征西十萬師。白頭回顧只成悲。雲深駱谷傳烽處。雪密嶓山校獵時。少時失腳利名間。寸步何曾不險難。造物恐人渾忘卻。夢中憂患尚如山。

客懷

客懷病思兩悽悽。瘦馬長韉濺雪泥。道左忽逢曾宿驛。壁間閒看舊留題。村醅酸薄陳山果。旅飯蕭條嚼凍齏。何處人間非夢境。恍然重到劍關西。

抱瓮窮園叟。還山老布衣。死邊常得活。鬧處偶容歸。恐釣魚吞餌。棋愛客墮機。此心君會否。洗盡百年非。  
庭曠多延月。齋空半貯雲。松聲行路共。泉脈近鄰分。采藥九蒸曬。朝眞三沐熏。林間有叢杞。繞屋夜猿猿。

探梅

歲月相尋豈有窮。早梅喚醒醉眠翁。坐中酒量人人別。花底春風處處同。白帝城邊微雪過。青衣江上夕陽紅。錦囊空復殘詩在。分付悲歡一夢中。

社飲

東作初占嗣歲宜。蠶官又近乞靈時。傾家釀酒無遺力。倒社迎神盡及期。先醉後醒驚老態。路長足蹇歎歸遲。西村漸過新塘近。宿鳥歸飛已滿枝。

自近村歸

雪晴村路尚殘泥。茅屋清寒正要低。野渡船虛飛鳥集。煙村路近蹇驢嘶。堅頑那復愁空囊。老健猶能伴架犁。蹴榻不僵君會否。更須百瓮享黃齋。

除夜

野水楓林屋數椽。寒爐無火坐無氈。殘燈耿耿愁孤影。小雪霏霏送舊年。椒酒辟瘟傾潑灑。藍袍俘鬼舞跼躄。從今供養春齋美。莫羨愚公日萬錢。

自開歲陰雨連日未止

江雲漠漠雨昏昏。歸老山陰學灌園。十里羊腸僅通路。三家鑿腳自成村。應時膊飢聊從俗。耐久鍾馗儼在門。近縣傳聞頗多盜。呼兒插棘補頽垣。俗有年膊飢之語。予貧甚。今歲真不能易鍾馗。

枯菊

翠羽金錢夢已闌。空餘殘葉抱枝乾。紛紛輕薄隨流水。莫與桃花一樣看。

春雨

倚闌正是受斜陽。細雨霏霏渡野塘。本爲柳枝留淺色。卻教梅蕊洗幽香。小露蝶粉初何惜。暫澀鶯聲亦未妨。造物無心寧徧物。憑誰閒與問東皇。

草堂

幸有湖邊舊草堂。敢煩地主築林塘。辛幼安每欲爲築舍。予辭之遂止。漉殘醅瓮葛巾溼。插遍野梅紗帽香。風緊病身那可敵。春閒晝漏不勝長。浩歌陌上君無怪。世譜推原自楚狂。陸氏舊譜云本出接輿後。

嘗花

湖上花光何處尋。朱朱白白自成林。衰年何預傷春事。閒客猶懷愛物心。欲墮每愁風驟起。正開卻要日微陰。蘭亭禹廟平生事。一榼芳醪莫厭深。



小雨

小雨明復闇。餘寒去又來。新苔緣砌上。殘杏過籬開。垂老身餘幾。逢春心尙孩。江天近寒食。林外過輕雷。

莫春

辛夷海棠俱作塵。鱖魚蓴菜亦嘗新。一聲布穀便無說。紅藥雖開不屬春。

春晚小飲

病臥書齋一味慵。今年春事又成空。籊龍奮迅風雷際。木筆凋零霧雨中。平野草深黃犢健。斷溪水長畫船通。小兒偶得官樓酒。罌醢鱖乾一醉同。

初夏幽居雜賦

曲曲羊腸徑。疎疎鹿眼籬。渴蜂窺硯水。狂蝶入書帷。一枕輕安夢。數聯蕭散詩。餘生已過足。不必到期頤。關地剪蓬蒿。何曾歎作勞。藥名尋本草。蘭族驗離騷。北澗穿籬過。南山出屋高。回頭看富貴。何啻一秋毫。

雨

家近蓬萊白玉京。草堂東望不勝清。初驚野色昏昏至。已見波紋細細生。殘醉頓消迎亂點。微吟漸苦入寒聲。只愁今夕虛簷滴。又對青燈夢不成。

龜堂初暑

淪漪一曲遶茆堂。葛帳紗巾喜日長。多事林鳩管晴雨。依人海燕度炎涼。深枝著子纍纍熟。幽草開花冉冉香。安得此時江海上。與君袖手看人忙。

初夏閒步村落間

薄雲縉日不成晴。野水通池漸欲平。綠葉忽低知鳥立。青萍微動覺魚行。醉遊放蕩初何適。睡起逍遙未易名。忽遇湖邊隱君子。相攜一笑慰餘生。

夜興

鬢毛飽受雪霜侵。一榻蕭條寄故林。林簷滴回羈枕夢。城笳喚起塞垣心。平生恥露囊中穎。垂老甘同爨下琴。燈燼欲殘看瘦影。不妨袖手坐愔愔。

秋近

石榴萱草併成空。又見墻陰萋葉紅。茶齏頗妨千里夢。簟涼初怯五更風。新瓜落刀冰盤裏。晚燕添巢畫閣中。身健流年供可樂。故人自欠一尊同。

秋懷

園丁傍架摘黃瓜。村女沿籬採碧花。城市尚餘三伏熱。秋光先到野人家。迢迢枕上望明河。帳薄簾疎奈冷何。不惜衣篝重換火。卻緣微潤得香多。

詩如水淡功差進，身似雲孤累轉輕。落葉擁籬門巷晚，一枝藤杖且閒行。

### 示子通

翁老兒窮不自支，此心幸與古人期。勞兼薪水奴初去，典到琴書事可知。藥杵無聲工忍病，米囤可掃恥言飢。餘年有幾須相守，萬里煙霄付異時。

### 小雨

赤日炎熇勢未回，川雲忽起亦佳哉。舟衝細雨橋陰出，蝶弄微風草際來。櫻柳不禁朝暮久，芙渠猶有二三開。一年光景煩君看，何怪昆池有劫灰。

### 貧甚戲作絕句

處窮上策更誰如，日晏猶眠爲腹虛。飢則臥不起，貧者之常也。尙闕鄰僧分供米，敢煩地主送園蔬。

貸米東村待不回，鉢盂過午未曾開。飢腸雷動尋常事，但誤生臺兩鵲來。北齋孤坐破三更，庭戶無人有月明。數種袴襦秋未贖，羨他鄰巷搗衣聲。糴米歸遲午未炊，家人竊閱乃翁飢。不知弄筆東窗下，正和淵明乞食詩。

### 秋夕

浴罷紗巾出草堂，一枝瘦杖倚桄榔。蟬吟古柳聲相續，月入幽扉影正方。頻約僧基秋漸健，稍增書課夜

初長亦知桑落宜。麴酒太息何時辦一觴。

病中戲詠

八十行加二。清秋住故山。新涼足眠睡。舊疾害躋攀。雪白紛殘鬢。梅黃染病顏。疲牛臥斜日。羸馬噉枯菅。貧廢兒孫學。慈生僕妾頑。贖衣時已迫。貸米歲方艱。齋鉢僧嘲薄。盤飧客笑慳。從今謝還往。惟有掩柴關。

秋光

小圃秋光潑眼來。老人憑几興悠哉。翩翩蝴蝶成雙過。兩兩蜀葵相背開。雨足疎籬引荒蔓。人稀幽徑長新苔。貧家竈冷炊煙晚。待得鄰翁賣藥回。

秋夜思南鄭軍中

五丈原頭刁斗聲。秋風又到亞夫營。昔如埋劍常思出。今作閒雲不計程。盛事何由觀北伐。後人誰可繼西平。眼昏不禁陳編得。挑盡殘燈不肯明。

幽興

蘭渚前頭湖水清。了無俗事敗幽情。雨淋茅屋隨時補。日射油窗特地明。庭樹晚鶯窺戶語。鄰園秋筍過籬生。芥菘漸美鹽醃足。誰供貧家一釜羹。

法雲僧房

八十衰翁有底忙。水邊山際亦佺佺。清溪橋斷舟橫岸。小塢梅殘雨漬香。數點青燈經野市。一爐軟火宿僧房。自嫌尙有人間意。卻爲春寒怯夜長。

對酒

密篠持苦屋。寒蘆用纖簾。斃肩柴熟罷。東坡炙豬肉訣云。淨洗鍋。少著水。樂頭罨煙。焰不起。蓴菜鼓初添。黃甲如盤大。紅丁似蜜甜。街頭桑葉落。相喚指青帘。

雨夜起行室中

老疾逢秋體自輕。披衣暫起繞牀行。隙風不斷燈將滅。簷雨如傾階欲平。鰥叟何嘗愁枕冷。病夫未免待窗明。拂書洗硯龜堂上。幽事誰知日有程。

閏月辛酉壬戌連日風雨癸亥早晴

殘雨在簷猶點滴。斷雲銜日正蒼涼。清愁偏向莫年覺。少睡不禁秋夜長。簾影漸生禽語樂。杵聲初動藥塵香。諸兒作吏俱安否。那得乘風至汝傍。子諸子伯叔。季皆出仕。

偶與客話峽中舊遊

我昔旅遊秋雨細。建平城東門欲閉。主人迎勞語蟬聯。小婦春炊縞衣袂。長年三老半醉醒。蜀估峽商工算計。須臾燈闌人欲眠。泊船卸馱猶相繼。山深水峻近蠻獠。往往居民雜椎髻。卽今屈指四十年。懷抱淒

涼真隔世。

客中作

江天雨霽秋光老。野氣穿雲淨如掃。投空飛鳥雜落葉。極目斜陽襯衰草。平沙爭渡人鵠立。長亭下馬障泥溼。纍纍紅果絡青篾。未霜先摘猶酸澀。客中雖云貪路程。買薪糴米常留行。茆簷獨坐待童僕。不聞人聲聞磴聲。

遊近村

行歷茶岡到藥園。卻從釣瀨入樵村。半衰半健意蕭散。不雨不晴天晏溫。薯蕷傍籬寒引蔓。菖蒲絡石瘦生根。參差燈火茅簷晚。童稚相呼正候門。

客從城中來

客從城中來。相視慘不悅。引杯撫長劍。慨歎胡未滅。我亦爲悲憤。共論到明發。向來酣鬪時。人情願少歇。及今數十秋。復謂須歲月。諸將爾何心。安坐望旄節。

村興

結宇楓林下。久窮吾所安。村深事自簡。累少食差寬。雨闌牛眠屋。泥深鴨滿園。呼兒擣粉餌。準擬賽鄱官。

秋晚書懷

頽然兀兀復騰騰。萬事惟除死未曾。無奈喜歡閒弄水。不勝頑健遠尋僧。喚船野岸橫斜渡。問路雲山曲折登。卻笑吾兒多自在。夜分未滅讀書燈。

夢中作

繫馬朱橋上酒樓。樓前敷水拍堤流。春風又作無情計。滿路楊花輓雪球。大慶橋頭春雨晴。行人馬上聽鶯聲。祥符西祀曾迎駕。惆悵無人說太平。

初冬絕句

鱸肥菰脆調羹美。麪熟油新作餅香。自古達人輕富貴。例緣鄉味憶還鄉。道途冬暖衣裳省。村落年豐鼓吹喧。下麥種麪無曠土。壓桑接果有新園。

卽事

雲起山容改。潮生浦面寬。寒鴉先雁到。烏桕後楓丹。年邁狐裝帽。時新豆搗糲。非關嗜溫飽。更事耐悲歡。遯居無外事。白日不勝長。詩爲窮差進。琴雖老未忘。映窗精試墨。閉閣苦留香。年少無相誚。功名事更狂。

題詹仲信所藏米元暉雲山小幅

俗韻凡情一點無。開元以上立規模。鏡湖老監空揮淚。想見楚江清曉圖。徽宗見元暉楚江清曉圖。大加賞歎。一棹朝南莫北風。奇峯倒影綠波中。定知漸近三山路。認得漁翁是放翁。

雜興

此身漂蕩等流槎。又向江村送歲華。急雨遇寒凝作雪。明燈無燧結成花。座懸鏡古森毛髮。甌聚茶香爽齒牙。況是貧家多樂事。阿開漸學手吒叉。

稽山行

稽山何巍巍。浙江水湯湯。千里亘大野。勾踐之所荒。春雨桑柘綠。秋風秔稻香。村村作蟹椴。處處起魚梁。陂放萬頭鴨。園覆千畦薑。舂碓聲如雷。私債逾官倉。禹廟爭奉牲。蘭亭共流觴。空巷看競渡。倒社觀戲場。項里楊梅熟。采摘日夜忙。翠藍滿山路。不數荔枝筐。星馳入侯家。那惜黃金償。湘湖蓴菜出。賣者環三鄉。何以共烹煮。鱸魚三尺長。芳鮮初上市。羊酪何足當。鏡湖滂衆水。自漢無旱蝗。重樓與曲檻。漱澗浮湖光。舟行以當車。小繖遮新粧。淺坊小陌間。深夜理絲簧。我老述此詩。妄繼古樂章。恨無季札聽。大國風泱泱。

病後作

骨相坐一寒。仕宦經百譎。晚入文昌省。又坐頰言噴。詔書復收召。付以大典冊。期年甫奏篇。皇恐亟自劾。歸來稽山下。三食新穫麥。草屨布裙襦。徒步老阡陌。今年疾屢作。恍若將歸客。道士言犯土。拜章安舍宅。巫言神去幹。剽紙招魂魄。把臂忽自悟。此豈屋漏脈。盡去囊中藥。默觀鼻端白。正氣徐自還。鬼子何足磔。

道院雜興



征途暗盡舊貂裘。歸臥林間喜自由。體倦尙憑書引睡。心安不假酒攻愁。丹爐弄火經年熟。竹院聽琴竟日留。今日理髻還一笑。白間時有黑絲抽。

早歲知聞久已空。巋然猶有灞城翁。東樓誰記傾春碧。敘州。蓋古戎州也。有東樓廚醢。本名重碧。范至能易爲春碧。北嶺空思擘

晚紅。北嶺在福州。予少時與友人朱景參會。嶺下僧舍。時秋。荔子獨晚紅在。冉冉流年霜鬢外。纍纍荒塚綠蕪中。琳房何日金丹熟。老

鶴猶堪萬里風。

### 山村經行因施藥

閒行偶復到山村。父老遮留共一樽。曩日見公孫未晡。如今已解牧鷄豚。逆旅人家近野橋。偶因秣蹇暫逍遙。村翁不解讀本草。爭就先生辨藥苗。

### 歎老

身歷遘回事萬端。天教林下養衰殘。文編似是他人作。書卷如曾隔世觀。久已悠悠置恩怨。況能一一記悲歡。牀頭周易眞良藥。不是書生強自寬。

### 戲遣老懷

平生碌碌本無奇。況是年垂九十時。阿囷略如郎罷老。穉孫能伴太翁嬉。花前騎竹強名馬。階下埋盆便作池。一笑不妨閒過日。歎衰憂死卻成癡。

舊襲家風號散人。晚承恩詔賜閒身。放狂泥酒都忘老。厚價收書不似貧。霜曉方驚羣木脫。春晴又喜一花新。先生偶出人難遇。陌上爭先看角巾。

新晴

夜雨空階滴到明。山雲忽斂作新晴。門前月淡有簷影。牆外泥乾無屐聲。與世日疎愁易遣。入春得曠疾差平。使當剩作滄洲趣。寄語沙鷗勿敗盟。

新歲

改歲鍾馗在。依然舊綠襦。老庖供餽飣。跣婢暖屠蘇。載糗送窮鬼。扶箕迎紫姑。兒童欺老瞶。明燭聚呼盧。新曆歎

新曆在手心怕開。日月連翩相續來。黃金散盡白一快。白髮不貸真可哀。無爲健羨廣成子。千二百歲終有死。膠不可黏西去日。刀何由翦東流水。酒無醇醑但痛飲。市醞上尊俱醉耳。堂堂七尺死卽休。不飽烏鳶飽螻蝻。

東籬

漫道深居書掩關。東籬栽接不曾閒。每因清夢遊敷水。自覺前身隱華山。花發時時攜綠酒。客來往往羨朱顏。藥爐安著猶無地。擬展茆茨一兩間。

東偏隙地作疎籬。遇興無非一笑時。陪客投壺新罰酒。與兒鬪草又輸詩。山桃溪杏栽俱活。藥鑿漁竿動自隨。家事猶令罷關白。固應黜陟不曾知。

村夜

入春雨雪無休日。雨止猶陰未快晴。萬竅怒號風不定。半輪斜照月微明。百年辛苦農桑業。五處睽離父子情。但得平安已爲幸。孤燈殘火過三更。時子歲調行在。子龍阻風西陵。子修在閩。子坦在海昌。子與子布子適守舍。

夢中作

世事何由可控搏。故山歸臥有餘歡。澗泉見底藥根瘦。石室生雲丹竈寒。人遠忽聞清獻起。山閒頻得異書看。一朝出赴安期約。萬里煙霄駕紫鸞。

新晴

寂寂房櫳鳥雀聲。熏籠茶竈正施行。繁花滿樹春纔半。斜日穿雲雨乍晴。引睡書橫猶在架。圍棋客散但空枰。病懷莫道傷幽獨。小榼芳醪手自傾。挂冠湖上遂吾初。捫腹消搖適有餘。羹煮野蔬元足味。屋茨生草亦安居。市墟分熟通賒酒。鄰舍情深許借驢。更喜新晴滿窗日。籤題重整一牀書。

春日雜賦

羈懷病思正厭厭。詩卷漁竿信手拈。老境何嘗忘一笑。春風也解到窮閭。殘花滿地無餘萼。新筍掀泥已露尖。轉老轉窮君勿笑。熊蹯魚腹豈容兼。

鬢毛八九已成霜。此際逢春只自傷。苦雨不容花抵敵。餘寒猶賴酒禁當。退紅衣焙熏香冷。古錦詩囊覓

句忙。堪笑散人閒事業。西窗容易又斜陽。唐樂府云。牀上小牀。韶州新退紅。

江湖放浪水雲人。藥物枝梧夢幻身。移竹南窗初試筍。掃花北陌旋成塵。窮忙自笑常終日。老健猶能不負春。未遂初心惟一事。乞薪賒米惱吾鄰。

乞得身歸刻曲邊。衡門茆舍其蕭然。向來誤計守書冊。此日遺愁無酒錢。俗客妒閒來衮衮。流年欺老去翩翩。梨花楊柳清明過。且向江頭剩放顛。

梅市莫歸三山

白日蠻童佩一壺。壺乾時亦復村酤。橫林露澹遠猶見。莫鶴籠山淡欲無。綠浦例憑孤作界。畫橈常遣鷺前驅。此身元是滄浪客。敢學高人乞鏡湖。

春晚

村巷泥深晝掩門。倚闌搔首一消魂。花經風雨人方惜。士在江湖道更尊。擘浪忽看魚對躍。入雲時見鶴孤鶩。向來苦澗今安在。歎息誰能起九原。

雜感

早仕讒銷骨。遲歸悔噉臍。短衣猶掩脛。窮巷固多泥。婢喜蠶三幼。鄉中謂蠶眠爲幼。奴貪雨一犁。衛茆明我眼。刮膜謝金篦。春晚晴還雨。杯深醉復醒。溪添半篙綠。山可一窗青。藥品隨長鏡。花名記小屏。閒身幸無事。吟嘯送餘齡。

雜題

半飽半飢窮境界。知情知雨病形骸。軒昂似鶴那求料。枯槁如僧不赴齋。大兒都門久栖栖。小兒調官今復西。鄰家父子我所羨。泥水沒膝扶畊犁。

出遊歸鞍上口占

渺渺煙波飛槳去。迢迢野徑策驢還。寄懷楚水吳山外。得意唐詩晉帖間。每惜好春如我老。誰能長日伴人閒。世間自是無兼得。助業元非造物慳。

雨

曉望橫斜映水亭。莫看飄灑溼簾旌。不嫌平野蒼茫色。實厭空階點滴聲。上策莫如常熟睡。少安毋躁會當時。且將穉事傳童稚。未插秧時正好畊。

初夏閒居

雲液初鑿小瓮香。風濤乍展北窗涼。巢乾燕乳蟲供哺。花過蜂閒蜜滿房。閉戶不知春已去。鈔書但覺日方長。所嗟詩思年來減。虛負奚奴古錦囊。

川雲漠漠雨冥冥。濁酒閒傾不滿瓶。蠶簇尙寒爨繭薄。稻陂初滿喜秧青。王師護塞方屯甲。親詔優民已放丁。病起白憐猶健在。不須求應少微星。

松棚黯黯接虛堂。掃地燒香旋置牀。密葉留花供淺酌。斷雲障日作微涼。高城薄莫聞吹角。小市豐年有戲場。白首史官閒盡歲。祗將搜句畱流光。

城上朱旗夏令初。溪頭綠水蘸菰蒲。花貪結子無遺萼。燕接飛蟲正哺雛。簫鼓賽蠶人盡醉。陂塘移稻客相呼。鄉中謂傭工者爲客。長安青蓋金羈馬。也有農家此樂無。

啜茗清風兩腋生。西齋雅具愜幽情。熏衣過後篝爐冷。展卷終時嬾架橫。巢燕何曾擇貧富。鳴鳩元不爲陰晴。但能與物俱無著。小草新詩取次成。

野水楓林久寄家。慣將枯淡作生涯。小樓有月聽吹笛。深院無風看磴茶。靜岸葛巾穿蒼蔚。閒拖筇杖入谿斜。平居每與兒孫說。切勿人前一語誇。

水邊茆屋兩三間。野叟幽人日往還。兩卷硬黃書老子。數峯破墨畫廬山。功名會上元須福。生死津頭正要頑。試說龜堂得力處。向來何啻半生閒。

煮酒青梅次第嘗。啼鸚乳燕占年光。蠶收戶戶繅絲白。麥熟村村搗麩香。民有袴襦知歲樂。亭無桴鼓喜時康。未嘗一事橫胸次。但曲吾肱夢自長。

子通調官得永平錢監待次甚遠寄詩寬其意蓋將與之偕行也

黃紙起家陞仕籍。青衫遡闕拜恩光。署銜汝勿憎銅臭。就養吾方喜飯香。世事極知多倚伏。人生正要小回翔。但令父子常相守。歛版扶犁味總長。

### 梅市

沙際人家半掩扉。借炊小住不相違。水生溪面大魚躍。風定草頭雙蝶飛。竹院遊僧聞鼓集。煙畦老圃荷鋤歸。浩然物外真堪樂。回首浮生萬事非。

### 初夏幽居

日長巷陌曬絲香。雨霽郊原割麥忙。小擔過門嘗冷粉。微風解籜看新篁。傍籬鄰婦收魚笱。叩戶村醫送藥方。欲到湖邊還嬾動。悠然扶杖立斜陽。

虛堂一幅接羅巾。竹樹森疎夏令新。瓶竭重招麴道士。牀空新聘竹夫人。寒龜不食猶能壽。弊帚何施亦自珍。枕簟北窗寧有厭。小山終日對嶙峋。

野草幽花無歇時。一窗終日對東籬。病猶獨醉雖堪笑。老未全衰亦自奇。古紙硬黃臨晉帖。矮牋勻碧錄。

唐詩箇中疑是忘憂處。問著山翁卻不知。  
東園梅熟杏初丹。老子披襟每不冠。古硯坡陁麝煤綠。小山蔥蘢石盆寒。移牀剩欲眠松塢。鼓枻還思泊  
蓼灘。未用絲毫辨差等。黃塵終勝客長安。

泛舟至近村茅徐兩舍勞以尊酒

小舸悠颺亦樂哉。迢迢故取北村回。山從樹外參差出。水自城陰曲折來。樂歲共忘東作苦。殘租不待急  
符催。舊鄰父老睽離久。喚取開顏把一盃。

林間書意

三三兩兩市船回。水際柴門尙未開。垂綠筍梢風正惡。弄黃梅子雨初來。紅螺盃小傾花露。紫玉池深貯  
麝煤。領取林間閒富貴。向來誤計伴鄒枚。

地僻

地僻臨湍瀨。門幽長綠苔。客書疑誤達。僧刺媿虛來。清露蘋花坼。斜陽燕子回。自憐猶有恨。佳日對空罍。

夏末野興

半世天涯倦遠遊。還鄉不減旅人愁。數聲相應鳩呼雨。一片初飛葉報秋。山塢風煙僧院路。河梁燈火酒  
家樓。絕知雪鬢宜簔笠。分付貂蟬與黑頭。



漠漠川雲闔復開。天公試玉挽秋回。參差小市林邊出。縹緲疎鐘雨外來。土墼飯香供晚餉。布帘字大賣新醅。歸舟自逐輕鷗去。不用城笳抵死催。

### 劇暑

六月暑方劇。喘汗不支持。逃之顧無術。惟望樹影移。或謂當讀書。或勸把酒卮。或誇作字好。蕭然卻炎曦。或欲溪上釣。或思竹間棋。亦有出下策。買簟傾家貲。赤脚踏層冰。此計又絕癡。我獨謂不然。願子少置思。方今詔書下。淮汴方出師。黃旗立幟門。羽檄晝夜馳。大將先擐甲。三軍隨指揮。行伍未盡食。大將不言飢。渴不先飲水。驟不先告疲。吾儕獨安居。茂林蔭茆茨。脫巾濯寒泉。臥起從其私。於此尙畏熱。鬼神其可欺。坐客皆謂然。索紙遂成詩。便覺窗几間。颯颯清風吹。

### 縱遊深山隨所遇記之

行穿犖确度谿谿。路跨清溪一木斜。歷盡巉危到平地。壞垣欹屋兩三家。山徑欹危細棧通。孤村小店夕陽紅。竹郎有廟臨江際。木客無家住菁中。道逢山客束荆薪。口眼睢盱略似人。試問村名瞠不語。割然長嘯上嶙峋。古寺蕭蕭不見僧。飛甍滿屋老梟鳴。空房終夜無燈火。斷木支門睡到明。

### 池上

旋移吟榻竝池橫。欲出柴門復嬾行。樹罅忽明知月上。竹梢微動覺風生。貧無醉日惟堅忍。疾遇涼秋亦漸平。二尺燈檠元好在。便思相伴聽蛩聲。

秋後一日風雨

炎歊數日劇。蕩滌及秋初。病葉風吹盡。鳴蟬雨打疎。趁涼謀社酒。乘潤理園蔬。分喜寧無處。蒲中鱉鱗魚。

秋思

詩人本自易悲傷。何況身更憂患場。烏鵲成橋秋又到。梧桐滴雨夜初涼。江南江北堠雙隻。燈暗燈明更短長。安得平生會心侶。一尊相屬送年光。

小病兩日而愈

病骨羸然山澤臞。故應行路笑形模。記書身大似椰子。忍事瘦生如瓠壺。美酒得錢猶可致。高人折簡孰能呼。不如淨掃茅垆地。臥看微香起瓦爐。

龜堂一隅開窗設榻爲小憩之地

耕欄簷蔔障斜陽。旋置臨階八尺牀。小展窗扉無大費。略加苫蓋有餘涼。老來愈覺歲時速。步裏不知途路長。試問神遊向何處。月明揮榜上瀟湘。

秋懷

客思殘荷外。農功晚稻前。祭多巫得職。稅足吏無權。浦溆家家釣。村墟點點煙。歸舟葛衣薄。始覺是秋天。  
曩得治中俸。湖山偶卜居。身嘗著禾譜。兒解讀農書。遇事絕欣厭。接人均戚疎。乾坤雖浩浩。等付一蘧廬。  
秋暑雖猶在。晨興氣已清。蠻童掃荒徑。獠婢滌空鐙。病樹有凋葉。殘蟬無壯聲。書生守故態。已復理燈檠。

病臥

老境偏饒臥。秋天不肯晴。愁憑書解散。病仗藥支撐。果熟烏鳥樂。村深雞犬聲。邊頭定何似。頗說募新兵。  
秋夜獨坐聞里中鼓吹聲

收盡浮雲見素娥。青天脈脈映明河。時平里巷吹彈鬧。歲熟人家嫁娶多。高會不知清夜永。散歸想見醉  
顏酡。小窗燈火晶熒處。也有人賡七月歌。

自述

早畏危機避巧丸。長安未到意先闌。心如老馬雖知路。身似鳴蛙不屬官。閒駕柴車無遠近。旋沽村酒半  
甜酸。羣兒何足勞情恕。胸次從初抵海寬。

秋興

困儲赤米枝梧飯。篋有青氈準擬寒。政使堆金無處用。不須常貯一錢看。  
白頭韭美醃薑熟。頰尾魚鮮斫鱸成。卻對盤殮三太息。老年一飽費經營。

懲羹吹蠶豈其非。亡羊補牢理所宜。白頭始訪金丹術。莫笑龜堂見事遲。  
放翁老矣欲何之。采藥名山更不疑。但入剡中行百里。姓名顏狀有誰知。  
鼙鼓華鯨響寺廊。殘蕪落葉弄秋光。蹇驢繫著門前柳。閒覓題名拂敗牆。

小築

小築隨高下。園池皆自然。鋤山得靈藥。斲坎遇寒泉。幽檻花房斂。深林果蒂駢。鄰翁亦好事。相伴送流年。

寓興

窮巷無來客。秋風獨浩歌。壯年閒處老。佳日病中過。甚欲攜長鑊。仍思擁短蓑。逢山皆可隱。不必上三峩。

行飯至湖上

行飯消搖日有常。青鞋又到古祠傍。殘蕪滿路無多綠。落葉投空不待黃。只道詩書能發冢。豈知博塞亦  
亡羊。此身只合都無事。時向湖橋看戲場。

秋晚雨中作

新雁南來歲又殘。蕭蕭風雨暗江干。客竦似悉爾來病。酒薄不禁如許寒。草絡籬頭花尙碧。樹當浦口葉  
初丹。醉來且擁黃紬睡。莫問何時后土乾。

湖村

四十來居湖上村。翻翻七見改初元。風梢解籜竹齊母。露葉成陰桐有孫。渴鹿出林窺藥井。馴鷗掠水傍。棊軒老人不用誇頑健。時看孫曾浴畫盆。

### 曉寒

悠悠殘夢伴殘更。萬木風號曉氣清。雞唱欲闌聞井汲。月痕漸淺覺窗明。突煙騰碧炊初動。衣焙推紅火已生。小閣翻書裘褐暖。早朝霜滑媿公卿。

### 南門散策

結宇溪一曲。兩山左右之。橫木以爲門。斷竹作短籬。本無剝啄客。門牡固不施。登路壞莫補。石罅生棘茨。野蔓不知名。丹實何纍纍。村童摘不訶。吾亦愛吾兒。

### 十月

紅樹平沙十月天。放翁今作水中仙。琴琴林外迎神鼓。隻隻溪頭下釣船。世事極知吾有命。俗人終與汝無緣。菊花枯盡香猶在。又付東籬一醉眠。

### 記夢

久住人間豈自期。斷砧殘角助淒悲。征行忽入夜來夢。意氣尙如年少時。絕塞但驚天似水。流年不記鬢成絲。此身死去詩猶在。未必無人麤見知。

旅舍

寺鐘吹動四山昏。繫纜來投江上村。木落不妨生意足。水歸猶有漲痕存。爐紅手暖書差健。鼎沸湯深酒易溫。勿爲無年憂寇竊。狺狺小犬護籬門。

石堰村

木落山不蔽。水縮洲自獻。寒日晚更明。村巷曲折見。小婦鳴機杼。童子陳筆硯。農家雖苦貧。終勝異鄉縣。君看宦遊子。豈無墳墓戀。生死在故鄉。切勿慕棄傳。

幽居遣懷

習氣深知要掃除。時時褊忿獨何歟。呼童不應自生火。待飯未來還讀書。世態詎堪閒處看。俗人自與我曹疎。作詩未必能傳後。要是幽懷得小摭。

貧述

寒生肌粟苦衣單。瘦減頭圍覺帽寬。荒寂在家猶逆旅。窮空養老亦蔬餐。柴青竈突騰煙細。膏盡燈缸照字難。猶喜新醅三斗熟。半窗梅影助清歡。

自述

勃落爲衣隱薜蘿。掃空塵抱養天和。過期未死更強健。與世不諧猶嘯歌。野市蕭條殘葉滿。酒家零落廢

壚多石帆山下孤舟雨。借問君如此老何。

幽事

老大常愁節物摧。東皇又挽斗杓回。江天慘慘不成雪。山驛蕭蕭初見梅。隱士寄雲從地肺。遊僧問路上天台。戲書幽事無時闕。古錦詩囊莫莫開。

山房

擾擾人間歲月移。山房幾度換茅茨。身遊與世相忘地。詩到令人不受時。老鶴初來未丹頂。穉松親種已虬枝。東塗西抹非無意。皴面朱鉛太不宜。

感舊

雕鞍送客雙流驛。銀燭看花萬里橋。三十三年真一夢。茆簷寒雨夜蕭蕭。

禹祠

祠宇嵯峨接寶坊。扁舟又繫畫橋傍。跂添滿筍蕁絲紫。蜜漬堆盤粉餌香。團扇賣時春漸晚。夾衣換後日初長。故人零落今何在。空弔顏垣墨數行。

見事

流光莫恨去聯翩。見事還疑勝昔年。細改新詩須枕上。少留劇飲待花前。陰陰竹塢安茶竈。淺淺蘋汀著

釣船物外家風吾豈敢。散人名號亦充員。

初春幽居

滿榼芳醪手自攜。陂湖南北埭東西。茂林處處見松鼠。幽圃時時聞竹雞。零落斷雲斜日霏。霏微過雨未成泥。老民不預人間事。但喜農疇漸可犁。小築園林淺鑿池。身閒隨事得遊嬉。幽花折得露猶溼。嘉木移來根不知。小蝶弄晴飛不去。珍禽喜靜語多時。風光未忍輕拋擲。聊付詩囊與酒卮。

春遊

梅市移舟過古城。此行亦未闕逢迎。負薪野老無妻子。施藥山人隱姓名。風雨偏宜宿茅店。鹽醃不遣到藜羹。宣和版籍今誰在。似是天教樂太平。

羸臥

羸臥將如老景何。小園風月且婆娑。茶因春困論交密。酒爲家貧作態多。馬上元無聽雞句。原頭那有飯牛歌。自憐遠屏猶多事。賣藥歸來買釣簑。

幽事

跌宕人間歲月遷。賞心幽事故依然。潮通支浦漁舟活。露溼繁花醉帽偏。才盡賦詩愁壓倒。氣衰對奕怯



饒先。光陰風月空如昨。悵望蘭亭被襖年。

莫春新路至湖上示元敏

時雨作未成。蒸溽思出門。湖塘直東西。行人各歸村。翻翻鳥投林。杳杳鐘鳴昏。羊牛爭迳路。煙火出短垣。吾兒望未到。誰與共盤飧。幽獨多惻愴。且復攜斯孫。歸來蓬窗下。聊可與晤言。

春陰溪上小軒作

午醉初醒倚釣軒。悠然無與共清言。風微僅足吹花片。雨細纔能見水痕。杳杳暝鐘浮遠浦。離離煙樹識孤村。故人萬里峴山下。安得書來慰斷魂。比遺書問張季長消息於都下。未報。

自九里平水至雲門陶山歷龍瑞禹祠而歸凡四日

細雨如絲映晚暉。店家小憩換征衣。春農耕罷負犁去。村社祭餘懷肉歸。黃犢自依殘照臥。白鷗爭傍小灘飛。道邊舊識凋零盡。誰記遼天老令威。

老子無心老尚狂。山程隨處寄佺偃。雲歸岫穴初收雨。水入陂塘正下秧。野客就林煨燕筍。蠶家負籠采雞桑。遠遊萬里知何樂。卻喜東歸住故鄉。

老子山行肯遽回。直穿犖确上崔嵬。未誇腳力如平昔。且喜眉頭得暫開。廟後故梁龍化去。山前遺箭鶴銜來。囊錢已盡君無笑。草草猶能把一杯。

輿似雞栖寄兩竿。山程三月尙春寒。麥苗吐穗初成實。梅子生仁已帶酸。買飯猶勝乞墻客。看耕僭學勸農官。還家莫道虛懷袖。筍蕨隨宜亦滿盤。  
點點桃花糝綠苔。入門倚杖意悠哉。數聲茶飯齋初散。一片溪雲雨欲來。老宿龍鍾嗟獨在。高松磊砢憶新栽。世間萬事俱難料。未死重遊更幾回。

春晚卽事

桑麻夾道蔽行人。桃李隨風旋作塵。煜煜紅燈迎婦擔。皤皤畫鼓祭蠶神。龍骨車鳴水入塘。雨來猶可望豐穰。老農愛犢行泥緩。幼婦憂蠶采葉忙。

雜詠

鏡中顏狀年年改。海內交朋日日疎。一慟寢門生意盡。從今無復季長書。近聞張季長物故。  
女郎花樹新移種。官長梅園亦探租。作盡人間兒戲事。誰知空橐一錢無。鄉人謂楊梅。止曰梅官長。其高品也。  
一日日窮窮不醒。一年年老老如期。黃河卻有逢清日。白髮應無返黑時。

早至園中

湖上空濛雨熟梅。清晨岸幘一悠哉。幽花不恨草埋沒。密樹豈知禽去來。舊爲愛茶分水器。近緣炊爨得琴材。小丘僅見山如髻。尙媿韓公八尺臺。

南堂晨坐

鏡湖清絕似瀟湘。晨起焚香坐草堂。日暖遊絲垂百尺。花殘新蜜釀千房。綠桑糝箔開蠶食。白水翻車浸稻秧。莫道村翁殺風景。也能沽酒會年光。

雨晴

早曠常思雨。沉陰卻喜晴。放船蓮蕩遠。岸幘竹風清。淮浦戎初遞。興州盜甫平。爲邦要持重。恐復議消兵。

秋晚雜興

昔遇高皇起衆材。姓名曾得廁鄒枚。年踰八十猶賒死。卻伴鄰翁斲芋魁。老病侵凌不可當。時時攬鏡自悲傷。西風吹散朝來酒。依舊衰顏似葉黃。冷落秋風把酒杯。半酣直欲挽春回。今年菰菜嘗新晚。正與鱸魚一併來。

閒遊所至少留得長句

垣屋參差桑竹繁。意行漫漫不知村。眼明可數遠山疊。足健直窮流水源。鷺引釣船經荻浦。牛隨牧笛入柴門。試尋高處休行李。清絕應須入夢魂。太平人物自諧嬉。及我青鞋布襪時。丁壯趁晴收早粟。比鄰結伴絡新絲。圓饘坎坎迎神社。大字翩翩賣酒旗。晤語豈無黃叔度。欲尋幽徑過牛醫。

夏日雜詠

閒居自無客。況復暑如焚。百折赴溪水。數峯當戶雲。幽尋窮鹿徑。靜釣雜鷗羣。舊愛南華語。今方踐所聞。

南堂雜興

新涼一夜入郊墟。晨起衣巾爽有餘。燕欲委巢雛盡去。燕有三生雛者。及秋雛方去盡。扇猶在手意先疎。題詩又滿牛

腰束。采藥常攜鴉嘴鋤。湖上從今風月好。不妨隨處命籃輿。

彝走當年一念差。歸休別覺是生涯。茆簷喚客家常飯。竹院隨僧自在茶。紹興初。僧喚客茶。各隨意。少。謂之自在茶。今遂成俗。

禪欠徧參寧得髓。詩緣獨學不名家。如今百事無能解。只擬清秋上釣槎。

曉思

昏昏斷夢帶餘醒。散髮披衣坐待明。城角吹殘河漸隱。海氛消盡日初生。老農自得當年樂。癡子方爭後世名。莫怪閉門常嬾出。卽今車蓋爲誰傾。

秋雨書感

新春赤米摘青蔬。一飽從來不願餘。門外久無溫卷客。架中寧有熱官書。濁醪未廢時時飲。短髮猶須日日梳。自笑少年風味在。滿川煙雨正愁予。

晨起開門雪滿簷。束崗一徑得幽尋。斷雲殘雨歲華晚。丹竇碧花秋意深。林下已悲身老病。人間猶與俗

浮沉牀頭小甕今朝熟。又喚鄰翁共淺斟。

### 秋思

桑竹成陰不見門。牛羊分路各歸村。前山雨過雲無迹。別浦潮回岸有痕。  
老子齋居罷擊鮮。木盤竹筯每隨緣。鄰僧不用分香鉢。遺灰猶堪過半年。

### 秋日村舍

川雲慘慘欲成雨。宿麥蒼蒼初覆土。芋肥一本可專車。蟹壯兩螯能敵虎。  
村村婚嫁花簇檐。廟廟禱祠神降語。兒孫力稼供賦租。千年萬年報明主。

### 秋感

扶杖龍鍾迫耄期。江湖木落更堪悲。醉中光景似得志。夢裏朋儕如少時。  
落筆龍蛇仲蒙帖。萬國器字仲蒙。滿懷風月季長詩。前朝名勝凋零盡。百歲關心只自知。

聖世優容許乞身。歸來猶幸齒齊民。漁家那有懸車地。蔬食何施祝鯁人。  
獠婢臨溪漂衣絮。蠻童掃葉續炊薪。生涯如此仍秋莫。賴是從來慣處貧。

紹興辛未至丙子。六年間。予年方壯。每遇重九。多與一時名士。登高於叢山。宇泰閣。距開禧丁卯六十年。憂患契闊。何所不有。追數同遊諸公。乃無一人在者。而予猶強健。慘愴不能已。賦

詩識之

故里登高接雋遊。卽今不計幾番秋。一樽尙與菊花醉。萬事不禁江水流。薄命雖多死閭巷。逢時亦有至公侯。若論耄歲朱顏在。窮達皆當輸一籌。

考健

年垂九十身猶健。竹屋荆扉不厭低。挈榼自沽深巷酒。擁衾遙聽別村雞。家添豚柵還堪賦。路認牛欄每不迷。惟恨窮秋開霽少。晚來小雨又成泥。

寓歎

交世非初志。謀生又絕疎。家貧思辟穀。人忌悔知書。門異回軒巷。棗無禿尾驢。老頑苟勿怪。萬事有乘除。短髮不禁搔。紆悲賴濁醪。潦收溪瀨急。木落寺樓高。善飯餘何欠。看雲亦足豪。今朝有奇事。江浦得霜螯。

題僧菴

細路穿雲塢。危橋渡野塘。人稀土花碧。屋老瓦松長。憂患雙蓬鬢。裝資一布囊。燒薪藉餘暖。今夜有新霜。

秋冬之交雜賦

嶺下晨炊黍。津頭莫繫船。寒潮吞別浦。老木慘蒼煙。市徙新山步。耕侵古廟堧。閒人不蓄幘。散髮醉江天。霧雨林塘晚。風霜聚落寒。衣冠存簡朴。農圃備艱難。春巖燧供餌。蒸炊豆作團。此心如古井。無地起濤瀾。

梅市莫歸

老境惟閉門。不與事物接。時逢佳山水。尙復快登涉。山程策小蹇。水泛搖短楫。今茲稅駕地。佳事喜稠疊。雲生溼行膝。風細掠醉頰。旅囊毛玉糝。僧飯敷白氈。葑火煨芋魁。瓦甌炊豆莢。經行出幽圃。懷抱頗自愜。枯籬絡丹竇。深澗堆黃葉。白雲橫谷口。綠篠穿山脅。還家寧迫暮。取路羞徑捷。何當倚蒲龕。一坐十小劫。

霜夜

月淡霜清夜漏遲。疎鐘杳杳度南陂。燈殘有恨欲誰語。雞老無聲如我衰。使入蜀川方在道。書傳淮浦定何時。若爲可遣閒愁得。獨擁寒爐爇豆萁。時方附蜀中便舟。寄書張季長家。又未得古壽書。每悶懷。

醉歌

不癡不聾不作翁。平生與世馬牛風。無才無德癡頑老。爾來對客惟稱好。相風便帆第一籌。隨風倒柂更何憂。亦不求作佛。亦不願封侯。亦不須脫裘去換酒。亦不須賣劍來買牛。甲第從渠壓梁肉。貂裘本自出兜鍪。變理陰陽豈不好。纔得閒管晴雨如鴛鴦。辛苦築壘拂雲祠。不如吟歎風月登高樓。爾作楚舞吾齊謳。身安意適死即休。

雪意

風吼江郊雪意濃。雲如兩陣決雌雄。山寒酒過平時量。窗黑書虧半日功。閒話更端茶竈熟。清詩分韻地

爐紅不須遽覓華胥路。更竢天花落坐中。

晚晴出行近村閒詠景物

雪雲吹盡木陰移。正是先生曳杖時。老特行將新長犢。空桑臥出寄生枝。醫翁莫過囊探藥。筮叟晨占手布著。誰謂人間足憂患。未妨古俗自熙熙。

郊行

山色掃石黛。江流漲麴塵。春晴不終日。老病動經旬。竹密有啼鳥。村深多醉人。東阡與南陌。處處寄閒身。開歲屢作雨。不成正月二十六。日夜乃得雨。明日行家圃有賦。

東風吹雨破天慳。行圃歸來剝解顏。百草吹香蝴蝶鬧。一溪漲綠鷺鷥閒。老來每歎論心少。貧甚方知覓醉難。猶賴籃輿無恙在。呼兒結束入南山。

園中晚飯示兒子

一飽何心慕萬鍾。小園父子自相從。蚍蜉布陣雨將作。蛺蝶成團春已濃。澗底束薪供晚爨。街頭糴米續晨舂。盤餐莫恨無兼味。自繞荒畦摘芥菘。

書況

自從請老鏡湖濱。萬事不關林下人。鴉去鴉歸還過日。花開花落又經春。官微也過千重浪。身在依然一



幅巾晨突有煙吾事了。濁醪不復惱比鄰。

魯墟舟中作

春浦南來元不到。書檣偶復入鷗羣。人家遠火林間見。船底微波枕上聞。山口正銜初出月。渡頭未散欲歸雲。錦囊詩草新寥落。得句猶堪寄一欣。

恩封渭南伯唐詩趙嘏爲渭南尉當時謂之趙渭南後來將以予爲陸渭南乎戲作長句

老向人間久倦遊。君恩乞與渭川秋。虛名定作陳驚坐。好句真慙趙倚樓。棧豆十年霑病馬。煙波萬里著浮鷗。就封他日輕裘去。應過三峯處處留。

幽居

宿志在人在外。清心遊物初。猶輕天上福。那習世間書。薺菜挑供麩。槐芽采作蔬。朝哺兩摩腹。未可笑幽居。

海棠歌

我初入蜀髻未霜。南充樊亭看海棠。當時已謂目未覩。豈知更有碧雞坊。碧雞海棠天下絕。枝枝似染猩猩血。蜀姬豔粧肯讓人。花前頓覺無顏色。扁舟東下八千里。桃李真成僕奴爾。若使海棠根可移。揚州芍藥應羞死。風雨春殘杜鵑哭。夜夜寒衾夢還蜀。何從乞得不死方。更看千年未爲足。

湖上

綸巾羽扇影翩翩。湖上徜徉莫計年。桃李已忘疇昔分。禽魚猶結後來緣。山前虛市初多筍。江外人家不  
禁煙。莫恨幽情無與共。一雙白鷺導吾前。

夏初書感

春與人俱老。花隨夢已空。遊蜂黏落蕊。輕燕接飛蟲。桑悴知蠶起。性肥賽麥豐。爲農當自力。相戒勿忽忽。

初夏喜事

箕穎元非爭奪場。瀟湘自古水雲鄉。采茶歌裏春光老。煮繭香中夏景長。歛版早知遊宦惡。署門晚悟世  
情常。茹芝卻粒雖無術。散髮猶當效楚狂。

閒遊

好事湖邊賣酒家。杖頭錢盡慣曾賒。壚邊爛醉眠經日。開過紅薇一架花。

初夏雜興

終日頽然蠹簡中。門前煙水浩無窮。百年等是一枯塚。四海應無兩放翁。栗玉長枝挑苦筍。胭脂小把翦  
防風。地偏日永閒無事。擬著珍蔬譜一通。

書興

占得溪山下數椽。飽經世故豈猶全。人門明月真堪友。滿榻清風不用錢。便死也勝千百輩。少留更過二

三年湖橋有酒能來醉。一棹何妨作水仙。

### 池亭夏晝

造物寧非念老生。池亭幽事悉施行。羣魚聚散忽無迹。孤蝶去來如有情。小磴落茶紛雪片。寒泉得火作松聲。曲肱假寐翛然寤。不爲敲門夢不成。

### 卽事

放翁老去未忘情。鏡裏森然白髮生。一片常愁見花落。三聲最怕聽猿鳴。年年雙隻路傍堦。夜夜短長城上更。晚悟一條差似可。孤舟漁火看潮平。

### 野性

野性從來與世疎。俗塵自不到吾廬。醉中往往得新句。夢裏時時見異書。穉子那偷服藥酒。家僮尙護放生魚。今朝更有欣然處。引得清泉灌晚蔬。

### 讀史

王侯到底是虛名。何物能爲我重輕。徒步出關胡不可。向來常笑棄繻生。自古功名亦偶諧。胸中要使浩無涯。可憐赫赫丹陽尹。數顆檳榔尙繫懷。

### 病戒

憂身如憂國。畏病如畏亂。此身雖幸健。敢作無事看。禍福在呼吸。恐懼兼寢飯。人所忽不省。我思嘗熟爛。夜臥不安席。晨起寧待旦。雖云親藥石。得失每參半。人情喜一快。往往觸剽悍。收功寧使遲。覆敗不可玩。

小築

小築竝湖隄。茅茨不厭低。引泉澆藥圃。斫竹樹雞棲。夕靄山常淡。秋蕪路欲迷。平生草玄手。老去學鉏犁。

欲雨

徒冗中庭蟻。爭巢後圃鳩。物情猶慮患。人事得忘憂。荷鍤決新渠。芟苻補舊廬。共知秋必雨。有備卽安居。

出遊莫歸

東行西行日莫歸。川雲漠漠雨霏霏。蝗餘場上禾收薄。酒貴街頭客醉稀。買犢躬耕空自力。灼龜占歲又成非。穉孫索飯殊關抱。憐汝何時得瓠肥。

仲秋書事

秋風社散日平西。餘酢殘壺手自提。賜食敢思烹細項。家庖仍禁擘團臍。昔爲儀曹郎。兼領膳部。每蒙賜食。輿王公略等。食品

中有羊。細項。甚珍。子近以惡殺不食蟹。

書生習氣盡驅除。酒興詩情亦已無。底怪今朝親筆硯。村鄉來請辟蝗符。

大布縫袍穩。乾薪起火紅。薄才施畝。朴學教兒童。羊要高爲棧。雞當細織籠。農家自堪樂。不是傲王公。  
 盜息無排甲。兵消不取丁。頻過鬪雞舍。閒學相牛經。江浦漁歌遠。人家績火青。遨遊無定處。隨意宿丘亭。  
 東舍女乘龍。西家婦夢熊。翁誇酒重碧。孫愛果初紅。栗烈三冬近。團欒一笑同。營生無繆巧。百事仰天公。  
 租犢耕蕎地。呼船取荻薪。蒼頭供井臼。赤腳解縫紉。僧乞銘師塋。巫邀賽土神。心常厭多事。謝病又經旬。  
 新作地爐成。蓬窗亦自明。油香麪餌脆。人靜布機鳴。縣吏催科簡。豪家督債輕。小康何敢望。生計且支撐。  
 諸孫晚下學。髻脫繞園行。互笑藏鈎拙。爭言鬪草贏。爺嚴責程課。翁愛哺飴錫。富貴寧期汝。它年且力耕。

## 晚秋出門戲作

病叟倘佯古澤邊。橫林搖落莫秋天。鳴鳩雨後卻呼婦。飛雀霜前先著綿。抱被每投僧榻宿。卷書時當酒  
 家錢。秋風想像芝房熟。北望商山一悵然。  
 閒愁那到野人邊。萬事元知合付天。盡醉僅能三盃酒。新寒未辦一銖綿。鄰僧每欲分齋鉢。廟史猶來索  
 社錢。無地置錫真細事。不妨胸次日超然。

## 示子通

我初學詩日。但欲工藻繪。中年始少悟。漸若窺宏大。怪奇亦間出。如石漱湍瀨。數仞李杜牆。常恨欠領會。

元白纔倚門。溫李真市鄣。正令筆扛鼎。亦未造三昧。詩爲六藝一。豈用資狡獪。晉人謂戲爲狡獪。今閩語尙爾。汝果欲學詩。工夫在詩外。

聞新雁有感

才本無多老更疎。功名已負此心初。鏡湖夜半聞新雁。自起吹燈讀漢書。  
新雁南來片影孤。冷雲深處宿菰蘆。不知湘水巴陵路。曾記漁陽上谷無。

小園獨酌

橫林搖落弄微丹。深巷蕭條作小寒。秋氣已高殊可喜。老懷多感自無歡。鹿初離母斑猶淺。橘乍經霜味尙酸。小酌一卮幽興足。豈須落佩與頰冠。

覽鏡

鏡中老翁誰。非復少年我。誦書如布穀。拈出無一可。又非富貴逼。棄去自不果。無功博一飽。有辜富萬坐。老境最堪笑。作計日益左。正似鳩拙巢。不及蠶自裹。霜寒衣未贖。瑟縮附殘火。作詩數十年。所得良鎖鎖。弱松困蔓纏。何日見磊砢。洞庭可遠遊。秋風思捩柂。

獨坐

博山香霧散。馱馱袖手何妨靜。掩扉六十年前故人盡。紹興中往還朋舊。今乃無一人在。八千里外寄書稀。自張季長下世。蜀

中書問  
幾絕。· 昨朝送客桐江去。今日逢僧剡縣歸。欲作小詩還復懶。海鷗與我兩忘機。

### 初冬雜詠

重陽已過二十日。殘菊纔存三四枝。對酒插花君勿笑。從來不解人時宜。  
古壽書來言得堵。東陽人到報生孫。一家三處俱強健。且撥閒愁近酒尊。  
微風盪水靴文浪。薄日烘雲卵色天。但恨世間閒客少。江湖底處欠漁船。  
老去胸中百事真。同遊無復白頭新。鵠從熟後頓分食。鹿漸馴來不避人。

### 小江

出郭四十里。孟冬天尙和。風生帆力健。木落月明多。小市人聲散。長橋炬火過。吾生幾來往。撫枕獨悲歌。

### 短歌行

富貴得意如登天。自計一跌理不全。晝食忘味夜費眠。渠過一日如一年。春蠶得衣畊得食。農功初成各  
休息。賣酒壚邊紛鼓笛。我過一年如一日。二者求兼勢安可。與我周旋寧作我。春城桃李豈不妍。雪澗未  
妨松磊砢。人生禍福難遽論。廟犧烏得爲孤豚。君不見獵徒父子牽黃犬。歲歲秋風上蔡門。

### 冬日排悶

地爐微火伴寒灰。垂野江雲暝不開。欲睡手中書自墮。半酣窗外雪初來。渡頭照影聞征雁。籬角吹香得

早梅佛粥春盤俱不遠。離離斗柄欲東回。

湖山尋梅

鏡湖渺渺煙波白。不與人間通地脈。騎龍古仙絕火食。慣住空山齧冰雪。東皇高之置度外。正似人中巢許輩。萬木僵死我獨存。本來長生非返魂。小雪湖上尋梅時。短帽亂插皆繁枝。路人看者竊相語。此老胸中常有詩。歸來青燈耿窗扉。心鏡忽入造化機。墨池水淺筆鋒燥。笑拂吳箋作飛草。

讀唐人愁詩戲作

少時喚愁作底物。老境方知世有愁。忘盡世間愁故在。和身忘卻始應休。清愁自是詩中料。向使無愁可得詩。不屬僧窗孤宿夜。卽還山驛旅遊時。

書歎

尺椽不改結茅初。薄粥猶贍卒歲儲。鴟子解迎門外客。狸奴知護案間書。深林閒數新添筍。小沼時觀舊放魚。自笑從來徒步慣。歸休枉道是懸車。

晚步湖隄

絕裘桐帽野人裝。又上湖隄步夕陽。貧甚不爲明日計。興來猶作少年狂。殘樽倒酒無餘瀝。幽圃尋梅認



暗香時有行人歎。頑健黑絲點破頰。間霜。

春日雜興

小甌有米可續炊。紙鳶竹馬看兒嬉。但得官清吏不橫。卽是村中歌舞時。  
由仕常騎秃尾驢。歸休自駕折轅車。今朝偶遇村夫子。借得齊民一卷書。  
更事多來見物情。世間常恨太忙生。花開款款寧爲晚。日出遲遲卻是晴。  
四十餘年學養生。誰知所得亦平平。體孱不犯寒時出。路溼常尋乾處行。  
攪睡禽聲曉。傍簷泥。人花氣。午穿簾。懽情老。去年年薄。困思春來日日添。

暮春龜堂卽事

風日初和晝漏長。蕭然巾屨集茆堂。雨餘千疊暮山綠。花落一溪春水香。  
斷簡積中塵委積。故人墓上草荒涼。爾來幸有寬懷處。病退牀頭減藥囊。  
日月無根去若馳。故園又見落花時。盃中綠酒不肯飲。鏡裏蒼顏應自知。  
千丈新堤湖水滿。五更殘漏角聲悲。暮年父子難乖隔。淮浦書來苦覺遲。

殘年

殘年光景易駸駸。屏迹江村不厭深。新麥熟時蠶上簇。晚鷺啼處柳成陰。  
短檠已負觀書眼。孤劍空懷許

國心惟有雲山差可樂。杖藜誰與伴幽尋。

閒詠

蕭蕭華髮映烏巾。五十年前故史臣。正使老來無老伴。未妨閒處作閒人。按行池水知增耗。點檢庭花見故新。更有菴中策勛事。投牀鼻息聒比鄰。

事業無聞負聖時。滄波自照角巾欹。養成林下無窮嬾。占盡人間徹底癡。小麥繞村苗鬱鬱。柔桑滿陌椹纍纍。醫翁筴叟真堪友。搜索殘尊與共持。

初夏

新綠陰中燕子飛。數家煙火自相依。童誇犢健浮溪過。婦閔蠶飢負葉歸。地煖小畦花未長。泥融幽徑藥苗肥。郊居樂事何勝數。一醉旗亭又典衣。

山房

柴門不掩俗人稀。成就山房一段奇。木葉最宜新雨後。鳥聲更勝暮春時。家貲屢罄緣耽酒。宿習猶存爲愛詩。別有一條差自慰。木苗芎苗正離離。

窗下戲詠

飛來山鳥語惺惚。却是幽人半睡中。新竹成陰無彈射。不妨同向北窗風。

三尺清池鏡面平。剪刀葉底戲魚行。吾曹安得如渠樂。傍渚跳波過此生。  
何處輕黃雙小蝶。翩翩與我共徘徊。綠陰芳草佳風月。不是花時也解來。

埭西小聚

瓦盎盛蠶蛹。沙甌煮麥人。三家小聚落。兩姓世婚姻。父老衣冠古。閭閻風俗淳。不應陶靖節。獨號葛天民。  
山行過僧庵不入

垣屋參差竹塢深。舊題名處嬾重尋。茶壚煙起知高興。碁子聲疎識苦心。淡日暉暉孤市散。殘雲漠漠半川陰。長吟未斷清愁起。已見橫林宿暮禽。

山行

閒人日日得閒行。況值今朝小雨晴。水淺遊魚渾可數。山深藥草半無名。臨溪旋喚罾船渡。過寺初聞浴鼓聲。小醉未應風味減。滿盤青杏伴朱櫻。

小酌

偶向東園把一盃。不辭團坐掃蒼苔。野花經雨自開落。山鳥穿林時去來。皂白正非天欲辨。青黃要與木爲災。今年秋後猶能健。賸乞梅栽與李栽。

夏日

暑雨初晴晝漏遲。江鄉樂事有誰知。村村蠶麥登場後。戶戶吳蠶拆簇時。  
齒髮凋零奈爾何。年光暗裏易消磨。街槐正喜清陰密。巷柳還驚蠹葉多。  
竹根斷作眠雲枕。木瘦剝成貯酒尊。怪怪奇奇非着意。自無俗物到山村。  
黃葛蚊廚睡欲成。高槐陰轉暑風清。倚牀奴子垂頭坐。搖手兒孫小步行。  
斲取溪藤便作香。煉成崖蜜旋煎湯。蕭然巾履茅堂上。不畏人間夏日長。

舟中有賦

一枝柔艣聽咿啞。炊稻來依野老家。山寺日中齋鼓動。江樓風急酒旗斜。  
綠梢嫋嫋搖新竹。翠蔓離離熟早瓜。閒客去留隨所遇。不知何處送棲鴉。

蒸溽作雨排悶

柱礎生微潤。簾櫳轉薄陰。蟻遷都邑改。鳩逐怨恩深。菌萐新離水。芭蕉半展心。  
掩屏惟熟睡。誰與續愁吟。

卽事

煙雨淒迷晚不收。疎簾曲几寄悠悠。一雙蛺蝶來何許。點盡青青百草頭。  
小閣憑欄望遠空。天河橫貫斗牛中。他年鼓角榆關路。馬上遙看與此同。

露坐小隱

寂寂柴門閉嫩苔。門前有路走天台。近秋河漢西南落。欲雨風雲東北來。旋摘甘瓜青帶蔓。新篘玉醴冷傳盃。亦知野外無供給。且復相逢笑口開。

晚興

竝簷幽鳥語瓊瓏。一榻蕭然四面風。客散茶甘留舌本。睡餘書味在胸中。浮雲變態吾何與。腐骨成塵論自公。剩欲與君談此事。少須明月出溪東。

疾小愈縱筆作短章

治疾如治盜。要使復其常。藉曰用戈矛。全之寧欲傷。彼盜皆吾民。初非若胡羌。奈何一朝忿。直欲事歐攘。歐攘雖快心。少忍理則長。華陀古神醫。煎浣到肺腸。取効雖卓犖。去死真毫芒。君審欲除盜。惟當法龔黃。撫摩尙有道。四境皆耕桑。我亦以治疾。不減玉函方。

病少愈偶作

蕭條白髮臥蓬廬。虛讀人間萬卷書。遇事始知聞道晚。抱疴方悔養生疎。高門赫赫何關我。薄俗紛紛莫問渠。羸疾少蘇思一出。夕陽門巷駕柴車。病入秋來不可當。便從此逝亦何傷。百錢布被斂首足。三寸桐棺埋澗岡。但恨著書終草草。不嫌徂歲去堂堂。今朝生意纔絲髮。便擬街頭醉放狂。

湖上晚望

閒人無處破除閒。待得漁舟一一還。峯頂夕陽煙際水。分明六幅巨然山。

九月十一日疾小間夜賦

清夜房櫳燈火微。此心病起更依依。空驚牀下莎蟲語。不見梁間巢燕歸。蒼硯有池殘墨在。白頭不櫛亂書圍。可憐夫遽忘風月。猶夢華觴插羽飛。

病後衣巾盡覺寬。挈提裘領喟然歎。孤燈不燭熒熒碧。小雨無聲慘慘寒。只道清心災自退。豈知非意病相干。平生最愛秋搖落。惆悵今年怯倚欄。

遠遊

壯年不作故山歸。老去方知浪走非。挂日片帆吳赤壁。嘶風疋馬蜀青衣。交遊雖廣知心少。香火徒勤願力微。堪笑只今成底事。青燈無恙且相依。

九月二十五日雞鳴前起待旦

堪笑枯腸漸畏茶。夜闌坐起聽城笳。爐溫自撥深培火。燈暗猶垂半結花。斷夢不妨尋枕上。孤愁還似客天涯。埽塵拾得殘詩藁。滿紙風鶉字半斜。

舟中晨起

天宇清寒病體輕。煙波聊復事宵征。艣橫舟尾霜如抹。犬走籬根葉有聲。蕭尹威名空赫赫。班侯智略本平平。不如歸結迎神社。長笛圓聲送此生。

殘菊

殘菊一枝香未殘。夜窗拈起百回看。過時只恐難相笑。我是三朝舊史官。

山墅

煙水煙林老結廬。人間用短更誰如。輭蒲穩背供危坐。小幟障燈便細書。莫欺衰病歸山墅。曾領諸儒上石渠。貞觀開元嗟已遠。爲君試說紹興初。

秋晚幽居

吳中秋晚氣猶和。疾豎其如此老何。鳥語漸稀人睡美。木陰初薄夕陽多。埽園日日成幽趣。撫枕時時亦浩歌。車轍久空君勿歎。文殊自解問維摩。

遊山

一生萬里著行滕。抖擻塵埃尙未能。不怕語音時帶剌。敢辭生計略如僧。疎梅漸動清溪曲。霽雪遙看古塔層。喚起故年清絕夢。數聲柔艣下巴陵。

病中雜詠

身是人間一老樵。城南煙水寄迢迢。尋人偶到金家曉。取米時經杜浦橋。小市孤村雞喔喔。斷山幽谷雨蕭蕭。吾曹自養無能爾。楚客應無隱可招。

身似頭陀不出家。杜陵歸老有桑麻。茶煎小鼎初翻浪。燈應寒窗自結花。殘藥漸離愁境外。亂書重理淡生涯。等閒一事還超俗。斷紙題詩字亂斜。

示兒

死去元知萬事空。但悲不見九州同。王師北定中原日。家祭無忘告乃翁。

放翁精年此冊。亦殊蒐羅。  
以盡向所遺者。子不克。其  
人之也。定之候。



